# فیلم آخر رجال الحب

قصة وسيناريو وحوار

خالد أبو السدهب



#### بطاقة فهرسة

#### مكتبة جزيرة الورد

اسم الكتاب: فيلم آخر رجال الحب قصة وسيناريو وحوار: خالد أبو الدهب رقم الإيداع بدار الكتب المصرية:

التجهيزات الداخلية: عبد الفتاح بشار

تصميم الغلاف : هاني صالح

الصورة الداخلية: محمود سالم



م القاهرة: ٤ ميدان حليم خاصف بنت فيصل ش ٢٦ بوليو من ميدان الأويرات: ٢٠٠٠-١٠٠٠ ٢٠٠١

Tokoboko\_5@yaho

#### حقوق الطبع محفوظة

وغير مسموح بإعادة نشر أو إنتاج هذا الكتاب أو أي جزء منه أو تخزينه على أجهزة استرجاع أو استرداد اليكترونية أو نقله بأية وسيلة أخرى أو تصويره أو تسجيله على أي نحو بدون أخذ موافقة كتابية مسبقة من المؤلف.

#### الطبعة الأولى 14 20

تنبيه: الأعمال الأدبية الواردة في سياق الفيلم جميعها أعمال حقيقية للمؤلف و البعض منها تحت النشر وأي اقتباس لأسم أو فكرة أي عمل أدبي منها يعد اعتداء على حقوق الملكية الفكرية ويوجب المساءلة القانونية.

#### إهداء دائم

إلى روح أبى إلى الغالية أمى

أهديكما خير ما كتبت و ما سوف أكتب.. فأنتما أحق به مني أما إذا أخطأت التقدير .. وكان فيما كتبت أو سأكتب ما ليس بخير فهو عليَّ فهو عليَّ لأني أحق به منكما

#### خالد أبو الدهب

#### ربها كان إهداءاً ..

إليها ..

والقمر وشماً باهتاً في كتف السماء

إلى إيزيس .. الغافية على سنُّدَّةُ الرغبة والرهبة والاشتياق.. ناراً وصقيعاً وانتظاراً ..

كفكفي دموعك يا سيدتي

لا تسكبيها على المفارق وفي متاهات الطرق

وتلك الشموع النازفة البائسة أطفئيها

واقطعى ألسنة شعراء الحب في مملكتك

واطعمى بها نيران مدفأتك

لان شتاءك سوف يطول

وبردك سوف يطول

وليلك سوف يطول

. .

وشمسك لن تظهر

فإيزوريس لن يعبر

وسيظل إلى الأبد

منفياً ...

ممزقاً .....

توقيع

(ما تبقى من إيزوريس)

#### مقدمة بقلم الناقد السوري

#### محمد غازي تدمري

- ثمة مبدعون يحرقهم الفعل الكتابي ، حتى ينصهروا في رماده روحاً مبدعة ، يكتبها النصُّ المتجليّ في فضاء ابداعية متوثبة ، مُحفزة ، تتماهى على مسابك إبداعية مندغمة في فضاء جنس إبداعي ليس من السهل اقتحام خدْره ، لأنه يحتاج إلى قدرات إبداعية تتجاوز ما يحتاجه فعل كتابة أي نص شعري كان أو نثري ، فهو نصُّ افتراضي لحكاية تتجسد أبعادها في يحتاجه فعل كتابة أي نص شعري كان أو نثري ، فهو نصُّ افتراضي لحكاية تتجسد أبعادها في ، الواقعي مع الخيالي ، الدراما و التراجيديا ، ولذلك اعتبره النقاد نصاً متعدد المعاني ، فهو نص سينمائي ، ورؤية مسرحية ، يُستخدم في المقاربة والتداولية للنصوص السردية ، لذلك نُدر المبدعون في مجال كتابته ، ففن كتابة السيناريو متكامل الأهداف ، متعدد الاتجاهات ، مشدود إلى الخبرة الحياتية ، والمرجعية الثقافية ، وخبرة واثقة بالنصوص والأجناس الأدبية لارتباطه بترسيمات بلاغية وسردية ، أهم صفة فيها تجنيحُ الخيال ، وامتداد صوره التي تنسج في الحدث أحداثاً ومن اللقطة المفردة لقطات مزدوجة خلال نقلات مشهدية متقنة .

- من هذا المنطلق المجسّد لعبقرية كتابة السيناريو يبرز الأديب المرهف (خالد أبوالدهب) واحداً من مبدعي كتابة السيناريو، تجاوز أبوالدهب مراحل التجريب، فا شتغل على كتابة نصوص لسيناريوهات إبداعية، اختصت بالإيقاع السينمائي المشهدي المرتبط بالحركة المضبوطة، والنقْل المنهجي بين الأزمنة والأمكنة مُستحضرة لوقائع مرسومة بدقة في عالم سينمائي حي، لذلك اعتنى بشخصياته المختارة بدقة، بعد سبرعوالمها الداخلية والنفسية، ثم طابقها مع سماتها الخارجية مُقدماً الأنموذج الأفضل للشخصية السينمائية القادرة على استيعاب فن السيناريو، والشغل على وقائعه وأحداثه.

- وبقدر ما يكون الورق ممنهجاً يأتي الإخراج متفوقاً ، حيث تجتمع الفضاءات المبدعة في وحدة العمل الجاذب لكل من يراه ويتابعه فيجتمعون على كلمة واحدة : «كان العمل رائعاً ».

- والمتابع لكل ما أنجزه مبدعنا منذ (ثورة العميان) و (فتى النور والنار) و (امرأة غير صالحة للحب) و (بائع الموت) و تاريخياً مثل ( شيطان الجاهلية ) يستشف ذلك وأكثر .. أما عن مو ضوع الدرا سة وهى كتاب سيناريو فيلم (آخر رجال الحب) الذي ا شتغل مبدعنا عليه بحرفية عالية ترتكز إلى قصة رومان سية هادفة ، وفق مسار درامي متصاعد ، يعتمد على مشاهد جاذبة غير منفرة والمتنامية على ترْتات (تقطيع) يتماهى فيه الوجداني مع الغيري والوطني ، مما يكشف براعة شغل تقنى من خلال احتراف واضح تبدى في تحديد المشاهد ، وترسيمها بالشكل الذي يُهيء مادة غنية لأي مخرج حاذق ، مما يؤكد قدرة مبدعنا السيناريست خالد أبوالذهب على التخيل والتوليد ، محققاً روعة المشهد السينمائي وجمالياته من خلال مسلك إبداعي واع ومتقن ، عرف كيف يربط زمن الخطاب الحواري بزمن الفعل وبالتالي شدهما إلى إيقاع الشخصيات المختارة بدقة ، وذات صلة بالورق المكتوب بحذاقة وبالتالي شدهما إلى إيقاع الشخصيات المختارة بدقة ، وذات صلة بالورق المكتوب بحذاقة ، التصويرية ، والمشهدية ، الواعية لكل حركة وإيماءة تصدر من البطل الرئيسي أو من الأبطال المساندة سعياً إلى كمال المنتج كقصة وكسيناريو ثم .. كإخراج ليس الأقرب إلى النجاح فقط ، و إنما التواق إلى الحياة والسيرورة والبقاء في الذاكرة .

- ولما كانت كتابة السيناريو لها علاقة بمستويات السرد من خلال أجناسه النثرية كالقصة والرواية ، فإن مبدعنا ومن خلال ما كتبه ، كان أسير إتقانه مقومات السرد التي تجلت في كثير من القصص القصيرة التي كتبها مؤكدة على براعة أسلوبه السردي الذي جعله محلقاً في فضاءات السرد في مستوييه النقلي والإبداعي ، وهذا ما تجليّ أيضاً في اختياراته لمستويات مسرود السيناريو سواء بالنسبة للحوار القولي أو التذكري الداخلي أو على مستوى التوصيف المتقن لأشخاصه .

- كل ذلك شكل من أشكال السرد الفني الذي عرف مبدعنا كيف يستغل قدراته فنقلها إلى السيناريو حالة من الإبداع وإحالة إلى الصورة المشهدية المتحركة مع الصورة الفنية الناطقة ، حالة من حالات إبداع ربما اختص بفن كتابة السيناريو أكثر من غيره وهذا ما حققه خالد أبوالدهب ونجح في توصيفه وتشكيله ضمن سياق سردي سينمائي مشهدي متحرك مشغول بحرفية راسخة لا لبس فيها ولا غموض .

#### - بالنسبة لنهاية الفيلم:

- قدم المؤلف ثلاث صياغات للنهاية احتوت كل صياغة فكرة جيدة يمكن الاستفادة منها ، أو من خلال أخذ الفكرة الجيدة من كل نهاية مفترضة ، لتكوين نهاية رابعة مختلفة وتضم أجمل ما تضمنت النهايات الثلاث.

#### – مثلا :

- كأن يأخذ المشهد (140ب) وجزء من المشهد (137ج) ثم ننتهي بنهاية المشهد (137) بالنهاية الأولى التي تشير إلى أنه «عندما يصبح سرب الحمام على صفحة السماء مثل نقاط بقلم رصاص فوق صفحة بيضاء .. يظلم الكادر ونرى تتر النهاية» ص: 226.

- ومع ذلك ، يبقى الفيلم محاولة جادة لقصة لطيفة ونظيفة حافلة بالقيم الأخلاقية والفنية مما يُسهم في تطور الفيلم العربي النظيف والبعيد عن مثيرات الرغبة والغرائز التي أصبحت المادة الأولى لأي فيلم تجاري .
- وفي النهاية ألقى الضوء على شخصية الكاتب من خلال مجموعة الأعمال التي قرأتها له ، فأقول :
- اعتنق الإبداع نوعاً من احتراق اللذة بالألم، فصادق نفسه، وصدق مع فنه، تابع الحالات فأبدع في الشغل على التحولات، اجتهد على تثقيف نفسه، فأفرز الاجتهاد نصوصاً ماتعة لقصص وسيناريوهات، أقل ما توصف به أنها جديدة بفكرتها، وأسلوب التعامل معها مما يحق لها أن تكون جديرة لأن تأخذ موقعها بين إبداعات كتابة السيناريو الأفضل ... بل الأرقى و الأجمل.

الناقد السوري محمد غازي تدمري القاهرة 30 مارس 2014

#### فوتومونتاج[

### المشهد (أ)

- ميدان السيدة عائشة وقت الشروق .. الساحة في منتصف الميدان.. ثم المسجد أمامها .
- جبل المقطم والطريق الذي يشقه صاعداً فيه.. لنرى السيارات تهبط منه وتصعد إليه.
  - هضبة من هضاب الجبل التي انتشرت عليها المباني السكنية والفيلات.
- شارع في منطقة هادئة .. تصطف الأشجار على جانبيه .. على ناصية الشارع سور قديم من الحجر الفرعوني يتوسطه باب بمصراعين من الحديد (الفورفورجية).
  - نسمع صوتاً مزعجاً لارتفاع باب محل.
- على كشك بمواجهة باب السور لنرى رجلاً في نهاية العقد السادس (سيد) وهو ينتهي من فتح باب الكشك .
  - يقف سيد ليلقى نظرة متفحصة على باب السور وهو ينفض يديه



### الفيلا والحديقة [

### المشهد (ب) شروق: خارجي

- حديقة متوسطة المساحة بها عدداً من أشجار الزينة .. بينما نسمع موسيقي
- يتو سط الحديقة مبنى أقرب لأن يكون منز لاً من دورين من أن يكون فيلا .. قديم الطراز توحى أحجاره ( دبش ) بأنه بنى منذ فترة طويلة .
- نلاحظ وجود شجرة كبيرة على بعد عدة خطوات من مدخل الفيلا .. كما نلاحظ وجود مساحه مربعة مزروعة بنباتات الزينة لا يفصلها عن جزع الشجرة إلا مائدة مستديرة على جانبيها مقعدان من البامبو .
- الباب في منتصف الفيلا وعن يمينه شباك صغير (شباك الطبخ) ثم باب صغير مفتوح نصف فتحة (باب المطبخ).. وعند يسار باب الفيلا يرتفع شباك إحدى الغرف (غرفة المكتب)
- أعلى الفيلا غية حمام محطمة .. يقف فوق أطراف عروقها المائلة وألواحها المهشمة عدداً من أزواج الحمام .



#### الريسبشن

### المشهد (ج)

نها، وداخك

- ريسبشن متسع ينتهي بسلم داخلي ناحية اليمين .
  - في أول جداره الأيمن طرقة تؤدي إلى المطبخ.
- الجدار الأيسر به بابان ... الأول باب غرفة المكتب والثاني باب غرفة والد عماد الذي نلاحظ وجود كرسى متحرك (طبى) مطبق ومسنود على الباب مباشرة.
- على الجدار الأيسر بين البابين نلاحظ أن أكبر الصور حجماً صورة زفاف (أستوديو) في إطار قديم مذهب لعرو سين (عماد ولبني) أسفلها مباشرة .. صورة من حفل الزفاف .. لعماد ولبني في الكوشة بينما نرى خلفهما يقف عزت (شقيق لبني الأكبر) بجوار زوجته (سناء)
- باقي الصور لعماد في مناسبات رسمية وحفلات استقبال، من بينها صورة يصافح فيها وزير الثقافة المصري بينما يمسك بيده اليسرى درعاً أو شهادة تكريم.
  - في مكان مميز بين الصور نلاحظ صورة للموسيقار فريد الأطرش.
- نسمع صوت جرس منبه .. بينما تتسلق الكاميرا درجات السلم الداخلي للفيلا .



#### $\frac{1}{2}$ غرفة النوم

بلشهد (د)

نهار : داخلی

رُ ۚ رَ اثاث غرفة نوم كاملة وطرقة تؤدي إلى حمام داخلي .

- على يسار شباك الغرفة المطلة على الحديقة نرى مائدة صغيرة (أرابسك) على جانبيها مقعدان يتناسبان مع حجمها .. نلاحظ فوق المائدة علبة شطرنج مغلقة يعلوها كتابين من القطع المتوسط تتدلى من فوقهما حبات (مسبحة عقيق) كما نلاحظ وجود عكاز يستند على المقعد ناحية اليسار وأن المقعد يلاصق طقطوقة صغيرة وضعت فوقها عدة هاتف (أرضي) .. (نلاحظ أن سماعة الهاتف مفتوحة و ساقطة على الأرض) .

- السرير في منتصف الجدار الأيمن .. نرى في الجانب الأيسر منه رجل في منتصف العقد الخامس (عماد) يغط في نومه وهو يلتف بأغطية شتوية ثقيلة يتقاسمها مع جسد نائم بجواره لا نلاحظ منه .. غير الكتلة التي يشغلها داخل الغطاء والتي توحي بأنه ينام على ظهره .

- يحرك عماد رأسه ثم يمد يده اليمني ليوقف المنبه .
- يضع يده على فمه ويتثاءب في كسل ثم يلتفت ناحية الجسد النائم بجواره.
- يمد يده اليمني أسفل الغطاء، يتحسس مكان الصدر فيه .. ثم يقول بنبرة رقيقة..

عماد: صباح الخيريا حبيبتي.

- لا ينتظر رداً .. إنما يستدير فوق فراشه حتى يلتصق بالجسد النائم أسفل الغطاء وهو يرفع يده من مكان الصدر إلى مكان الكتف ليشد الجسد نحوه ويضمه بشوق ونشوة وهو يقول

عماد : كفايه نوم بقى .. قومي خدي حمامك وانزلي اقعدي في الجنينة على ما أجهز الفطار .

- الكاميرا في ظهر عماد الذي هبط بصدره ودخل تحت الغطاء ليميل محتضناً مكان الصدر في الجسد وهو يقول بنبرة غارقة في الحب.

عماد: ولا هتعملي نفسك نايمه زي كل يوم.

- بعد ما يطبع قبلة أسفل الغطاء في مكان الرأس.

عماد: عشان أفطرك بوس.

- على رأس عماد التي مالت مرة أخرى لتغيب في قبلة طويلة .



المشهد (ه) المطبخ

- مطبخ متسع يشتمل على الأجهزة المناسبة
- الثلاجة التي نلاحظ أن العكاز قد استندعلى مقربة من بابها .. أول الجدار عند يمين باب الدخول من الفيلا .. ليصبح شباك المطبخ بين الثلاجة والباب الذي يؤدي إلى الحديقة
  - نسمع صوت احتكاك لأواني المطبخ ثم صوت عماد مرتفعاً ليقول بنبرة اعتذار.

عماد: معلش یا عمری

- يقف عماد على الحوض ليغسل عدداً من الأطباق الصيني بينما ينظر ناحية شباك المطبخ ليقول بنفس النبرة .

عماد: أصلى نسيت امبارح أغسل الأطباق

- عبر شباك المطبخ نرى الشجرة ونصف المائدة الملاصق لمقعد (1) بينما نسمع صوت عماد.

صوت عماد: عشر دقائق بالكتير والفطار يكون عندك.

- بمجرد انتهاء جملة عماد .. نسمع صوت سقوط وتحطم عدد من الأطباق الصيني.
  - ثم من المشهد القادم نسمع صوت هياج أسراب الحمام واصطدام أجنحتها.



### المشهد (و) \_\_\_\_ نهار : خارجي \_\_\_\_\_

- حطام الغية. . لنرى أسراب الحمام تتطاير بسرعة وكأن صوت تحطم الأطباق أفزعها . . فنسمع صوت أجنحتها مع صوت هديل عدة حمامات بقيت فوق حطام الغية
- يتعالى صوت أجنحة الحمام تدريجياً .. ليغطي على صوت الهديل بينما تتابع الكاميرا أسراب الحمام وهي تحلق نحو السماء.
- بعد ابتعاد أسراب الحمام وابتلاع زرقة السماء لها .. يبدأ صوت الأجنحة في التراجع .. ليحل محله صوت الهديل تدريجياً .. يبدأ ضعيفاً ثم يتصاعد.. بينما تستعرض الكاميرا السماء الملبدة بالغيوم برهة .. تهبط بعدها ببطء .. لنرى سفح الجبل والمباني المتراصة أسفله .. بينما يتعالى صوت الهديل ليصل إلى الذروة مع انتهاء هبوط الكاميرا على واجهة الفيلا.



المشهد (ی) المديقة [ الحديقة [

- عماد يخرج من باب المطبخ بخطوات متعرجة وهو يحمل على يديه صينية عليها كوبان من الحليب وباقي طعام الإفطار بينما علق عكازه في كوع يده اليسرى.
- الكاميرا خلف جذع الشجرة . . بحيث يحجب الجذع الرؤية في الكادر عن نصف المائدة الأيمن والمقعد ( 2 )
  - من العمق نرى عماداً يشرف على المائدة .
- يضع الصينية على المائدة ثم يجلس على مقعد (1) وهو يلقي نظرة هائمة على مقعد (2) ليقول بنبرة يملؤها الحب
  - عماد: أحلى فطار .. لأحلى حبيبة .
  - يمسك بكوب حليب ويضعه على طرف المائدة أمام مقعد (2) وهو يقول.
    - عماد: يلا يا عمري .. بسم الله
- على كوب الحليب نسمع موسيقى مناسبة بينما تتحرك الكاميرا ببطء نحو المقعد ( 2 ) لنفاجأ بأن المقعد فارغ .


- تستعرض الكاميرا الحديقة في حركة دائرية حتى تعود بعد اكتمال الدورة إلى المائدة.. لنرى عماداً يتناول إفطاره وهو يتجاذب أطراف حديث لا نسمعه مع المقعد الفارغ.
  - تقترب الكاميرا من جذع الشجرة بينما ترتفع الموسيقي .
  - تتسلق الكاميرا الجذع حتى تغيب بين الأغصان الخضراء المتشابكة .
    - كادر ثابت .

تتر مقدمة الفيلم

نزول الموسيقي على شريط الصوت



### كورنيش سيدي جابر[



- الكورنيش في منطقة سيدي جابر.
- البحر الممتد مثل بساط داكن الزرقة في وقت الشروق .. ثم الشاطئ لنرى الأمواج تتدافع نحوه وتصطدم بالكتل الصخرية المتراصة أمامه .
- إحدى العمارات القديمة المطلة على الكورنيش بينما نسمع صوت تحريك القرص في عدة تليفون .



#### شقة عزت (غرفتي النوم والسفرة)

#### ا<u>لشهد ( 2 )</u>

#### نهار: داخلی

- ر بباس موم جالس فوق سريره وهو يمسك بسماعة الهاتف
- ينصت فترة بعدها يغلِّف تعبير الإحباط وجهه وهو يضع السماعة بعصبية
- يلتفت عزت نحو باب غرفة النوم المفتوح على صالة ضيقة تبتلع معظمها مائدة سفرة.. لنرى من جهة نظره زوجته سناء وهي تضع بعض أطباق الطعام أمام منى (في بداية العقد الثالث) وعادل (في حدود 17 سنة)
  - يدخل عزت الكادر.. لنفاجأ بأنه قد ارتدى ملابسه
  - يجلس على مقعده بينما ترمقه سناء بنظره مستطلعة وهي تقول
    - سناء: برضو مرفوع من الخدمة.
  - يهز رأسه موافقاً وهو يعدل من هندامه .. فتقول له بقلق بالغ
    - سناء: كده الموضوع بقى يقلق بجد
    - ينظر لها بضيق .. ثم ينهض بعصبية وهو يقول لمنى

عزت: كملى فطارك وأنا مستنيكي في العربية تحت

- تنهض منى لتلتقط حقيبتها ثم تتحرك خلفه .

- تشيعه سناء بنظرة .. تجلس بعدها على أحد المقاعد وهي واجمة .. بينما نسمع صوت هدير الحمام من المشهد القادم.



#### سطح الفيلا (حطام الغية )

- المشهد ( 3 ) نهار : خارجي ﴿
- عماد أمام حطام الغية .. يضع طواجن الماء والطعام .. في أركان بين الحطام
- يتوقف لحظات.. ينظر خلالها نظرة حزينة لفرد حمام حط فوق حطام الغية .
- تدمع عيناه .. يشرد برهة بعدها ينتبه ليلقي نظرة على مقعد فارغ بمواجهة حطام الغية
  - بجوار المقعد.. على الأرض نرى جهاز تسجيل
  - على ظهر المقعد ينسدل طرف شال صوف حريمي (شتوي)
- يلتقط عماد الشال ليتأمله برهة بعينين دامعتين.. ثم يرفع يده ليلامس به خده.. ثم يقرب وجهه منه ويشم رائحته وهو مغمض العينين.
- يعيد عماد الشال إلى مكانه فوق المقعد .. على نفس الوضع الذي كان عليه قبل أن يلتقطه وبصورة تجعلنا نشعر كما لو أنه يريد أن ينفي عن نفسه تهمة تحريك الشال من موضعه .. بعدها .. يستدير ليسير عدة خطوات نحو تكعيبة من الخشب تلتف حول أركانها الأربع فيما عدا مدخلها قصاري نباتات الزينة .



### سطح الفيلا (التكعيبة)

داخل التكعيبة .. لنراها تحتوي على مكتب صغير يعلوه طقم مكتب (نلاحظ أنه يتناسب مع الفترة الزمنية) وأدوات الكتابة وبرواز مكتب لصورة ( $15 \times 20$ ).

- عند يمين المدخل .. كنبة صغيرة بمواجهة شباك يطل على سطح الفيلا وحطام الغية
  - يجلس عماد على كرسى المكتب.
- يفتح الدرج .. ليخرج ملفاً .. يضع الملف على المكتب ثم يمد يده ليتحسس غلافه .. فنلاحظ قشعريرة تنتابه وهو يغمض عينيه.
  - على أصابع عماد وهي تتماوج على عنوان الملف الذي نراه يحمل سطرين.

(آخر نساء الحب)

رواية: عماد حلمي.

- على عنوان الملف .. بينما يرتفع صوت هدير الحمام



## مقر النيابة الإدارية بالإسكندرية

المشهد ( 5 )

نهار : داخلی

(مکتب عزت)

- مقر هيئة النيابة الإدارية بالإسكندرية .
- مكتب عزت .. لنراه على مكتبه يطالع باهتمام أجندة التليفون .
  - يطلب رقماً ثم بعد لحظات ينصت فيها نسمعه يقول
- عزت: أيوه يا فندم.. صباح النور.. ممكن أكلم الأستاذ عماد حلمي ..
  - ينصت برهة بعدها يقول.

عزت: طب ما اتصلش بالجريدة طول الفترة دي .. أو بعت مع حد قصة العدد الجديد ..

- ينصت فترة بعدها يقول
- عزت: طيب شكراً.. مع السلامة
- يغلق الخط ثم يسترخي على مقعده ليقول بنبرة مهمومة وهو يغلق أجندة التليفون . عزت : هيكونو اراحوا فين بس؟!



#### الحديقة [

#### المشهد ( 6 )ك

#### نهار: خارجي

- عماد جالس على المقعد (1) .. يلقى نظرة على الأرض ..
- من جهة نظره.. نرى فرد حمام ينقر الأرض على مقربة من المائدة .
  - ينظر عماد نحو المقعد ( 2 ) ثم يقول بنبرة شكوى.

عماد: العيال اتغيروا قوي يا لبني .. كل ما فرد منهم يحط ألقاه حزين وكمشان .. شكلهم مش قادرين ينسوا اللي حصل .. مش عارفين يضحكوا على نفسهم

- بمرارة وهو ينظر نظرة غائمة

عماد: زي ما عرفت أنا .. أضحك على نفسي

- يشرد لحظة .. ثم يردف

عماد: ولا أقول لك .. بلاش من السيرة دي .. تعرفي .. أنا بدأت شغل في الرواية امبارح .. قسمت فصولها واخترت اسمها .. الاسم طلع جميل .. يليق بحكايتنا ..

- بنبرة حزينة

عماد: أو بحكايتك ..

- و هو يلقي نظرة هائمة على المقعد ( 2 )

عماد: اللي على رأي فريد ..حكاية العمر كله .

- يتأمل المقعد ( 2 ) برهة .. وكأنه ينتظر رداً .. ثم يلقي نظرة على المائدة .. ينظر بعدها للمقعد ثم يقول متسائلاً

عماد: إنتي ما بتاكليش ليه؟!

- على كوب الحليب أمام المقعد ( 2 )



### شقة الجار[

# المشهد (7)

- شقة متوسطة المستوى
- الأثاث يظهر مدى حداثته من وجود الغلاف البلا ستيكي الشفاف حول خشب المقاعد
  - غرفة النوم لنرى زوجة الجار (شابة في مقتبل العمر) على نصف السرير.
  - نصف السرير الآخر شاغر وغطاءه الشتوى مرفوع فوق الزوجة النائمة .
    - الجار (شاب في منتصف العقد الثالث) يقف أمام شباك غرفة النوم ..
      - يرفع يده اليمنى التي تمسك بسيجارة ويسحب نفساً
      - ينفث دخان السيجارة وهو ينظر باهتمام بالغ عبر الشباك.
- من جهة نظر الجار .. لنرى الحديقة .. والشـجرة والمائدة أسـفلها .. ثم عماد الذي لازال جالساً كما تركناه .
- على يد الجار .. لنراه يضرب فلتر السيجارة بطرف إبهامه لتهتز بين أصابعه فيسقط طرفها المتآكل ( الرماد ) فوق سجادة الغرفة ..
  - على رماد السيجارة



#### المشهد (8) \_\_\_\_\_\_ الحديقة [ نهار : خارجي

- نلاحظ أن أطباق الطعام قد رفعت من فوق المائدة لنرى أمام عماد فنجان قهوة وأمام مقعد ( 2 ) كوب عصير ..
  - ينظر إلى المقعد ويقول بسعادة
  - عماد : عارف إن نفسك تعرفي الاسم اللي اخترته لحكايتك
- يضع يده اليمني على المائدة وهو ينظر بهيام نحو مقعد ( 2 ) بينما نسمع موسيقي
- من جهة نظره .. نرى لبنى جالسة على مقعد ( 2 ) وهي تر تدي ثو باً وردياً فضفا ضاً و شعرها الطويل الناعم ينسدل مثل شلالاً ذهبياً على كتفيها.. بينما يقول لها بهيام
  - عماد: آخر نساء الحب.
  - على لبني التي ابتسمت ابتسامة خفيفة وهي تمد يدها نحو يده .
  - يزداد هيامه وهو يمديده اليمني ببطء ناحية يدها وهو يقول بنبرة عاشقة .

عماد :أيوه يا لبني .. إنتي آخر نساء الحب .. إنتي آخر قصة اتبقّت من قصص الحب الخالدة .. إنتي مزيج رائع فيه أجمل وأرق ما في ليلي وعبلة وجولييت

- قبل أن يلمس يدها نسمع صوت هدير الحمام
- الكاميرا في ظهر عماد لنرى كرسي (2) فارغاً ونرى كذلك يده وهي تمتد لتصطدم بكوب العصير وتسقطه على المائدة
- يفيق عماد من سكرته على صوت سقوط الكوب .. ليمسك به ثم ينهض وهو ينظر نحو المقعد ( 2 ) ويقول بنبرة اعتذار .
  - عماد: آسف جداً يا حبيتي ...
  - ثم وهو يستدير متجهاً نحو المطبخ
  - عماد : هجبيب لك كوباية عصير تانيه بسرعة .
  - على الأرض .. أسفل المائدة .. لنرى قطرات من العصير تتساقط تباعاً .



### غرفة نوم عزت[

 $\square$ (9)

ليل : داخلي

- عزت ممدداً على السرير يدخن سيجارة بينما ينصت لسناء .

سناء: أكيد خدها تقضى كام يوم في حته هادية علشان أعصابها ترتاح ..

عزت: مش ممكن .. لأني قعدت أتحايل عليها تيجي ساعة ومارضيتش تيجي معايا

سناء: طيب مش ممكن يكونوا رافعين السماعة علشان محدش يزعجهم ..

عزت: كانت طلبتني ولو مرة واحدة علشان تطمني عليها

- ثم يردف بعصبية

عزت: دا حتى عايدة مسألتش فيها هي كمان .. لدرجة إنها قلقت وخلت حسن يروح لهم الفيلا علشان تتطمن .. لكنه مالقاش حد ..

سناء: وحسن راح لهم إمتى ..

عزت: بعد ما خلص شغله في المديرية.

سناه : يعني بالليل .. مش يمكن كانوا نايمين ..

31

عزت: نايمين صاحيين مبقتش تفرق ..

سناء: ليه

عزت: لأني هسافر لهم بكرة ..

- يمد عزت يده ليطفئ السيجارة وهو يردف بتصميم

عزت: لازم أعرف فيه إيه.



#### الكشك[

المشهد ( 10 ) نيل : خارجي

- سيد يهبط على الأرض ليغلق باب الكشك بالقفل.
  - يلتفت لينظر نحو باب سور الفيلا.
- يتحرك نحو باب السور .. ثم ينظر نحو حديقة الفيلا من الداخل .
- من جهة نظر سيد .. نرى عماد وقد ارتدى روباً صوفياً فوق ملابسه وهو ينام مسنداً ظهره على كرسيه بينما تلتف حول رقبته كوفية .



### الحديقة [

#### المشهد ( 11 )

#### ليل: خارجي

- عماد .. ماداً قدميه أسفل المائدة بينما تتوسد رأسه ظهر مقعده ..
- نلاحظ أن صدر الروب مفتوح وأن الكوفية انحسرت عن رقبته بفعل و ضعه غير المريح في النوم ..
  - على وجه عماد الغافي لنراه يُحرك رقبته .. ثم يفتح عينيه ليلقى نظره أمامه .
- من جهة نظره .. نرى لبنى تميل عليه لتربط الكوفية حول رقبته ثم تضم طرفي الروب على صدره وهي تقول

لبني: كده برضو يا عماد

- يمسك عماديدها .. ليقبلها ثم يقول

عماد: معلش يا حبيبتي.. راحت عليَّ نومه

لبنى : طيب يلا نطلع قبل ما تاخد برد

- يمسك عكازه .. ثم ينظر نحوها بسعادة وهو يمد يده ناحية يدها..
  - كادر فارغ تدخله يد عماد .. ثم يد لبني لتتشابك أصابعهما .



### غرفة نوم الجار[

المشهد ( 12 ) ليل : داخلي

- الجار خلف الشباك ينظر باهتمام ..

- من جهة نظره .. عماد يدخل من باب الفيلا وحيداً مستنداً على عكازه وهو يشبك أصابع يده الأخرى على الفراغ بصورة توحي بأنه لازال يشبك أصابع يده على أصابع يد لبنى .

- من خلف الجار .. تدخل زوجته الكادر لتقف بجواره وهي تقول .

زوجة الجار: عايزه أسألك سؤال ..

الجار: إسألي ..

زوجة الجار: انتا متجوزني ولا متجوز الشباك ..

الجار: بقى ده سؤال تسأليه ..

- و هي تتركه لتنسحب من الكادر.

زوجة الجار: أصلك بتقف ورا الشباك ده .. أكثر من ما بتقعد معايا ..

35

- وهو يرفع يده ليسدل الستار على الشباك .

الجار : أصلك ما شوفتيش اللي أنا شوفته ليليتها ..

- ينسحب هو الآخر من الكادر لنسمع صوته بينما تقترب الكاميرا من الشباك الجار: لو شوفتى الليّ أنا شوفته ليلتها ..

- على ستار الشباك وقد غطى مجمل الكادر بينما نسمع صوت الجار.

صوت الجار: كنتي إنتي كمان إتجوزتي الشباك.



### فوتومونتاج

# المشهد (13)

- الحديقة .. المائدة أسفل الشجرة .. ثم الجذع صعوداً حتى تغطي فروع الشجرة المتشابكة الكادر لنرى من بينها شباك غرفة النوم ونوره ينطفئ .
- غرفة النوم .. عبر إضاءة خافته نرى عماداً نائماً في سكينة وهو يلف ذراعه الأيمن حول ما يشبه الجسد المغطى بجواره .
- مزج / غرفة نوم عزت .. لنراه يدخن بشراهة وهو شارد فوق سريره بينما تنام سناء بجواره ..
  - وجه عزت المحتد الباهت ...
- مزج / البحر المظلم .. ثم الشاطئ لنرى زبد الأمواج الأبيض وهو يتفتت فوق الصخور



# غرفة النوم[

- عماد ممدداً فوق السرير وهو مجهد الوجه.. محمر العينين.
  - يلقى نظرة حزينة على الغطاء بجواره ثم يغمض عينيه.
    - صوت جرس المنبه يجعله ينتبه
- يمد يده ليوقف رنين المنبه .. ثم يعتدل ليمد يده نحو الجسد المغطى بجواره .. ليتحسسه وهو يقول بنبرة حانية .

عماد: صباح الخيريا عمري



# غرفة نوم عزت[

# المشهد ( 15 ) \_\_\_\_\_\_ نهار : داخلي

- عزت وقد انتهى من ارتداء ملابسه.. يمد يده ليفتح باب الغرفة .

- صوت فتح الباب يوقظ سناء التي التفتت وهي تقول

سناء: صباح الخير

عزت: صباح النور

سناء: مصحتنيش ليه علشان أعملك الفطار.

- وهو يتحرك مغادراً

عزت: هبقى آكل أي حاجة في الطريق..



#### المشهد (16)\_\_\_ نهار : خارجي مر\_\_\_\_

- سيد يلتقط من زبون ورقة نقدية ..
- يضعها في الدرج ويبدأ في عد الباقي ..
- يدخل الجار الذي نراه وقد ارتدى (تريننج شتوي)
- بمجرد انتباه سيد لوجود الجاريسأله وهو يشير إشارة خفيه نحو سور الفيلا.
  - الجار: ما فيش أخباريا عم سيد
    - الذي توقف عن عد النقود.
      - سيد: ولا أهرام يا عريس ..
  - الجار : طب إديني الجمهورية وأخبار الرياضة .
  - على الزبون الذي نظر إلى استاند الجرائد باستغراب ..
- من جهة نظر الزبون .. أعداد جريدتي الأخبار والأهرام المتراصة على الاستاند .



# ]اول طريق مصر إسكندرية الصحراوي

المشهد ( 17 )

نهار : خارجي

- طريق مصر إسكندرية الصحراوي والسيارات تمر فيه من الاتجاهين .
  - الكارته .. لنرى سيارة عزت تتجاوزها في طريق الدخول إلى الجيزة .



# الحديقة[

المشهد (18)\_\_\_ نهار : خارجی

- عماد يخرج من باب الفيلا مستنداً على عكازه بيد وبالأخرى يمسك بطاجن فخاري يحتوي على حبات الفول والأرز العويجة.
- يسير حتى يصل إلى المائدة التي نلاحظ أن طعام الإفطار وضع فوقها بصوره توحي بأن عماداً تناول إفطاره بينما بقي نصيب لبني منه كما هو ..
- يسند العكاز على المائدة .. ثم ينقل الطاجن ليده الأخرى ويرفع رأسه لينظر نحو حطام غية الحمام
- من جهة نظره .. حطام الغية وسرب حمام يتطاير فوقها ثم السماء المفتوحة وقرص الشمس الذي اكتمل إشراقه .
  - يمديده في الطاجن ويلتقط حفنة من الحبوب وينثرها على الأرض.
    - أسراب الحمام تحط على أرض الحديقة لتنقر الحب .
- يفرغ ما في الطاجن على الأرض .. ثم يجلس على مقعده .. لينظر نحو المقعد (2) ويقول بنبرة مختنقة

عماد: مش عارف مالي النهاردة .. من ساعة ما صحيت وأنا حاسس إن قلبي مقبوض.

- ينظر نحو أسراب الحمام التي تزاحمت على أرض الحديقة حتى كادت أن تغطيها بريشها المتعدد الألوان .. بينما نسمعه يردف

عماد : عشان كده قلت أَلِم العيال حوالينا.

- فجأة .. نسمع صوت باب سور الفيلا ينفتح بعنف .



#### فوتومونتاج[

### $\Box$ (19) المشهد

- (لقطات بطيئة يفصل بينها المزج)
- عزت يجتاز باب السور وهو في حالة عاتية من الغضب بينما نسمع صوت أجنحة الحمام المتطاير مضخماً.
  - عماد يلتفت ناحية باب السور لتتخشب ملامحه بمجرد رؤيته لعزت ..
- أسراب الحمام تتطاير من على الأرض من أمام عزت .. الذي كلما تقدم نحو عماد احتدت ملامحه أكثر وتطاير عدد أكبر من الحمام ..
  - عماد يمسك العكاز وينهض بتثاقل ...
  - الكاميرا في أعلى نقطة لنرى حطام الغية والحمام يتطاير فوقها
- على فرد حمام فوق حطام الغية.. لنراه يحرك رأسه ناحية المائدة .. لنرى عزت من جهة نظر فرد الحمام وقد أصبح أمام عماد مباشرة.



# الحديقة [

المشهد ( 20 ) نهار : خارجي

- دون سلام .. يقول لعماد بلهجة غاضبه ثائرة .

عزت: لبني فين يا عماد ..

- يتأمله عماد برهة .. يبتلع بعدها ريقه ثم يهم بالرد لكنه يتراجع .

- يشير عزت نحو باب الفيلا ويقول بغضب

عزت: هتدخل تناديها والا أدخل لها أنا.

- بنبرة حزينة منكسرة .. وهو ينظر نحو الأرض

عماد: أختك مش جوا يا عزت.

- ينظر عزت نظره سريعة لطعام لبنى على المائدة .. ثم يتحرك نحو الفيلا وهو يقول.

عزت: يبقى أدخل لها أنا.

- يمسك عماد ذراع عزت بسرعة ليمنعه .. لكن عزت يفلت يده بعنف .. فيلقي عماد عكازه ويخطو نحوه مسرعاً حتى يمسك به .. وهو يصرخ فيه بشده

عماد: قلت لك مش جوه ..

- صارخاً في عزت

عماد: أختك مش جوه

- ثم .. بعدما لاحظ انزعاج عزت من طريقة إمساكه به .. يخفف من نبرته ويقول وهو ينظر نحو الأرض

عماد: أختك مش جوه صدقني

- ينظر لعماد باندهاش وقلق

عزت: ولما هي مش جوه .. تبقى فين ؟

- بنبرة بدت مهتزة وغير صادقة

عماد: هي مش عندك ..

عزت: عندي .. عندي فين ؟

عماد: في اسكندريه ..

عزت: مين اللّي قال لك كدة.

عماد: هي .. هي قالت إنها مسافرة لك.

عزت: الكلام ده كان إمتى ..

عماد: تاني يوم ما كنت إنتا هنا.

عزت: يعني من ست أيام ..

عماد: أيوه .. من ست أيام

- و هو يدقق النظر لعيني عماد .

عزت: إنتو زعلتوا مع بعض ..

- بنبرة حزينة وهو ينظر لطعامها فوق المائدة

عماد: إنت أكتر واحد عارف .. إن أنا ولبنى لو كنا عشنا ألف سنه مع بعض .. مكنش حد فينا هيزعل من الثاني أو حتى يمل منه

- بنبره هادئة مغلفة بالشك .

عزت: طب ليه متصلتش بيا و لا مرة علشان تكلمها أو تطمن عليها ..

- بعجاله وارتباك.

عماد: هي اللي قالت لي ماتصلش بيها.

- و هو يقترب منه .

عزت : وقالت لك كمان ترفع السماعة عشان هي كمان ماتعرفش تتصل بيك

- صارخاً في عماد

عزت: أنا كنت بتصل بيكم خمسين مره في اليوم.

- ثم وهو يخطو نحو باب الفيلا
  - عزت: هي بتعمل معايا كدة ليه ؟
- يتحرك عماد مسرعاً ليمسك به .. فيدفعه عزت دفعة قوية تجعله يسقط على الأرض مع العكاز .
- على يد العكاز لنرى أصابع عماد تلتف عليها وترفعها.. لكن قبل أن يشكل العكاز مع سطح الأرض زاوية قائمة .. يسقط مرة أخرى في (لقطة بطيئة) ومعه يد عماد بينما نسمع صوت هديل الحمام مع صوت توجع عماد .
- على عزت الذي التفت ناحية عماد.. لنراه من جهة نظره.. ساقطاً على ركبتيه وهو يلف يديه ليتحسس الجزء الأسفل من عموده الفقري ..
- يميل عليه عزت ليساعده على النهوض ثم يساعده على التحرك حتى يجلسه على المقعد (1)
- بمجرد جلوس عماد .. يهم عزت بالجلوس على مقعد ( 2 ) فيفاجأ بعماد يصرخ فه

عماد : استنا عندك

- يتخشب عزت في مكانه وهو يتابع عماد .. الذي تحامل على نفسه ونهض من فوق مقعد (1).
  - يشير عماد نحو مقعد (1) وهو يقول لعزت.

#### عماد: ممكن تتفضل هنا

- على عزت .. الذي استبد به الاندهاش وهو يجلس على مقعد (1) ثم وهو يتابع عماد الذي نراه في لقطة بطيئة يلف يده حول ظهر مقعد (2) ويجلس فوق مسنده الأيمن .. ثم و هو يميل برأسه لنرى من جهة نظره .. لبنى جالسة على مقعد (2) وهي ترفع رأسها لتلتفت ناحية اليمين.. فتلامس جبهتها و خدها الأيمن صدره ..

- على عزت الذي لازال ينظر مندهشاً نحو عماد وجلسة الغريبة على مقعد (2) بينما نسمع صوت هديل الحمام.



#### فوتومونتاج[

 $\square$ ر 21)

- على صوت الهديل الذي ارتفع بصوره مزعجة.. جعلته يبدو مثل فحيح أفاعي أو مثل عواء ذئاب جائعة .. نرى سيداً .. ممسكاً بالمقشة وهو يتظاهر بكنس الشارع أمام باب السور حتى يتمكن من اختلاس النظر إلى داخل الحديقة
- من الشارع .. نرى شباك غرفة نوم الجار .. تقترب منه الكاميرا حتى نراه في لقطة قريبة.
  - غرفة نوم الجار .. لنراه يقف خلف الشباك وينظر عبره باهتمام بالغ ..
  - من جهة نظر الجار.. حطام غية الحمام .. ثم الشجرة .. ثم المائدة أسفلها ..



# الحديقة[

المشهد ( 22 ) نهار : خارجي

- لعماد الذي لازال يجلس كما تركناه .

عزت: مش بقيت أحسن دلوقتي ..

عماد: الحمدالله

- بعد ما رفع رأسه وألقى نظرة على حطام الغية .

عزت: هما جم هدوها إمتى ..

عماد : يوم ماكنت إنتا هنا .. بعد ما مشيت بشوية

- و هو يدقق النظر لعيني عماد ..

عزت: و هي .. عملت إيه ساعتها ..

- دون أن ينظر له وبنبرة بالغة المرارة

عماد: تعبت قوى .. علشان كدة ..

- يصمت بعد ما دمعت عيناه .. فيقول له عزت باهتمام .

عزت: عشان كده إيه؟

```
- و هو يمسح عينيه ..
```

عماد: عشان كده .. مقدرتش أمنعها ..

- بنبرة منكسرة حزينة وهو يلقى نظرة على حطام الغية وشباك غرفة النوم ..

عماد: من السفر

- بعدما أرسل نظرة ناحية الفيلا

عزت: مش هتخلي أم صبري تجيب لنا حاجة نشربها.

عماد: أم صبري بطلت تيجي ..

عزت: ليه ..؟

- متهكماً

عزت : لقت لها شغلانة هي كمان في اسكندرية .

عماد : أختك اختلفت معاها قبل ما تمشي .. وطردتها .

- بنبرة اتهام .

عزت: انت معاك حد غير لبني جوة ..

- بملل وعصبية.

عماد : مفيش داعي لأننا نهين بعض يا عزت .

عزت: أنا مقصدتش أهينك .. أنا بس كنت عايز أعرف ...

- و هو يشير نحو طعام لبني على المائدة .

عزت: الفطار ده بتاع مين.

- ينظر عماد حائراً نحو طعام لبني على المائدة ولا يرد .

- ينهض عزت محتداً ليقول له .

عزت : مفيش داعي تتعب نفسك علشان تدور لي على ردود غريبة وغبية .. أنا همشي دلوقت .. وهاجي لك بكرة

- بنبرة حازمة .

عزت: وأنا كلى أمل .. إنك تقول لي لبني فين ؟

- و هو يستدير منصرفاً.

عزت: أو مين اللي معاك جوه.

- على طعام لبني فوق المائدة .



#### فوتومونتاج [

 $\Box$ (23)

- الكشك .. لنرى سيداً يخرج منه ليتحرك مسرعاً بجسده الهزيل نحو عزت الذي انطلق بسيارته دون أن ينتبه له .
  - حطام غية الحمام .. لنرى سرب حمام يتطاير فوقها ..
- سفح الجبل .. ثم ميدان السيدة عائشة .. لنرى سيارة عزت تتجه نحو وسط المدينة..
  - الحديقة لنرى عماد جالساً على مقعد (1) وهو غائم النظرات.
    - مبنى مديرية أمن القاهرة وسيارة عزت تنحرف لتركن أمامه .
      - على مدخل مبنى المديرية .



# مكتب العميد حسن

المشهد ( 24 ) نهار : داخلي

- لعزت الذي جلس ممسكاً بفنجان قهوة

العميد حسن : مش عارف أقول لك إيه .. أنتا زي ما تكون بتتكلم عن واحد غير عماد حلمي اللي أنا أعرفه .

- بعد ما وضع الفنجان على المكتب.

عزت: أنا كمان مصدوم فيه .. علشان كده جيت لك قبل ما اتصرف وأعمل حاجة تلومني عليها .

العميد حسن : وإنتا في دماغك تعمل إيه .

عزت: أقل حاجة أعمل له محضر.

العميد حسن: وهتقول إيه في المحضر..

- بنبرة أقرب للتهكم .

العميد حسن: إنه مخلكش تقعد على كرسي مراته في الجنينة ..

- و هو ينهض من على مكتبه.

العميد حسن : ولا هتقول إنه مسمحلكش تتهجم على فيلته

عزت: هقول إنه بيتستر على غياب أختى.

- و هو يجلس على كرسي أمام عزت

العميد حسن: أختك دي تبقى مراته .. ومقيمة معاه .. وهوا الإنسان الوحيد اللي عنده سلطة تحديد غيابها من عدمه .. ثم متنساش حاجة مهمة ..

- ينظر له عزت باهتمام فيردف.

العميد حسن : عماد حلمي شخصية عامة .. وأي تصرف أهوج منك .. ممكن يشوشر على اسمه .. ويخلي بينك وبينه نقطة سودة .. تبوظ علاقتكم مدى الحياة .

- بنفاذ صبر

عزت: طب قلي انتا أعمل إيه .. أنا قلبي واكلني عليها وجوايا إحساس قاطع بأن فيه حاجة حصلت لها

العميد حسن: انتا بتشك إن عماد أذاها ..

- بحسم

عزت: إطلاقاً ..

- ثم بنبرة حزينة

عزت: دا ما فيش إنسان في الدنيا حب مراته قد ما عماد حب لبني

– مؤكداً

العميد حسن: ولا فيه إنسانة في الدنيا حبت جوزها قد ما لبني حبت عماد.

- يهز رأسه موافقاً ثم يقول للعميد حسن بحيرة

عزت : لكن مش ده عماد اللي لبني حبته .. عماد اللي شوفته النهار ده إنسان تاني .. غامض .. مهزوز ..

- محاولاً التبرير

العميد حسن : يمكن عشان زيارتك فاجئته .. أو عشان الحدة اللي عاملته بيها

- بانفعال

عزت : وانتا كنت عايزني أعامله إزاي .. بعد ما دخلت عليه لقيته قاعد مرحرح وعامل عزومة فطار ..

- بعدم اقتناع

العميد حسن : بلاش من الشكوك دي .. أنا وانتا عارفين إن عماد معندوش القدرة الصحية اللي تخليه يخون لبني .. وكمان دي عمرها ما كانت أخلاقه

عزت : أُمال مشيّ أم صبري ليه .. مع إن احتياجه ليها هيكون أشد في غياب لبني ..

- بنبرة شك

العميد حسن: مش لما تكون لبني غابت

- يهم عزت بالتحدث .. لكنه يصمت عندما يجد العميد حسن يردف

العميد حسن: هو قال لك أم صبري مشيت ليه

عزت: لأن لبني طردتها

- بغيظ

عزت: قال في كده بعنين مليانين كدب .. لبنى كانت بتحب الست دي وبتعطف عليها .. لدرجة إنها جابتني من ا سكندرية مخصوص علشان أوديها تزورها في بيتها .. لما كانت عيانة.

العميد حسن: وعماد ماوداهاش ليه.

عزت: لأنها ساكنة في منطقة عشوائية .. والعربية ما بتوصلش لبيتها.. فخافت إن عماد يتعب لو راح معاها المشوار ده ..

العميد حسن: يعني إنتا تعرف بيت الست دي

عزت: الكلام ده كان من سبع تمن سنين .. والمنطقة هناك زحمة والشوارع شبه بعضها ..

- بعد ما فكر برهة

العميد حسن: لكن لو تعبت نفسك شوية ممكن ..

- ينهض متحمساً ليقول مقاطعاً.

عزت: أيوه ممكن.



#### فوتومونتاج[

 $\square$ ر 25)

- منطقة شعبية في (مساكن الزلزال بالمقطم) لنرى سيارة عزت تركن أمام إحدى النواصى .
- عزت يتجول على قدميه بين المباني وهو يستطلع مداخل البلوكات على الجانبين
- الفيلا .. الشجرة والمائدة أسفلها .. لنرى عماداً جالساً وهو شارداً على مقعد ( 1 ) .
  - سوبر ماركت على ناصية شارع .. لنرى عزت يحادث رجلاً .
- مزج / محل أدوات منزلية في شارع جانبي .. لنرى عزت يخرج منه متجهاً نحو جهة أشار إليها رجل آخر .
- الحديقة .. لنرى عماداً يزيح ما فوق المائدة بيده ليسقطه على الأرض ثم يمسك بالعكاز وينهض بعصبية
- غرفة النوم .. يدخل عماد .. يتحرك نحو السرير حتى يصبح أمام الجسد المغطى .. ثم يترك العكاز ليسقط من يده على الأرض .



## غرفة النوم

# المشهد (26)

- عماد يضع رأسه على مكان الصدر في الجسد المغطى وهو يبكي بحرقة.
  - الكاميرا تستعرض الغطاء .. ثم العكاز الساقط على الأرض .
- يحتضن عماد مكان الصدر بشدة .. بينما نسمع صوته في مونولوج داخلي
  - عماد: أقول لهم إيه يا لبني .. أقول لهم إيه ..
    - على وجهه الذي بلله الدمع
  - عماد: وإذا لقيت حاجة أقولها .. مين هيصدقني .. ؟
    - يعتدل ثم ينهض متحركاً ناحية العكاز.
      - عماد: مين ؟
- يلتقط العكاز .. ثم ينهض بتثاقل ليسير ناحية باب الغرفة بينما تقترب الكاميرا من الغطاء .. بينما نسمع صوته مردفاً
  - صوت عماد: من الأول كنت عارف إن ده هيحصل



# سطح الفيلا

المشهد (27)

- حطام الغية .. لنرى من جهة نظر عماد أسراب الحمام تتطاير فوقها بينما نسمع صوته (طوال المشهد) وكأنه لسان حال الصورة .

صوت عماد: من الأول كنت عارف إن العالم أضيق من حلمك. .

- يتحرك نحو التكعيبة بعدما ألقى نظرة على المقعد والشال وجهاز التسجيل

صوت عماد: من الأول .. كنت متأكد .. إن كل اللي حوالينا أقل من إنهم يقدروا قيمة اللي اخترناه .. أو .. اللي انتي اخترتيه ..

- يفتح باب التكعيبة .

صوت عماد: وإنهم هيحرموني من إني أحقق لك أمنيتك.

- يدخل .. ليجلس على كرسى المكتب .

صوت عماد : عشان كده ..

- يلقي نظرة على الملف ..

صوت عماد: هحاول بسرعة أكتب الحكاية ..

- بنبرة تحدي وهو يمديده نحو الملف.

صوت عماد: هكتبها.

- يفتح الملف

- يمسك بالقلم

- علي أول صفحة في الملف .. في منتصف أول سطر .. نراه ير سم قو سين ثم يضع بين القوسين رقم واحد .. بينما نسمع صوته مسترسلا

صوت عماد: قبل ما يحصل شيء يحرمني أنا كمان ..

- في السطر التالي .. يكتب أسفل القوسين

(صيف 1990).. بينما نسمع صوته

صوت عماد : من إني أحقق .. أمنيتي الأخيرة

- يضع القلم على أول السطر الثالث بينما نرى إظلاماً تدريجياً للكادر .. يصاحبه صوت فريد الأطرش من المشهد القادم مغنياً

صوت فريد

حكاية غرامي حكاية طويلة .....

بدايتها ذكرى الليالي الأليمة

وحرماني منها.....



### فوتومونتاج[

 $\square$ ر (28)

- على صوت فريد .. تستعرض الكاميرا الشارع والحديقة والفيلا .. ثم من خلال المزج.. نلاحظ تأثير خصم 17 سنة من عمر المكان (الأشجار على جانبي الشارع .. أعمدة الإنارة . الرصيف .. إلخ) .. بينما يستمر معنا طوال المشهد صوت فريد الأطرش مغنياً..

صوت فريد: ما بين يوم وليلة

ماليش يد فيها ..

ماليش فيها حيلة ..

كتبها زماني عليا .....

- لا نرى كشك الجرائد .. بينما نرى السور مبنياً ببلوكات الطوب الأحمر ومكان البوابة لا يوجد غير عمودين من الخرسانة المسلحة .. بينهما براح يشغل أكثر من نصفه سيارة مرسيدس 200 مركونة بالطول
- لا نرى في الحديقة غير الشـجرة الكبيرة و عند يسـار باب الفيلا .. تكعيبة عنب أسفلها زوج من الدكك البلدي بينهما مائدة عريضة كموائد السفرة .
- أعلا الفيلا لا نرى غية الحمام .. وإنما مجرد ( بفت ) أو ( سلاكه ) في حدود 2×3 م 2.

- محتويات الريسبشن تغيرت .. لا صور على الجدار الأيسر غير برواز كبير مذهب لصورة الفاتحة .. كما نلاحظ أن السلم الداخلي من الخشب المتهالك والجدران دهنت بطلاء غامق كئيب وأن الجو العام للمكان ينم عن قدر كبير من الإهمال (أعداد من الجرائد والمجلات ملقاة على المقاعد وكومة في حدود متر مربع من الكتب - قطع متوسط - على يسار باب غرفة المكتب .

- يتراجع صوت فريد ليحل محله صوت عماد .

صوت عماد: على صوت فريد .. كنت أنام كل ليلة .. لأستيقظ مع بداية كل صباح .. على صوته الناهر المحتد .

صوت والدعماد: انتا يا زفت .. انتا يا زفت يالي اسمك عماد



# المشهد ( 29 ) \_\_\_\_ غرفة المكتب \_\_\_\_ غرفة المكتب \_\_\_\_ نهار : داخلي \_\_\_\_ \_\_\_

- والد عماد (على مشارف العقد الثامن .. ضامر الجسد، يبدو عصبياً وحاد الطباع ) يخرج من باب غرفته وهو يدفع عجلات مقعده المتحرك ..
- يدخل غرفة المكتب لنراها تحتوي بجانب السرير على مكتب ومكتبة صغيرة يرتص فيها عدد من الكتب ..
- نلاحظ وجود صورة لامرأة في بداية العقد الخامس عليها شريط أسود (والدة عماد) وصورة أخرى لأفراد الأسرة .. (الوالد والأم التي تحمل على ذراعها طفلاً رضيعاً (عماد) بين ثلاث فتيات يافعات تتراوح أعمارهن بين نهايات العقد الثاني ومنتصف العقد الثالث)
- نلاحظ على المكتب صورة صغيرة في برواز لفريد الأطرش وهو يمسك بالعود بجوار جهاز تسجيل ( وُوكمن )
- يدخل الوالد الغرفة .. يصل إلى السرير .. يمد يده ويدفع عماداً من كتفه ليوقظه وهو يصرخ فيه .

والدعماد: قوم ياهباب الطين إنتا .. رد على الهباب اللي عمال يرن

- ينهض عماد مفزوعاً ليقول لوالده وهو يرفع السماعة
  - عماد: هو انت كله عندك هباب.
    - متحدثاً عبر الهاتف.
      - عماد: إيوه مين معايا
      - صارخاً في عماد .
  - والدعماد: قول لها متتصلش هنا تاني
  - مستجيباً في ديناميكية وهو يمسح عينيه .
    - عماد: متتصليش هنا تاني
    - بعدما أعطى ظهره لوالده .. هامساً
    - عماد : اتصلى بيا في الجورنال بعد ساعتين
      - يغلق الخط ثم يلتفت لوالده قائلاً
        - عماد: صباح الخير.
          - بحده
        - والدعماد: صباح الهباب
        - يبتسم ثم يميل ليقبل رأسه

عماد: هباب تاني ..

- يخرج من الغرفة وهو يقول.

: هاروح أعملك الفطار بسرعة

- وهو يدفع عجلات مقعده ليسير خلفه

والد عماد : هوا إنتا لو بني آدم .. وراعيت ربنا فيا وفي نفسك .. مش كان زمانك دلوقتي متهبب متجوز .

- يغيب عماد في المطبخ بينما يردف والده

والدعماد: على الأقل الواحد لما يصحى يلاقى شوب شاي بحليب يطفحه.

- من المطبخ نسمع صوت عماد

صوت عماد: مهو دا اللي معقدني من الجواز ومكرهني فيه

- صارخاً بنبرة مستفزة

صوت عماد: أتجوز .. علشان إنتا تشرب شاي بحليب؟؟



سطح الفيلا

المشهد ( 30 ) نهار : خارجي

- عماد يضع الماء والطعام للحمام في السلاكة .. وهو ينصت لوالده الذي أردف بعلو صوته

والدعماد: كل كام يوم تتطلع لي ببنت جديدة.. إي شي نهى وإي شي سامية وإي شي فيتامين ..

- بعد ما ابتسم ابتسامة عريضة.

عماد: نيرمين .. ميت مرة أقولك اسمها نيرمين .

- فرد حمام يطير من فوق السلاكة .. تتابعه الكاميرا لتستعرض باقي سطح الفيلا .. فنلاحظ عدم وجود التكعيبة بينما نسمع صوت الوالد .

صوت والد عماد: نيرمين هباب مهبب بطين مش ده الموضوع .. الموضوع إني كل يوم أصحى من النوم على تررررن تررررن .. وحسي يتنبح في قولة ألو .. وفي الآخر تتقفل السكة في وشي ..

- وهو يمسك بفرد حمام

عماد: فاكر ليلي يا حاج ؟

- بنبرة إطراء.

صوت والد عماد: أيوه فاكرها.. مش دي البنت اللي صوتها فيه بحة نجاة

عماد: أيوه .. الله ينور عليك

صوت والدعماد: دي بنت زي العسل .. حنينة وجدعة

- وهو يتفحص أجنحة فرد الحمام

عماد : وكانت بتاخد وتدي معاك في الكلام بالربع ساعة

صوت والدعماد: وبالساعة .. صحيح .. هي بطلت تتصل ليه ..؟

- وهو يتحرك نحو بئر السلم .. وبنفس النبرة العالية المستفزة

عماد : لأنى لما لقيتها اندمجت معاك .. قطعت علاقتي بيها ..

- وهو يطلق فرد الحمام من يده .

عماد: شطبت اسمها من قايمة معجباتي

- على فرد الحمام المحلق



## غرفة المكتب وتكعيبة العنب

المشهد (31)

- غرفة المكتب ..عماد يرتدي ملابسه وهو مستغرق في الضحك بينما نسمع .

صوت والد عماد: قايمة إيه و قاعدة إيه يا تافه .. إنت هتعمل لي فيها يوسف السباعي ..

- من شباك غرفة المكتب نرى تكعيبة العنب .. ونرى الوالد الذي جلس فوق مقعده المتحرك أمام المائدة التي وضع عليها طعام الإفطار وطبق فاكهة .

- يعلو صوته في حدة

والد عماد: أُمال لو مكنتش أديب فاشل .. والرواية اللي ربنا نفخ في صورتك وطبعتها .. محدش قراها غير أنا وصبري ابن أم صبري الشغالة ..

- ينظر من الشباك ليقول له بجدية .

عماد : برضو هحرمك من أصوات معجباتي .

- يتوقف عن تناول الطعام ليقول له بغيظ.

والد عماد : وأنا بعون الله لما ترجع من ا سكندرية .. هتلاقيني ولعت في كوم الزبالة اللي قدام باب أوضتك .

- وهو يضع متعلقاته في الحقيبة
- عماد : أنا واثق إن قلبك مش هيطاوعك تولع في أحفادك
  - الذي عاد لتناول طعامه

والد عماد: أنا مش هعمل كده علشان قلب وأحفاد وهباب .. لكن عشان ده مش حل .. لأن بعد كام يوم .. هتيجي عربية شركة التوزيع وهي شايلة سبعميت تمنوميت حفيد مرتجع .

- يدخل عماد الكادر فيقول له بشماتة
- والدعماد: دي روايتك يا فاشل .. حققت الرقم القياسي في المرتجع
  - وهو يزيح طبق الأوملت من أمامه
    - : وبعدين أنا مش عارف أفطر . .
      - يصرخ في عماد .
    - : كذا مرة أقول لك متكترش الملح
    - عماد: بلاش من الحركات دي ..
      - وهو يبتسم.
      - : لأني نسيت أساساً أحط ملح

- يرفع صوته موبخاً عماد
- : وكمان بتعمل لي الأكل من غير ملح يا ......
- يميل على رأس والده ويقبلها وهو يقول له مقاطعاً.
- عماد : على الظهر بالكتير فاطمة هتكون هنا .. وهتقضى معاك خميس وجمعة
  - وهو يربت على كتف والده وكأنه يداعب طفلاً صغيراً
    - : عارف .. لو لا كده .. والله ماكنت سافرت وسيبتك ..
      - وهو يشير للميدالية في يدعماد.
      - والد عماد: الميدالية دى جديدة ..
      - عماد: لا .. دى معايا من يجى سنة
        - بنبرة زهو
      - : جابتهالي واحدة من معجباتي هدية
      - يمديده نحو عماد وهو يقول مادحاً
        - والدعماد: الله .. وريهالي كده ..

- يضع عماد الميدالية في يد والده.. ليفاجئ به يضعها في جيبه بسرعة ثم يقول له شامتاً

والد عماد : قضيها مواصلات بقى يا أبو معجبات يا فاشل .. لأني هخلي محمود ابن أختك يفسحني بالعربية .



#### فوتومونتاج[

 $\square$ ر 32) الشهد

- تستعرض الكاميرا التكعيبة .. لنرى أوراق العنب التي بدت كقلوب خضراء والعناقيد التي لا زالت حُصْرُماً.. فبدت حباتها كحبات المسبحة الكهرمان.. بينما نسمع صوت عماد طوال المشهد

صوت عماد : كان طفلاً في السبعين .. أو .. كهلاً في السابعة من عمره .. كان يتلذذ بمشاكستي وكنت أشجعه ..

- الشارع أمام الفيلا .

: وأوسع له في المجال .. لأنني كنت أدرك أن ذلك يكسر رتابة وجمود حياتنا معاً .

- على سيارة عماد .

: بعدما أقُعد عن الحركة منذ عدة سنوات .

- تستدير الكاميرا حول السيارة بداية من ظهرها لنكتشف أن العجلتين الخلفيتين أصبحتا على الأرض

: وبرغم إشفاقي البالغ عليه .. كنت أتبادل معه الضربات . .

- العجلة الأمامية ناحية اليسار لنراها على الأرض.

- : ضربة بضربة .. ومقلب بمقلب
- العجلة الأمامية ناحية اليمين لنري يد عماد تضغط على البلف.
  - : لا لشيء سوى .. أن أجعله يستمتع أكثر باللعبة .
- عماد في تاكسي يتحرك في عدد من الشوارع الرئيسية في المنطقة بين السيدة عائشة ومدينة نصر .
  - : شخص آخر كان يربطني به صراع .. شبه يومي ..
  - بعد ما توقف التاكسي أمام مبنى متواضع من دور واحد .
    - : يوسف ..
    - على لافتة فوق باب المبني (جريدة صوت مصر).
      - : زميل الدراسة والعمل ..



### الجريدة[

- غرفة واسعة بها ثلاثة مكاتب صغيرة ومائدة اجتماعات
  - يوسف على المكتب الرئيسي منهمك في الكتابة ..
- يدخل عماد.. بينما يو سف يتأمله وهو يشير نحو الحقيبة على كتفه ويقول مازحاً

يوسف : انت كتبت للعدد ده شاهنامة جديدة و لا إيه ؟

- وهو يضع الملف على المكتب أمام يوسف.

عماد: القصة في الدوسيه.. ابقى راجعها انتا بنفسك بعد ما ترجع من الجمع .. عشان الأخطاء بتاعة القصة اللي فاتت متتكررش

يوسف: وإنتا ما تراجعهاش ليه .؟

- وهو يستدير منصرفاً

عماد: لأني مسافر.

- وهو يعود للكتابة

يوسف: وأنا مش هقدر .. لأني مش عايز حاجة تخرجني من جو التحقيق ده .

- يعود ليقول له بحدة .

عماد : جو إيه يا بتاع الفراخ الفاسدة وأتوبيسات النقل العام .

- وهو يسحب الأوراق من أمام يوسف

عماد: إنتا هتعمل لي فيها شاعر ..

- بعدما طالع عنوان التحقيق

عماد: الفقر وحرمات الموتى .. مذكرات شاب مصرى .. يحيا في قبر .

- يقول ليوسف باستغراب

عماد: بقى ده الجو اللي مش عايز تخرج منه .. علشان تقرا قصة حب .

- وهو يشير نحو ملف عماد

يوسف: إنت بتسمي ده حب

- وهو يشير نحو نفس الملف

عماد: إن مكنش ده الحب ..

- يرن جرس الهاتف . . فيشير عماد نحو الهاتف ويقول بثقة

عماد: وده الحب..

- وهو يميل على مكتب يوسف

: يبقى إيه الحب ..؟

- ينظر يوسف نحو الهاتف مستخفاً ثم يقول لعماد دون أن ينظر إليه

يوسف: طيب رد عشان أنا مش ناقص دوشة

عماد: وأنا كمان مش ناقص حب .. عشان كده رد إنتا عليها .. وقول لها إن أنا مش موجود

- يلتقط يوسف السماعة.. بينما يتابعه عماد بنظرات تنضح بالثقة والغرور

يوسف: ألو .. صباح النوريا فندم .. لا يا فندم مش موجود .. العفو .. مع السلامة .

- يضع يوسف السماعة ويلتفت نحو عماد

يوسف : الحب حاجة تانية خالص .. حاجة أغلى وأسمى بكتير من ..

- وهو يشير نحو الهاتف

: ده ..

- وهو يشير نحو ملف عماد

: وده

- يشير نحو ملف يوسف ويقول ساخراً

عماد: يبقى الحب بقى شوية الورق اللّي قدامك دول .. اللي بتفوح منهم ريحة العناء والعرق وتراب المقابر ..

- الذي بدأ ينحى هدوءه جانباً

يوسف: أيوه .. هو ده الحب يا عماد .. الحب الحقيقي اللي إنتا رافض تستوعبه من زمان

عماد: من أيام الجامعة مثلاً ..

يوسف: مثلا .. أيام ما كان الحب بالنسبة لك مش أكتر من حاجتين .. أما قصة قصيرة بتعلقها في مجلة الحائط أو بنت حلوة بتعلقها من مدرج الكلية .. أو من كافتيريا الجامعة .. مجرد مشاعر تافهة رخيصة .. هتتأكد من مدى تفاهتها ورخصها لما ربنا يوفقك وتلاقى الحب الحقيقى

يقول ليوسف بنبرة بدت أقل حدة وأكثر عمقاً

عماد : والحب الحقيقي هلقاه امتى يا يوسف .. لما أطلع في المظاهرات زي ما كنت إنتا بتعمل أيام الجامعة ولا لما اكتب تحقيقات عن الفساد والجوع . يوسف: الحب الحقيقي هتلقاه .. لما تلاقي الإنسانة اللي تخليك تحس بالمسئولية تجاه كل شيء في بلدك ..

- وهو ينهض ليواجهه

يو سف : لما تحس أنك عايز تسفلت لها كل شارع ممكن تمشي فيه وتنضف لها كل شوية هوا ممكن تتنفسهم ..

- وهو يربت على كتف عماد بحب

: باختصار ياصاحبي .. هتلاقي الحب الحقيقي لما تلاقي الإنسانة اللي تخليك تعرف تحب مصر ..

- على عماد الذي أطرق متفكراً .. بينما نسمع صوته من المشهد القادم

صوت عماد: كان يوسف على حق



## المشهد ( 34 )\_\_\_ القطار[ نهار: داخلي المسلمان القطار [ ]

- على مقعده داخل القطار المتجه إلى الإسكندرية.. ينظر شارداً نحو الصحراء المترامية .. بينما نسمع صوته

صوت عماد: فأنا لم أذق بعد طعم الحب الحقيقي .. ليس لأني عزفت عنه ..

- يزفر بضيق.

: لكن لأني لم ألقاه ..

تقترب الكاميرا من وجهه ..بينما نسمع صوته مردفاً

: على الرغم من أنني .. بحثت كثير عنه .



#### جامعة القاهرة[

الشهد (35)

نهار : خارجی

- على مقربة من الباب الرئيسي.. وهو يسير بجوار فتاة (1)

عماد: وحشتيني

فتاة (1): وإنتا كمان

عماد: أنا كمان إيه ؟

فتاة (1): وحشتني

عماد: قد أيه؟

فتاة (1): مش عارفه قد إيه .. لكن عارفه ومتأكدة من حاجة أهم

عماد: إيه هيا ؟

فتاة (1): إني مش قادرة أتخيل أبداً .. إن ممكن يوم يعدي عليا من غير ما أ شوفك

. .

- يقف أمامها .. يتأملها بسعادة ثم يقول بنبرة منتشية

عماد : بتحبي فريد يا نهى ؟

فتاة (1): هو فيه حد في الدنيا مبيحبش فريد.

عماد : : طيب إيه أكتر حاجة بتحبيها له

فتاة (1) : رصيف نمرة خمسة .. الفتوة .. جعلوني مجرماً والمسلسل اللي ..

- يكتسي وجه عماد بالإحباط .. بينما نسمع من المشهد القادم

صوت فتاة (2): عارف إنت عيبك إيه



#### مدخل الجريدة ل

المشهد ( 36 )\_\_\_\_ ليل : داخلي

- على مقربة من باب الجريدة يقف مع فتاة (2) التي بدت منفعلة وهي تقول له

فتاة (2) : إن نموك العاطفي وقف عند مرحلة معينة .. مرحلة كان الخيال فيها سيد الموقف .. والرومانسية كانت متاحة وسهلة زي فنجان قهوة ..

عماد: حتى تشبيهاتك افتقدت جمالها

فتاة (2): وفيه حاجات تانية كتيرة.. هتكتشفها مع الوقت.. وده لأنك حبيت فيا نير مين الشاعرة مش نير مين الإنسانة

عماد: ويا ترى العيب في شاعريتك ولا في إنسانيتك

فتاة (2): العيب فيك إنتا

عماد: فيا أنا ؟

فتاة (2): أيوه.. لأنك مش بتدور على إنسانة تحبك قد ما بتدور على أغنية بتحبها لفر يد

عماد: لكني حبيتك بجد

فتاة (2): حبيت نيرمين اللّي عاشــت في خيالك وكتبت فيها قصــة (امرأة من عطر ونغم)..

- بعصبية

: لكن نيرمين اللّي عايشــه على أرض الواقع.. نيرمين اللّي من لحم ودم.. معرفتش تفهمها..

- وهي تستدير منصرفة

:ومعرفتش تحبها

- يقف عماد محبطاً وهو يتابع انصراف فتاة (2) بينما نسمع من المشهد القادم صوت فتاة (3)

صوت فتاة (3): : أيوه خرجت معاه إمبارح وعلاقتي بيه مش هقطعها ..



#### ريسبشن شقة[

الشهد (37)

- نلاحظ في عمق الكادر صورة كبيرة (بانر) لفتاة (3) وهي ترتدي بذلة رقص شرقي .
- تضع ساقاً فوق ساق وهي ترتدي الروب فوق قميص النوم.. ترتفع حدتها وهي تردف

فتاة (3): قصصك ورواياتك مش هتدفع لي قسط العربية ولا إيجار الشقة اللي أنا عايشه فيها ..

- وهي تسحب سيجارة من علبة فوق مائدة بجوارها
  - : وبعدين أنا فنانه و لازم تبقى لي علاقات.
    - يقول لها وهو يرمقها بنظرة احتقار
    - عماد: أنا بندم لأني نزلت لمستواكي.

فتاة (3): وأنا بندم لأني طلعت لمستواك .. علشان كده .. هقولها لك .. وعلى طريقة فريد اللّي مصدعني بيه بقالك سنتين .. إياك من حبي

- وهي تشير نحو باب الشقة
  - : إياك من حبي يا عماد
- من المشهد القادم نسمع موسيقي مقدمة أغنية (إياك من حبي)



# المشهد (38)\_\_\_ القطار

- (عودة من الفلاش باك)

- على عماد الذي اقشعر جسده .. وهو يسند رأسه على ظهر مقعده.. وكأنه يندم .. أو.. يشمئز من التجارب العاطفية الكتيرة التي مربها .. بينما نسمع من المشهد القادم صوت الكورال

صوت الكورال: إياك من حبي .. إياك



#### الشاليه[

المشهد ( 39) نيل: خارجي

- مقعدان من مقاعد الشاطئ بينهما مائدة صغيرة ..
- عماد يجلس على مقعده وهو ينصت لصوت فريد (تكملة أغنية إياك من حبي) من جهاز تسجيل فوق المائدة
- يدخل خال عماد الكادر ( في منتصف العقد الخامس ) ليجلس بجواره ويقول بمجرد جلوسه
  - الخال: أبوك اتصل وإنتا نايم.
    - بعد ما ابتسم .

عماد : قال لك حاجه .

الخال: موضوع الأربع عجلات

عماد: أحسن .. يستاهل ..

الخال : دانتا اللي تستاهل اللي هيعمله فيك .. قال لي إنك على ما ترجع هيكون باع العربية .

- يضحك الخال ثم يقول

: علشان تقضيها مو صلات بقية عمرك .. المهم .. إقفل التسجيل علشان عايزك في كلمتين .

- يغلق عماد التسجيل

عماد: خيريا خالي ..

الخال: بص يا بني.. إنتا مبقتش صغير.. وأبوك راجل كبير واجواز إخواتك البنات كلهم مش جدعان.. هتفضلوا عايشين لحد إمتى من غير ست .. إنتا متعبتش .. م .....

- نسمع أثناء حديث الخال وكخلفية لصوته صوت فريد مغنياً المقطع الأول من قصيدة (عش إنت).. كما نلاحظ اندهاش عماد وتفتيشه بنظرات زائغة لاهثة عن مصدر الصوت.. بصورة جعلت خاله يسأله

الخال: إنتا معايا يا بني ؟

عماد : لا يا خالي.. أنا مش معاك.. ومش هبقى معاك غير لما أعرف صوت فريد جاي من فين

الخال : ليه يا بني . . هي أغاني فريد بقت من الممنوعات

- ينهض عماد ويتلفت مفتشاً

عماد: لا يا خالي.. بس أصل المرة دي إحسا سي بصوت فريد مختلف.. أول مرة أحس إنه بيغني لي لايف.. زي ما يكون بقه في ودني

- يضحك الخال بشدة.. ثم يشير ناحية الشاليه المجاور ويقول

الخال: لا.. إطمن.. بُق فريد مش في ودنك والصوت جاي من هناك.. من الشاليه اللي جنبنا.. أصل صاحبه الجديديا سيدي عنده أخت.. مجنونة زيك يافريد.

- يميل عماد ليخرج الشريط من التسجيل.. ثم يمد يده في حقيبته (الهاندباج) وينتقي شريطاً يضعه في التسجيل ثم يضغط على ذر التشغيل .. فنسمع موسيقى مقدمة أغنية (يا شمس قلبي وضله)



#### فوتومونتاج[

#### المشهد ( 40)

- على موسيقى مقدمة الأغنية نرى عماداً وهو يسير في عدة لقطات ومن زوايا مختلفة على شاطئ البحر.
- مع بداية الغناء .. يستدير معطياً ظهره للبحر . لينظر باهتمام ناحية الشاليه المجاور .
  - يلقي نظرة هائمة .. ثم يتحرك ..
- غرفة عماد بالشاليه .. لنراه نائم على سريره وهو شارد ..ومع بداية غناء أول مقطع (طالت عليا الليالي) . . يعتدل جالساً فوق السرير . .
  - على الموسيقى التي تلي المذهب .. نراه ينهض .. ليتحرك ناحية حقيبته



#### غرفة لبنى في الشاليه المجاور

#### المشهد ( 41) ليل : داخلي

- على وجه لبني.. لنكتشف كم كان جمالها بريئاً وطازجاً في مرحلة الشباب..
- تجلس على كرسي بجوار شباك غرفتها المفتوح من خلف ستار وردي شفاف .. وهي تنصت بهيام للموسيقي التي تأتي من شباك غرفة عماد ..
  - نسمع على وجه لبنى صوت إغلاق التسجيل.
- تلتفت في (لقطة بطيئة) ناحية الشباك .. فتهتز خصلات شعرها الناعم وهي تلقى نظرة محبطة .. كما لو كانت قد استيقظت عنوة من حلم جميل .
  - تفكر برهة .. بعدها تنهض لتسير ناحية مكتبة صغيرة بجوار سريرها .
- نلاحظ في صدارة المكتبة وجود جهاز التسجيل الذي رأيناه على الأرض بجوار المقعد أمام حطام الغية في المشهد ( 3 ) ..
  - تفتح لبني أحد الأدراج .. لنرى بداخله عدداً كبيراً من شرائط أغاني فريد
- تنتقي لبنى شريطاً وتتفحص غلافه .. فنراه من جهة نظرها يحمل عنوان (أول همسة ) .. ثم تتحرك ناحية جهاز التسجيل .



#### غرفة عماد في الشاليه

#### $\Box$ (42) الشهد

- عماد يلقي عدداً من الأشرطة داخل الحقيبة ليحتفظ بشريط في يده
- يضع الشريط في باب التسجيل .. ويهم بالضغط على ذر التشغيل ..
- تتخشب يد عماد قبل أن تضغط على الزر بمجرد سماعه من الشاليه المجاور موسيقى مقدمة أغنية (أول همسة).
- ينظر باستغراب للتسجيل .. وكأنه يريد أن يتأكد من أن ذر التشغيل لم يتم الضغط عليه.. ثم يمديده ويفتح باب التسجيل ويخرج الشريط ..
  - يرفع الشريط أمام وجهه لنراه من جهة نظره يحمل عنوان ( أول همسة )
- يضع الشريط بجوار التسجيل .. ثم يسير كالمسحور ناحية شباك الغرفة المغلق
  - يزيح الستار .. ثم يمديده ليدير أُكرة الشباك
- تأبى أُكرة الشباك أن تتحرك .. فيستعين بيده الأخرى ويقوم بعدة محاولات لفتح الشباك فيفشل بينما نسمع موسيقي الأغنية.

-

- يقف برهة ليلتقط أنفاسه وهو ينظر للشباك بينما ينصت لموسيقى مقدمة الأغنية .

- يرفع يديه ويمسك أكرة الشباك ويشدها بعنف .. عدة مرات.. بينما نلاحظ على وجهه ملامح التحدي والإصرار .. وكأن شوقه وتصميمه على فتح الشباك .. ينبع من إحساسه بأن شيئاً داخله يو شك أن ينفتح .. أو بمعنى أدق .. يتفتح .. هذا الشيء هو قلبه الذي ظل طوال سنوات عمره الماضية محكم الإغلاق في وجه الحب الحقيقي .. كشباك غرفته

- مع انتهاء المو سيقى وبداية الغناء .. ينجح عماد في فتح الشباك لنرى من جهة نظره .. لبنى وهي تقف خلف ستار شباكها الشفاف.. لتبدو مثل ملاكاً تحجبه الغيوم.. بينما نسمع صوت فريد مغنياً

صوت فريد: زى النهاردة كان حبك



#### فوتومونتاج[

#### المشهد ( 43)

- لقطه بطيئة للبني وهي ترفع يدها لتزيح الستار بينما نسمع.

صوت فريد: يوم ما عاهدتك أصون ودك.

- على عماد الذي أخذ يتأملها بهيام وسعادة وكأنه فوجئ بقدر الجمال الذي تتمتع به.. بينما نسمع صوت فريد وكأنه لسان حال عماد

صوت فريد: وحلفت لك إني بحبك

- على لبني وكأنها تشترك معه في القسم

صوت فريد: بحبك

- على عماد وكأنه يؤكد قسمه.

صوت فريد: وكان يميني . .

- على لبنى التي أطرقت في حياء وكأن القبلة قد طبعت على خدها بالفعل بينما نسمع

\_

صوت فريد: فوق خدك

- عدة لقطات يفصل بينها المزج .. للبنى وعماد وهما يتبادلان نظرات الهيام والحب بينما نسمع

صوت فريد: كان أحلى همسة .. لأحلى وردة .. فاكرها لسة .. زي النهاردة .. زي النهارده

- آخر لقطات المزج للبني وهي ترفع يديها لتغلق الستار .. ثم الشباك



#### عُرفة عماد في الشاليه

#### الشهد ( 44 ) \_\_

#### ليل : داخلي

- عماد يتجول في أرجاء الحجرة وهو يرسل نظراته نحو الشباك بينما نسمع صوته

صوت عماد: وبعد ما غربت كالشمس قبيل ليلة شتوية .. ظللت فترة أُمَّني نفسي بأن أراها تشرق من جديد ..

- ينظر نحو السرير .
- : حتى تخيلت أنها قد نامت
  - يتحرك نحو السرير.
- : فسعيت إلى الفراش وأنا أشعر بسعادة طاغية
  - ينام على جانبه .
  - : لم أجد مبرراً لها غير أني ..
  - يسحب وسادة ليضمها إلى صدره .
  - : شعرت بأن طيفها .. سيقاسمني الفراش ..

صوت عماد: وعندما استيقظت ..

- السرير لنرى عماد نائماً على ظهره .. وهو يمد يده ليتحسس بجواره حتى يمسك بالوسادة ..

: وبمجرد ما تخيلتها ...

- ينهض متحمساً ..

: شعرت بنشاط لم أعهده من قبل يدب في أوصالي ..

- على الوسادة فوق السرير

: وكأن دماءاً جديدة .. صارت تجري في أوردتي ..



#### الشاطئ أمام الشاليه[

المشهد ( 45) شروق : خارجی

- الشاطئ .. وقت الشروق .. لنلاحظ وجود عدد من الشماسي أسفل إحداها يجلس شاب ( 1 ) مع شاب ( 2 ) الذي نهض بقامته المديدة وعضلاته المفتولة ليخلع الله ( تي شيرت ) ويهبط في الماء .

- على شاليه خال عماد لنراه يخرج من بابه ممسكاً بالوكمان ثم يتوقف متأملاً البحر .. بينما نسمع صوته

صوت عماد: خرجت لأرى البحر أمامي .. فشعرت بأني أراه لأول مرة .. بهذا القدر من الجمال .

- يستدير لنرى الشاليه المجاور من جهة نظره .

: ثم وقفت أنتظرها .. وكلي يقين من أنها سوف تأتي .. نعم ستأتي .. لأنها حتماً ستسمع نداءات نبض دمي

- و هو يرفع الوكمان .

: التي سيرسلها لها صوت عشقناه ..

- يضغط على ذر التشغيل فنسمع صوت فريد ..

صوت فريد : بنادي عليك



#### المشهد (46)

#### فوتومونتاج [

- غرفة لبنى .. لنراها نائمة .. وشعرها الناعم ينسكب مثل موجة بحر فوق وسادتها بينما نسمع طوال المشهد صوت فريد

صوت فريد: بنادي عليك .. إسمع ندايا .. معايا .. قبل ما انده لك

- على عماد الذي زاد تعلق نظره بالشاليه .. بينما نسمع

صوت فريد: وأحن إليك .. وكل لحظة تفوت من عمري تشتاق لك ..

- تبدأ لبني في تحريك رأسها لنسمع .

صوت فريد: بنادي عليك

- لبني .. تعتدل جالسة فوق السرير

صوت فريد: بنادي عليك

- تنظر نحو شباك غرفتها.

صوت فريد: بنادي عليك

- على عماد .. الذي استبد به الشوق فهّم بأن يخطو خطوة نحو الشاليه .. مع بداية الجملة الموسيقية التي يؤديها فريد بصوته ويكررها ثلاثة مرات

: الجملة الموسيقية (أول مرة)

- لبنى تفتح دولاب ملابسها ..

: الجملة الموسيقية (ثاني مرة)

- عماد .. الذي إنفرجت أساريره .. وهو يطالع لبنى التي خرجت في لقطة بطيئة .. وسارت نحوه وهي تبتسم إبتسامة رقيقة .. بينما نسمع

: الجملة الموسيقية (ثالث مرة)

- على عماد الذي وقف ليتأملها .. وعلى وجهه تعبيراً يمزج بين السعادة والذهول بعدما اكتشف كم هي جميلة .. بينما نسمع الفاصل المو سيقي الذي يسبق أول مقطع من الأغنية
- لبنى وقد اقتربت من عماد الذي لا زال واقفاً وكأنه قد أصيب بمس وهو يراها تقترب وعلى وجهها تعبيرات تتأرجح بين اللهفة والحياء .. حتى تصبح أمامه مباشرة.. فتقف على بعد خطوتين منه بينما نسمع.

صوت فريد: نسيت حياتي اللي قبلك ..

- على عماد الذي بدا كالمأخوذ وهو يتأملها بنظرات عاشقة غير مصدقة
  - : وذكرياتي اللي فيها
- على لبني التي زاد شعورها بالإحراج بعدما طال سكون وسكوت عماد
  - : وروحي تتمنى ضلك ..
  - تسير مبتعدة عنه.. لتتجه نحو صخرة تطل على الشاطئ بينما نسمع .
    - : يمشى ويخطر عليها
    - على عماد الذي أخذ ينظر نحوها وهو متخشباً في مكانه.
- على بصمات قدمي لبنى فوق الرمال .. ثم على وجه عماد الذي عصف به ضياع الفرصة .
- يلقي نظرة سريعة نحو لبنى .. ثم ينظر للوكمان بغيظ.. بعدها يلقيه لأعلى وقبل أن يسقط على الأرض يقذفه قذفة قوية بقدمه التي يرتدي فيها حذاء رياضي (على طريقة كرة القدم).. ثم يسقط على الأرض ممسكاً بمشط قدمه وهو يتألم بشدة.



#### شاطئ البحر[

المشهد ( 47 ) نهار : خارجی

- موجة من البحر تتفتت على رمال الشاطئ.
- قدمى شاب ( 2 ) تدكان الرمال في طريقه إلى الشمسية .
- يصل إلى الشمسية .. يلتقط منشفة ويمسح جسده المبتل ثم ينظر نحو شاب ( 1 ) الذي أخذ ينظر باهتمام نحو لبنى التي وقفت بجوار الصخرة لتنظر نحو البحر .
  - يقترب شاب (1) من لبني
- على عماد الذي لا زال يجلس فوق الر مال بجوار الوكمان المهشم وفردة مخلوعة من حذائه الرياضي وهو يتحسس أصابع قدمه اليمني
  - تحتد تعبيرات وجه عماد بعدما شاهد شاب (1) يتحرش بلبني
- يمسك عماد بفردة حذائه المخلوعة ويحاول أن يرتديها .. لكن رباطها الطويل المشدود يحول دون ذلك.. فينهض مسرعاً ليعدو متعرجاً (لا زالت فردة حذاء في قدمه اليسرى) في اتجاه لبنى وشاب (1)
  - عماد يدخل الكادر من بين لبني وشاب (1)
  - يدفع عماد شاب (1) دفعة قوية وهو يقول بحدة .

عماد: مالك ومالها

- الذي كادت أن تسقطه دفعة عماد وبنبرة اعتذار . .
  - شاب (1): آسف جداً.
  - ثم وهو يلتف مغادراً ..
  - : مكنتش أعرف إنكم مع بعض ..
- تراجع شاب (1) ونظرة استحسان من لبني .. يشعلان حما سة عماد .. الذي لحق بشاب (1) ودفعه من ظهره مرة أخرى وهو يقول بنبرة المنتصر .
  - عماد : طب يلا إمشى .. وإياك تعمل كده مرة ثانية
    - صارخاً
    - : بلا قلة أدب ..
- نلاحظ من عمق المشهد .. شاب (2) وهو يعدو مسرعاً ناحية الصخرة بينما ينظر عماد بزهو نحو لبني
  - يدخل شاب ( 2 ) الكادر من بين عماد وشاب ( 1 ) .
  - يدفع شاب (2) عماد دفعة قوية تسقطه أرضاً وهو يصرخ فيه
    - شاب ( 2 ) : مالك و ماله

- على عماد الذي فوجئ بضخامة شاب (2).. فيقول وهو يشير نحو شاب (1) عماد: آسف جداً .. مكنتش أعرف إنكم مع بعض
- ( معركة ) يكيل فيها الشاب ( 2 ) لعماد عدة لكمات دون رد فعل من عماد غير التفاته للبنى ليقول لها بعد كل لكمة ..

عماد: ودي وشك بعيد

- يسقط عماد منهاراً على الأرض .. ثم يتحامل على نفسه ليجثو على ركبتيه أمام شاب ( 2 ) ويتعلق بوسطه العاري إلا من المايوه .. ثم يلتفت نحو لبنى التي نراها توشك أن تبكي من أجله.. ليقول لها راجياً .
  - عماد : سوقت عليكي النبي .. ودي وشك بعيد عشان أعرف أضربه .
- تستفز كلمات عماد شاب ( 2 ) الذي منح عماد دفعة أشد قسوة من لكماته .. التي جعلت لبني تتدخل لإنقاذه ..
  - شاب ( 2 ) يمسك بذراع لبني ويدفعها دفعة قوية لتسقط على الرمال ..
- يلقي عماد نظرة سريعة على لبنى .. التي أصبح ظهرها للمشهد ثم يرفع يديه ويسحب مايوه شاب (2) إلى أسفل حتى يصل به إلى الأرض.. ثم يضرب بطن شاب (2) ضربة قوية برأسه.. تجعل شاب (2) يندفع للخلف فينخلع المايوه من بين قدميه.

- (معركة) عماد يستغل استعمال شاب (2) ليديه في محاولته المستميتة والفاشلة لستر عورته ويوسعه ضرباً حتى يسقطه على الأرض دون حراك ..
  - على شاب (1) الذي مال على الأرض ليلتقط مايوه شاب (2).



### بجوار كشك على الكورنيش

المشهد ( 48 ) نهار : خارجي

- عماد يسير متعرجاً.. بفردة حذاء واحدة.. لبني بجواره.. تمسك بعلبة مناديل.
  - يمسح جرح في شفته السفلي بمنديل ثم يقول للبني .
  - عماد : لو وديتي وشك بعيد أول ما قلت لك .. مكنتش خدت العلقة دي
    - و هي تناوله منديلاً آخر .
      - لبني: آسفة جداً ..
      - ثم بنبرة ذات مغزى .
    - : أصلى مكنتش أعرف إننا مع بعض.
      - يستوعب دعابتها فيضحك .
      - يتأملها بسعادة .. وهو يقول
      - عماد: يا ااه ...حتى دمك ..

لبنى: ماله ..

عماد: زي العسل ..

- تتفادى مغازلته لتقول بجدية .

لبني : مجاش في بالي خالص .. إنك كنت عايزني أبص بعيد علشان تعمل كده...

- يبتسم لها ويقول.

عماد: ملقتش طريقة غير دي أشغل بيها إيديه.

- وهو يشير نحو الشاطيء

عماد: بس شوفتي وأنا بقطعة ..

- تبتسم ابتسامة رقيقة

لبنى: أيوه شوفتك ..

عماد: وأنا كمان شوفتك .. فحسيت إني مشفتش ومحلمتش ومتمنتش ومحبتش غير دلوقت ..

- تغمض عينيها برهة.. وكأنها تتذوق طعم كلماته

- على البحر .



### فوتومونتاج[

الشهد ( 49)

- يسيران معاً على الكورنيش .. لنرى لبنى من عدة زوايا وهي تتجاذب معه أطراف الحديث بينما نسمع صوت عماد.

صوت عماد: في طريقنا للعودة .. حدثتني عن نفسها .. وعن عائلتها

- على عماد الذي أنصت إليها وهو يتأملها بطريقه تشعرنا بأنه يقاوم رغبة شديدة تدفعه إلى إحتضانها .

صوت عماد: ثم فتحت قلبها أكثر .. فأكثر .. حتى جعلتني خلال دقائق معدودة .. أشعر بأني كنت أعرفها منذ ولِدْتُ .. أو منذ ولِدَتْ .. أو منذ ولد العالم .. فشجعني ذلك على أن أفتح قلبى لها .. وفتحته ..

- يتحدث عماد .. بطلاقة .. تنصـت له لبنى باهتمام وهو يوغل في الحديث الذي ضمنه أداء حركي بيديه وجسده كله .. وهو يسير متعرجاً نصف حافٍ

صوت عماد: حكيت لها عن كل شيء ..حتى علاقاتي النسائية .. حدثتها عنها .. دون حرج .. دون أي شعور غير شعور بأني .. كلما تحدثت معها كلما اغتسلت .. كلما تطهرت من أخطاء وآثام الماضي ..

- يمسك بذراعيها ليوقفها عن السير ..

صوت عماد: ثم أوقفتها أمامي .. بعدما شعرت بأني في حاجة ملحة لأن أنظر إلى عينيها

- يقف أمامها ليتأملها .

صوت عماد: شعرت بأني مدين لها .. مدين لعينيها بكل لحظة مضت من عمري .. وأنا تائه عنها .. وعن نفسي .. وعن الحياة .

- مزج على البحر من جهة نظر عماد .. ثم الصخرة .. ثم على مكان في الأفق لنرى الشمس تنحدر نحو المغيب .

- الصخرة .. لنرى عماداً جالساً في أعلى ركن فيها وقد بدل ملابسه وارتدى في قدميه حذاءاً آخر .. بينما نسمع صوته مسترسلاً

صوت عماد : وافترقنا على وعد باللقاء .. فذقت طعم الساعات التي يقول عنها العاشقون أنها .. بطول العمر .. عندما جلست انتظرها ..

- على البحر وقد انعكس عليه ضوء القمر

صوت عماد: مع البحر ..

- على القمر وقد بدا مكتملاً وساحراً

صوت عماد: والقمر ..

- مزج على القمر .. لنرى الشمس في نهاية المزج وقد ارتدت ثوب الإشراق

صوت عماد: حتى أشرقت الشمس ..

- على باب شاليه لبني لنراها تخرج منه

صوت عماد: فأشرقت معها..



## على مقربة من الشاليه[

# 

- يقترب منها وهو يقول بلهفة

عماد : لو كنتي إتاخرتي شوية تاني.. كانت روحي طلعت من كتر ما وحشتيني

لبني : أنا كمان .. ما صدقت إن الشمس تطلع .. عشان أخرج وأشوفك

- وهي تنظر للأرض

لبني : كنت خايفه قوى يا عماد

- ينظر لها بسعادة.. ثم يمد يده أسفل ذقنها ويرفع رأسها بعد ما ظن أنها محرجة من النظر إليه.. فيقول لها بثقة

عماد : قولي ما تتكسفيش.. كنتي خافيه أحسن مكونش مستنيكي.. صح

لبني: لأ .. غلط

عماد : أُمال كنتي خايفه من إيه؟

لبني : أحسن تكون متعود تمشي

- وهي تنظر لقدميه على الأرض

: بفردة جزمة واحدة



## شاطئ البحر[

## 

- وهي تسير بجواره ..

لبنى: ما ردتش إمبارح ليه على فريد

- بنبرة مهمومة .

عماد: أنا ما دخلتش الشاليه غير نص ساعة بس.. يادوب خدت حمام وغيرت هدومي وطلعت جري

لبني: خالك زهق منك وطردك ...

عماد : لا .. لكن فيه حاجة ما قلتهاش إمبارح .. وخايف لو قلتهالك إن إنتي اللي تطرديني من قلبك .

لبني: فيه واحده نسيت تقول لي عليها ..

عماد: مش واحده .. إنما واحد ..

- تنظر له باستغراب فيردف.

عماد: والدي يا لبنى .. راجل داخل على تمانين سنة .. لكنه بيتعامل معايا زي ما نكون مولودين فوق روس بعض .. متعرفيش إن كان بيعمل كده علشان يخلي لأيامه الأخيرة طعم ولا علشان بيعاقبني ..

- باهتمام بالغ .

لبني: يعاقبك على إيه ؟

- وقد اكتسى صوته بنبرة حزن دفين .

عماد: لأني على حد تعبيره إبن غلطة . . أمي حملت فيا وهي فوق الأربعين وماتت وهي بتولدني . . ساعات كتير بحس إنه لسه شايل جواه مرارة التجربة دي . . ومع إن هو أكتر حد بيطالبني بالجواز . . خايف بعد ما أتجوز ويشوفني مستقر . . إحساسه بافتقاده للاستقرار . . لأمي . . اللي أنا كنت السبب فيه . . يخليه ينتقم منك . .

- بفزع مصطنع .

لبني: يقتلني يعني ؟

عماد : يعذبك .. يمارس طفولته المتأخرة معاكى .. يمسك لك ع الوحدة .. و....

- مقاطعة .

لبني: لا .. لا .. استنا ..

عماد: إيه ..

لبني : فيه حاجة سابقة لكدة .. وأهم من كل اللي قولته .

- باهتمام.

عماد: إيه الحاجة دي ..

- بتعالي .

لبني : إنت مين قال لك إني هوافق أساساً أتجوزك ..

- ينظر إليها مصدوماً .. فتضحك .. ثم تعدو أمامه ..

- ينظر برهة .. بعدها يبتسم .. ثم يعدو خلفها .

- على البحر ..



## فوتومونتاج[

#### $\Box$ (52)

- عماد يعدو خلف لبني في لقطة بطيئة بينما نسمع على شريط الصوت مو سيقى مقدمة أغنية (على بالى)
  - شاليه لبني .. عماد والخال يجلسان في غرفة الاستقبال .
  - غرفة لبني .. لنراها توميء بالموافقة لعزت.. الذي نراه في نهاية العقد الثالث..
    - غرفة الاستقبال .. الخال يحتضن عماد مهنئاً .
- تكعيبة العنب .. شقيقة عماد الكبرى وأم صبري الخادمة ( في نفس سن شقيقه عماد ) تزغر دان بينما يلتقط عماد يد الوالد ليقبلها .
- شاليه لبنى .. عماد ولبنى يلبسان دبل الخطوبة .. بينما يحيط بهم عزت وزوجته والعميد حسن ( الذي نراه يرتدي ملابساً رسمية تحمل رتبة نقيب) مع زوجته (عايدة ) .. في جانب وفي الجانب الآخر الوالد والخال وشقيقات عماد الثلاث

- الفيلا .. لنرى أعمال التشطيب تتم فيها ووالد عماد يتجول على مقعده المتحرك ليعطى التعليمات للعمال.
- عدد من المعارض لنرى عماداً ولبنى يستعرضان محتويا تها من موبيليا ومفروشات . .
  - شاطئ البحر .. وقت الغروب .. في أقرب نقطة من الشاطيء ..



## المشهد ( 53 ) \_\_\_ الشاطئ [ غروب : خارجي المسلم

- بنبرة عميقة وكأنه يريد أن يتأكد من حسن اختياره .

عماد: إيه أكتر أغنية بتحبى تسمعيها لفريد

لبنى: بذمتك ده سؤال تسأله

عماد: ليه

- و هي لا زالت تنظر للبحر .

لبنى: لأن أغاني فريد في مجملها .. عاملة زي ماتكون إنسان بتحبه .. و صعب قوي إن محب يقول لك أيه أكتر حاجه بيحبها في حبيبه ..

- بسعادة .

عماد: الله عليكي ..

- وهو يلف يده على كتفها .

عماد: بحبك . .

- و هي ترفع يدها لتشبك أصابعها مع أصابع يده فوق كتفها .

لبني: لكن ممكن السؤال يبقى .. إيه الأغنية اللي مبحبش أسمعها لفريد .

عماد: معقوله .. وإيه الأغنية دي ..

لبني: بنادي عليك .. لأني لما بسمعها بفتكر العلقة اللي إنتا أخدتها بسببي.

- يسحب يده بغيظ .

عماد: بقى كده .. فاكره العلقة اللي أخدتها ..

- بحدة .

: وناسيه إنى قطعته .

- بحدة وهي تكتم ضحكتها .

لبني: وإنت يوميها قطعته ؟ ..

عماد: أيوه قطعته ..

لبني: لا .. إنتا يومها قلعته ..

- صارخاً فيها .

عماد: قطعته ..

– صارخة فيه.

لبني: قلعته . .

عماد: قطعته ..

لبني : قلعته

- يتلاشي الصوت تدريجياً مع المزج البطيئ على قلعة قايت باي .



## قلعة قايت باي

# 

- القلعة بين الإضاءة الخافتة التي تلفها .. فجعلتها تبدو مثل أطلال معبد قديم مهجور .. أفلت من بين جدرانه المعتمة بدراً يتوسط السماء
  - يسيران على المدق الصخري ..
  - تقول له لبني بنبرة بالغة العمق.

لبني: لا .. بجد يا عماد .. فيه أغنية لفريد مش مبحبش أسمعها .. لكن بخاف ..

- تلتفت له .

لبني: أضنيتني بالهجر .

عماد: معقوله .. دي من أجمل أغانيه... دي ..

- مقاطعة .

لبني: أنا معاك ..

- بنبرة راجفة .

لبنى: لكن نهايتها حزينة قوي .. وفيها دراما وخيال وصل في تجسيده للحظة الفراق .. مستوى مش بقدر أتحمله..

- يقف أمامها ليتأملها بإمعان..

عماد: قسوته ومرارته .. وجماله .. مش حاسة بتناقض في كلامك ..

لبنى: لو سمعت الأغنية بتركيز ولاحظت التناقض بين عذوبة ورقة بدايتها .. ومرارة وقسوة نهايتها هتعذرني ..

- يشرد برهة .. يستعيد خلالها أبيات القصيدة .. ثم ينظر لعينيها ويقول ..

عماد: أضنيتني بالهجر .. ما أظلمك ..

لبني: فارحم عسى الرحمن أن يرحمك ..

عماد: مولاي .. حكمتك في مهجتي .

لبنى : فارفق بها يفديك من حَكَّمَكْ ..

- و هو يقرب وجهه من وجهها .

عماد: ما كان أحلى .. قبلات الهوى . .

- وهي تميل برأسها لتتفادي شفتيه .

لبني: إن كنت لا تذكر .. فاسأل فمك ..

عماد : يا بدر

- ترفع يدها لتضعها فوق شفتيه .. وهي تقول بنبرة رجاء ..

لبنى: بلاش .. بلاش يا عماد ..

عماد : النهاية اللي بتخافي تسمعيها بتبتدي من هنا

- و هي تستدير ليصبح وجهها للبحر ...

لبنى: يا بدر ..

- ترتفع الكاميرا على ظهر لبني.. لنرى البدر في السماء .. بينما نسمع صوتها الذي استرسل بنبرة كالنزيف ..

صوت لبني: يا بدر .. إن واصلتني بالجفا .. ومت في شرخ الصبا مغرمك

- ترتعش نبرة صوتها

صوت لبنى: قل للدجى مات ..

- يقترب عماد منها حتى يصبح خلفها مباشرة .. بينما تردف بنفس النبرة .

لبني : مات شهيد الوفا .. فانثر على أكفانه أنجمك

- تميل برأسها للخلف لتصبح على صدره .. يميل برأسه لتلامس شفتيه رأسها ثم يمسك بكتفيها ويلفها لتصبح في مواجهته.. يتأملها فيكتشف أنها تبكي

- يحتضنها .. لتمرغ رأ سها في صدره وكأنها تمسح دموعها في قلبه .. بينما ترتفع الكاميرا حتى نرى البدريتو سط السماء المظلمة بينما نسمع صوت عماد من المشهد القادم ..

صوت عماد: وشهد البدر على ما جرى تلك الليلة ..



### فوتومونتاج[

#### $\Box$ (55)

صوت عماد: وشهدت نجومه .. لذا .. كلما نظرت إلى السماء

- ألوان الألعاب النارية المتعددة تتفجر لتضيء عتمة السماء.. بينما تهبط الكاميرا على قاعة أفراح مفتوحة تزدحم بالمدعوين.. ومن بينهم أسرتي عماد ولبنى .. لبنى وعماد بملابس الزفاف يشتركان في النظر للسماء بينما نسمع صوت عماد

صوت عماد: تذكرتها .. وتذكرت نبوءتها التي أفضت بها إلى ..

- عماد بجوار لبنى في الكوشة.. التي تقدم منها عزت .. طالباً من عماد ولبنى الاشتراك في وصلة رقص.. بينما نسمع صوت لبنى

صوت لبنى: خايفه أن التشابه بين بداية قصتنا وبداية القصيدة في الجمال والرقة والعذوبة .. يسرى على النهاية .. خايفه يا عماد ..

- مظاهر الفرح على كل أفراد الأسرتين وأم صبري الخادمة .. بخاصة والدعماد .. الذي جلس فوق مقعده المتحرك بين شقيقات عماد الثلاثة .. بينما يستر سل صوت لبنى

صوت لبنى : خايفه إن حد فينا في يوم من الأيام.. يطلب من البدر إنه يخلي الليل .. يرش نجومه على أكفان حبيبه اللي مات..

- عدد من المصورين يلتقطون الصور للكوشة والمدعوين .. أحدهم يقتنص لقطة لعماد مع لبنى .. فنسمع صوت الفلاش بينما نرى في الكادر .. الصورة التي و ضعت في برواز مكتب التكعيبة .



## التكعيبة[

المشهد ( 56 ) ليل : داخلي

- عودة من الفلاش باك ..
- عماد .. يتأمل البرواز بعينين دامعتين ..
  - يضع القلم من يده .. ويمسح عينيه ..
- على المكتب بجوار الدوسيه رزمة ورق
- ( في حدود 30 ورقة ) قد فرغ من كتابتها ..
- يمسك بها .. يضربها على المكتب لتتساوى مع بعضها ..
  - يضع رزمة الورق في الملف ..
    - ينهض ليفتح باب التكعيبة ..

- من جهة نظره .. نرى لبني قادمة نحوه ..

- يشير لها ويقول بطريقة من كان على موعد وتأخر

عماد : والله والله والله .. كنت لسه هنزل لك ..



#### braceمقهى بلدي ومنزل العميد حسن

#### المشهد ( 57 ) \_\_

#### ليل: خارجي-داخلي

- قهوة بلدي .. عزت يتحدث عبر هاتفه المحمول وعيناه تنظر بتركيز نحو مدخل أحد البلوكات المواجهة للمقهى ..

عزت: بعد ما لفيت على رجليا يجي خمس ساعات .. عرفت شقتها .. وطلعت ملقتهاش .. مرات إبنها قالت لي إنها خرجت من الصبح ..

- على مائدة السفرة مع أسرته .. يتحدث عبر الهاتف ..

العميد حسن : طب كنت جيت استريحت شوية وغيرت هدومك وبعدين روحت لها ..

عزت: مش جايني قلب أعمل كده ..

- يلقي نظرة نحو المدخل ثم تنتعش تعبيرات وجهه ..

عزت: إقفل دلوقت يا حسن .. أخيراً الهانم جت

العميد حسن: كلمني أول ما تخلص معاها ..

- على المدخل لنرى أم صبري تدخل منه ..



## شقة أم صبري[

المشهد ( 58 )\_\_\_ ليل : داخلي

- تدخل من باب الشقة ثم تلف جسدها وتهم بغلق الباب .. فتفاجأ بعزت.. أمامها فتقول له بترحاب

أم صبرى: سي الأستاذ عزت .. اتفضل ..

- يدخل ليجلس فوق كنبة بلدي في الصالة

- بعد ما جلست على مقربة منه..

أم صبرى: يا ألف مرحب بسى الأستاذ .. تشرب إيه ..

- مستدرجاً بلهجة ودودة ..

عزت: قبل ما أشرب حاجة يا ست يا بركة .. قوليلي .. سيبتي الشغل عند المدام ليه ؟

أم صبري : وأنا أقدر أستغني عن المدام .. دا سي الأستاذ هو اللي قلي ما روحش الشغل ..

عزت : لكن الأستاذ عماد قال لي غير كدة خالص

- وهي تشير نحو باب إحدى الغرف

أم صبري: أعدم عيال إبني إن ....

– مقاطعاً

عزت: طيب .. طيب ..

- وهو يتأملها بنظرات نافذة

: أنا عايزك تحكي لي إيه اللي حصل بالظبط.. في آخر مرة قابلتيه فيها .

- تقترب الكاميرا من أم صبري حتى نراها في لقطة قريبة .

فلاش باك

## الفيلا (المطبخ والريسبشن)

ا**لمشهد** ( 59 ) \_\_\_\_ نهار : داخلي

- أم صبري ترتب في محتويات المطبخ بينما نسمع صوتها من المشهد السابق.

صوت أم صبري : الأسبوع اللي فات .. زي النهار ده كده .. روحت الصبح زي كل يوم .. وقبل ما أخلص ترويق للمطبخ .. سمعت صوت عكاز الأستاذ ..

- الريسبشن .. لنسمع صوت اصطدام عكاز عماد بالأرض .. ثم نراه وهو يهبط من السلم الداخلي ويتجه نحو المطبخ .. وهو مصفر الوجه .. محمر العينين .. يبدو مجهداً بصورة كبيرة .. تقابله أم صبري

أم صبري: صباح الخيرياسي الأستاذ.

عماد: صباح النور ..

- و هي تهم بالعودة للمطبخ .

أم صبري : دقيقة واحدة والفطار يجهز ..

- يستو قفها ..

عماد: إستني ..

- يقترب منها هو يضع يده في جيب الروب

عماد: إعتبري نفسك في أجازة من النهارده ..

- و هو يمنحها بعض النقود ..

عماد: ومتجيش غير لما نتصل بيكي

أم صبري: هو فيه حاجة يا سيدي

عماد: الست سافرت إمبارح وأنا هحصلها عن قريب

- يلتفت عماد بصعوبة .. ثم يسير بخطوات واهنة .. بينما نسمع صوت عزت من المشهد السابق ..

صوت عزت: ما لاحظتيش عليه حاجة غريبة ؟

- على عماد الذي صعد أولى درجات السلم.. ثم توقف ليتحسس مؤخرة ظهره .. وهو في قمة الإعياء بينما نسمع صوت أم صبري .

صوت أم صبري: كان تعبان قوي .. وكان عايز يداري عليا تعبه .. لأنه بعد شوية إتلفت وراه .. ولما لقاني لسه واقفة شخط فيا ..

- يلتفت عماد وعندما يرى أم صبري واقفة .. يقول لها بحدة ..

عماد: يلا .. مستنية إيه ؟

- علي أم صبري التي دخلت المطبخ .. لتقف ساكنة برهة نسمع خلالها صوتها من المشهد السابق .

صوت أم صبري : فضلت واقفة شوية وأنا مستغربة من اللي حصل ..

- الريسبشن .. لنرى عماداً ساقطاً على السلم والعكاز على بعد درجات أسفله .. بينما نسمع صوت أم صبري .

: لحد ما سمعت صوته بيصرخ .. زي ما يكون مضروب بالرصاص . .

- على أم صبري التي وقفت لتتابع عماد بطرف خفي .. ثم على عماد.. لنراه وهو يزحف على درجات السلم .. محاولاً التشبث بالدرابزين وهو في قمة الخوار والعناء والتوجع..



## شقة أم صبري[

# 

- عودة من الفلاش باك ..
- على عزت الذي هب واقفاً ..
- على أم صبري التي نظرت إليه بقلق ..
- على باب الشقة الذي أغلقه عزت بعنف بعد خروجه ..



#### فوتومونتاج[

#### $\Box$ (61) المشهد

- شارع رئيسي بمساكن الزلزال لنرى عزت منطلقاً بسيارته ..
- الحديقة .. لنرى عماداً مقترباً من المائدة وهو يحمل صينية عليها طبق فاكهة ( شتوية ) وسكين وفنجان قهوة وكوب عصير برتقال .
  - ميدان النافورة .. لنرى سيارة عزت تلف الصينية وتنحرف في شارع جانبي ..
- الحديقة لنرى عماد يقشر تفاحة ويضعها على طبق فوق الما ئدة أ مام مقعد (2).
  - سور الفيلا .. لنرى سيارة عزت تتوقف أمامه ..



## الحديقة [

# 

- يلتفت عماد ناحية الباب بعد ما سمع صوت خطوات عزت ..
  - ينهض مستنداً على عكازه .. ويواجه عزت قائلاً
    - عماد: فيه إيه تاني يا عزت.؟
    - و هو يقترب من المائدة ..
    - عزت: فيه مشهد جديد لازم ينكتب دلوقتي ..
      - و هو يستعرض محتويات المائدة...
- عزت: مشهد جديد في الفيلم الهابط اللي إنتا مصمم تكمله لآخره ..
  - معترضاً
  - عماد: مفيش داعي للغلط .. أنا مش بتاع أفلام هابطة يا عزت ..
    - و هو يلتقط كوب العصير ..
    - عزت: أُمال الفيلم اللي فرضت على لبنى دور البطولة فيه ..
      - و هو ينظر للكوب.

عزت : واللي اخترت إنه يبقى بوليسي على طريقة أفلام هيتشكوك .. ممكن يتوصف بإيه ..

- و هو يلقى كوب العصير على المائدة .

عزت: غير إنه هابط وبايخ كمان ..

- ينظر للكوب بغيظ ثم يصرخ في عزت ..

عماد: إنت عايز مني إيه ؟

- يمسك بصدر عماد ويضم ملابسه على رقبته وهو يصرخ فيه ..

عزت: مشهد النهاية يا مبدع.. يا أديب ..

- الذي شعر بالاختناق فترك العكاز يسقط من يده ورفع يديه ليفك يدي عزت من على رقبته .

عماد: سيبني .. سيبني يا عزت ..

- الذي فقد اتزانه ..

عزت: مش قبل ما تكتب مشهد النهاية ..

- يضغط بشدة على رقبة عماد ويصرخ فيه

عزت: مش قبل ما أعرف أختى فين ..

- تجحظ عينا عماد و لا يرد.. فيدفعه عزت ليسقطه فوق كرسيه ثم يقول وهو ينظر نحو باب الفيلا ..

عزت: خلاص.. يبقى أكتب أنا بدالك ..

- على باب الفيلا ..
- على السكين فوق طبق الفاكهة .. ثم ..
  - على شباك غرفة النوم .



#### فوتومونتاج[

 $\Box$ (63)

- الحديقة .. يتحامل عماد على نفسه .. لينهض ببطء .. وهو ينظر بغضب شديد نحو الفيلا .. ثم يلتقط السكين من فوق طبق الفاكهة ..
  - غرفة النوم .. عزت يتخشب في مكانه بمجرد رؤيته لما يشبه الجسد المغطى..
- السلم الداخلي لنرى عماداً يصعد وهو يمسك مقبض السكين بقوة جعلته يهتز في يده ..
- غرفة النوم .. عزت يتحرك بخطوات متخاذلة نحو السرير وهو في غاية الذهول حتى يصل إلى ما يشبه الجسد المغطى ..
  - لقطة بطيئة للسكين في يد عماد الذي أشرف على غرفة النوم .
    - يد عزت التي ارتعشت وهي تمتد نحو الغطاء
- عدة لقطات ( سريعة ) للسكين التي تهتز في يد عماد وليد عزت التي ازدادت ارتعاشتها كلما اقتربت من الغطاء ..
  - بمجرد دخول عماد الغرفة .. يزيح عزت الغطاء بقوة ناحية الكادر ليغطيه به
    - يظلم الكادر بينما يرتفع صوت هديل الحمام



## غرفة النوم[

## 

- السرير من جهة نظر عزت .. لنرى عدداً من الوسائد الصغيرة ترتص أسفل الغطاء
  - عماد يسير ناحية عزت بخطوات متعرجة وهو يخبئ السكين خلف ظهره.
    - ينظر عزت بغضب نحو عماد ويقول وهو يشير نحو السرير
      - عزت: إيه ده يا مجنون ..
    - يلتقط عزت وسادة من فوق السرير ويقذف بها وجه عماد وهو يصرخ ..
      - عزت: إيه اللي بتعمله ده ؟!!
      - تصطدم الوسادة بوجه عماد وتسقط على الأرض بينه وبين عزت ..
  - تبرق عينا عماد وهو يسحب السكين من وراء ظهره ثم يرفعها أمام وجه عزت ..
- يفاجأ عزت بالسكين .. فيرتد مفزوعاً خطوة للخلف.. ليصبح ظهره للجدار بين السرير والدولاب .

- يهوي عماد بالسكين على صدر عزت .. الذي تفادى الضربة وقفز فوق السرير ثم هبط في الناحية الأخرى منه
- ينظر عماد بغضب شديد للو سادة التي دا ستها قدم عزت .. ثم يقذف بالسكين ناحته
- يميل عماد على الوسادة .. التي رصها بديلاً عن جسد لبنى .. ليتحسس مكان ما وطئت قدم عزت وهو يقول بنبرة آسفة ملهوفة .
  - عماد: معلش .. معلش ..
  - على عزت الذي مال ليلتقط السكين وهو ينظر نحو عماد بذهول.
- يلتقط عماد من على الأرض الو سادة التي ضربه بها عزت .. ثم يضعها في مكانها وهو يقول بنفس النبرة ..
  - عماد: معلش يا حبيبتي.
- يتحرك عزت نحو المائدة الأرابيسك .. بينما يميل عماد ليلتقط الغطاء ويفرده ببطء.. ورقة.. فوق الوسائد وكأنه يغطي طفلاً رضيعاً نام بعد طول بكاء..
- يجلس عزت على الكرسي المواجه للسرير ليتابع ما يفعله عماد بتعبيرات مصدومة راجفة ..

- عماد .. الذي نشعر أنه نسي وجود عزت .. يتحسس الغطاء فوق الوسائد .. من مكان الركبتين صاعداً ببطء .. حتى مكان الصدر .. الذي ترك يده لتستقر فوقه برهة .. ثم بدأ يتحسسه بحركة دائرية وهو يقرب خده منه وكأنه يريد أن ينصت لدقات قلبها .. وهو يقول بنفس النبرة ..

عماد: معلش یا عمری .. معلش

- على عزت الذي بدأت الدموع تنسال من عينيه وهو يرفع يده ليضع السكين على المائدة ..
  - من جهة نظر عزت .. علبة الشطرنج والكتابان والمسبحة ..
- ترفع يد عزت المسبحة .. لنرى بوضوح عنوان الكتاب من أسفلها ((أحكام الجنائز ))
- يقرب عزت وجهه من الكتاب.. ليقرأ العناوين على غلافه .. بينما تقترب الكاميرا ببطء من عماد.. الذي نجده وضع رأسه على مكان الصدر وبدا كالنائم..
- على تعبيرات وجه عزت المصدومة الذاهلة بينما نسمع صوته وهو يطالع الغلاف صوت عزت: تلقين المحتضر. ما يجب على أهل الميت بعد موته.. كيف تُغسل ميتا.. أحكام التكفين..أحكام الدفن..
- القلق والارتياب البالغ على وجه عزت الذي مد يده ببطء ناحية الكتاب وهو ينظر بتوجس ناحية عماد ..

- قبل أن تلمس يد عزت الكتاب نسمع صوت عماد . .

صوت عماد: سامحینی یا لبنی

- ثم .. على و جه عزت نسمع صوت عماد صار خاً ومصحوباً بصدى صوت ..

ص عماد: سامحينيييييييييييييي

- نسمع صوت هديل الحمام يرتفع بشدة .. وكأنه يتجاوب مع صوت عماد.. بينما يهب عزت واقفاً ..



فوتومونتاج[

المشهد ( 65 )

- حطام غية الحمام .. بينما نسمع صوت الهديل ..
- الهلال في قلب السماء المظلمة وقد أوشك أن يصبح بدراً ..
  - عزت يخرج مسرعاً من باب الفيلا ..
  - أمام الكشك لنرى الجار بجوار عم سيد ..
- يتحرك الجار ناحية عزت الذي فتح باب السيارة .. لكن عم سيد يمسك به ويمنعه..
  - مبنى مديرية أمن القاهرة ..
  - مكتب العميد حسن لنراه من خلف مكتبه وهو يميل ليلتقط سماعة الهاتف
- قسم الخليفة .. لنرى سيارة عزت مركونة أمامه .. بينما يمسك عزت بهاتفه المحمول ليتحدث بعصبية وهو يقترب من مبنى القسم.



## غرفة النوم[

المشهد ( 66 ) ليل : داخلي

- عماد لازال يحتضن مكان الصدر في الغطاء وهو يقول بأسف ..
- عماد: معلش .. معلش يا حبيبتي .. سامحيني لإني مقدرتش أحميكي ..
  - يبكى .. يبكى بحرقة .
  - : سامحيني .. واغفري لي عجزي ..
    - بنبرة شكوى
  - : معرفتش أعمل معاه حاجة .. وحتى إن عرفت .. مكنتش هقدر ..
    - و كأنه يهون عليها ..
- : وبعدين ده عزت.. أخوكي.. اللي بتعزيه وبتحترميه وبتعتبريه في مكانة والدك.. وهو كمان.. مبيحبش حد قدك وبيعتبرك بنته البكرية ..
  - يربت على مكان الصدر في الغطاء ..
  - : يبقى ما فيش داعى تاخدي على خاطرك منه ..
    - ينظر لمكان الرأس وهو يمسح عينيه ..

- : أنا كمان هسامحه .. وهنسي كل اللي عمله ..
  - تحتد تعبيرات وجهه
    - : لكن ..
  - و هو ينظر بحيرة لمكان الرأس
    - : لكن لو رجع تاني .
      - بغضب طفولي ..
- : وعمل العمايل دي مرة تانية .. هعمل معاه إيه ..
  - يعود لنبرة الشكوى وبانفعال ..
- : الصبح كان هيقعد على كرسيكي لولا لحقته .. ومن شوية وإحنا تحت .. دلق العصير بتاعك ..
  - يتحسس الغطاء بيديه وهو يبكي ليقول ..
    - : ودلوقتي .. رمى الغطا على الأرض ..
    - بصوت مبحوح من شدة الانفعال ..
- : الغطا اللي كنا بنحس إنه جلدنا .. من كتر ماكنا بنبقي وإحنا تحته .. روح واحده وجسم واحد ..

- يمد يده أسفل الغطاء ليتحسس الوسادة

: والمخدة .. المخدة اللي لا سه ريحتك فيها .. واللي لا سه بـ صمات خدودك الناعمة مطبوعة عليها ..

- بنبرة متعثرة ..
- : داس عليها برجله..
- يحتضن الغطاء .. ثم يجهش باكياً ..



#### $ar{f l}$ حطام الغية والتكعيبة

المشهد ( 67 ) ليل : خارجي

- حطام الغية .. صوت الحمام الغارق في ظلام الحطام وقد أصبح هادئاً وكأنه قد أصابه الوهن ..
  - نسمع صوت خطوات عماد .. ثم نراه متقدماً من حطام الغية ..
  - يلقي نظرة على الحطام ثم ينحرف ناحية المقعد الفارغ وجهاز التسجيل.
- يهبط مستنداً على عكازه .. يميل على المقعد .. يتحسس مقعده وظهره .. ثم يميل على جهاز التسجيل .. يقرب إصبعه من زر التشغيل حتى يكاد أن يلمسه ..
- فجأة تتخشب يده .. يضمها .. يلقي نظرة سريعة على المقعد ثم على حطام الغية .. ثم ينهض ليسير نحو التكعيبة ..
  - من شباك التكعيبة نراه يدخل ويجلس على مكتبه .. ويمسك بالقلم ..
    - يلقى نظره على صورة الزفاف .. ثم يفتح الدوسيه ..
  - على الورقة البيضاء ثم مزج على فستان زفاف لبنى من المشهد القادم



#### قاعة الزفاف

ا**لمشهد** ( 68 ) ليل : داخلي

- لبنى ترقص مع عماد بينما نرى عزت وزوجته سناء والنقيب حسن وزوجته عايدة ويو سف وزوجته وعدد آخر من الشباب . . يصفقون في إيقاع واحد و سط تعبيرات من الفرح والسعادة تكسو وجوه الجميع بينما نسمع صوت عماد .

صوت عماد: عندما رقصت معي.. رأيت سعادة الدنيا كلها .. تتراقص في عينيها .. برغم ذلك ..

- يشرد وهو يراقصها

: شدتني و ساو سي لخيالات جعلتني أ سأل نفسي .. هل ستؤثر الحياة الزوجية بإيقاعها المعتاد المتباطئ .. على حالة الحب الجامح والمتوهج الذي ولد بيننا

- على إحدى الموائد القريبة من الكو شة .. لنرى الشقيقات الثلاث ووالد عماد في قمة السعادة وهم يصفقون في وضع الجلوس .

: وهل سيؤثر وجود أبي في حياتنا بشكل سلبي .. بحيث يصبح عبئاً عليها يخصم من رصيد حبها لي .. - على لبني التي لاحظت شروده فألقت برأسها على صدره

: وكأنها استمعت لوساوسي .. فشاءت أن ترد بطريقتها ..

- وهو يلف يديه حول جسدها ..

: فأنصت لها بشدة ..

يضمها بقوة .. وكأنه يريد أن يذيبها في صدره

: فسمعت دقات قلبها وكأنها تكرر في كلمته.. لا ..



#### غرفة النوم

المشهد ( 69 ) ليل : داخلي

- على السرير لنراه ينام وحيداً .. بينما نسمع صوته .

صوت عماد: وفي صباح ليلة الزفاف ..

- يمد يده اليسرى ليتحسس الفراش بجواره ..

: لم أجدها بجواري .. لأنها اختارت أن تبرهن على صدق عهدها

- يفتح عينيه ليلقى نظرة في أرجاء الغرفة

: وبسرعة ما كانت لتخطر على بالي

- يسمع صوت ضحك الوالد.. فينظر نحو شباك الغرفة

- ينهض ليسير نحو شباك الغرفة .. بينما نسمع صوت لبنى الناعم يردف مع صوت زقز قة العصافير في الحديقة

صوت لبنى: وطلع كان عمال يقول لي كدة .. علشان ما شوفهوش وهو بيقلّعه المايوه

- يزيح عماد الستار .. لنرى من جهة نظره الوالد ولبني أسفل تكعيبة العنب..

- على وجه عماد الذي إكتسى بتعبيرات السعادة والامتنان بينما نسمع صوت الوالد المستغرق في الضحك من المشهد القادم

- صوت الوالد: يخرب بيت عقله



## تكعيبة العنب[

 $\square$ المشهد ( 70 )uلیل : خارجي

- نلاحظ من رؤية الأطباق فوق المائدة أن الوالد قد تناول طعام الإفطار
  - يلتقط أنفاسه ثم يقول ..

الوالد: دا الواد عماد على كده بقى طلع جن مصور زي أبوه ..

- تقشر إصبع موز وهي تقول له باستغراب.

لبني : ليه .. هوا إنتا يا عمى لو كنت مكانه .. كنت هتعمل زيه . .

الوالد: آه .. أُمال إيه.. بالظبط ..

- و هي تمد إليه إصبع الموز المقشر ..

لبنى : طب نصيحة يا عمي لوجه الله .. إياك إنتا وإبنك تتخانقوا مع حد غير في إسكندرية

- بتأكيد .

: وعلى البلاج بالتحديد

- قبل أن يلامس فم والدعماد إصبع الموز ينفجر ضاحكاً ..
- يعيد إصبع الموز إلى الطبق ثم يتحسس صدره وهو يقول لها بسعادة .
  - الوالد: كفاية لحد كده .. قلبي وجعني من كتر الضحك .
    - وهي تهم بالنهوض

لبني : يبقى خد رست على ما أعملك كوباية عصير .. وأرجع أضحكك تاني ..

- بجدية

الوالد: لا بقى متوقعنيش في مشاكل مع الوادده ..

- بنبرة ماكرة .

الوالد: إنتى تطلعي دلوقت علشان لما يصحا يلقاكي جنبه ..

- بفرح طفولي وهو يفرك يديه .

الوالد: ولما يتخمد إبقى تعالى .

- تفاجأ لبني .. فتضحك ضحكة عالية . ثم تلتقط يده وتقبلها .
  - على شباك غرفة النوم



#### فوتومونتاج[

## $\Box$ (71) المشهد

- غرفة النوم .. عماد مازال ينظر عبر الشباك وهو في قمة السعادة بينما نسمع صوته صوت عماد : يومها علمت من والدى ..
  - لبنى تخرج من غرفة الوالد وهي تدفع مقعده المتحرك ..
    - : أنه فوجئ بها توقظه قبل الشروق
  - تجلس على الأرض أسفل الوالد لتمسح قدميه بالمنشفة .
    - : لتساعده على الوضوء
      - تكعيبة العنب ..
  - الوالد على كرسيه أمام المائدة ينهي صلاته ويلتفت مُسَلِّماً ..
    - : ثم بمجرد ما أتم صلاته ..
    - لبنى تضع صينية طعام الإفطار على المائدة أمام الوالد .
      - : وجدها تضع طعام الإفطار أمامه.

- شباك غرفة النوم .. لنراه يغلق الستار ..
- السرير لنراه يرص الوسائد بشكل طولي في المكان الذي كان ينام فيه .

: كان يتحدث عنها بصوت يحمل نبرة دافئة .. لم أعهدها في صوته الحاد الصاخب قبل ذلك .. كما كانت تعبيرات وجهه . . تحمل قدراً كبيراً من العرفان والامتنان لها .. بصورة جعلتني أوقن أنه أحبها بصدق ..

- على باب غرفة النوم لنراها تدخل منه .



#### غرفة النوم

المشهد ( 72 ) نهار : خارجي

- تدخل لبنى وهي تتحسس الخطى حتى لا توقظه بعدما وجدت الغطاء يلتف على ما يشبه جسداً نائماً أسفله .
  - تاخذ مكانها بجواره وتهم بالنوم.
  - يخرج من طرقة الحمام الداخلي وهو يسير بخطوات حذرة حتى يصل إليها .
    - يمديده ويتحسس شعرها.
    - تلتفت مفزوعة نحوه .. ثم تطمئن ملامحها بمجرد رؤيته .
      - معاتبة برقة .
      - لبني: خضتني ..
      - عماد: أحسن .. تستاهلي ..
        - لبني : وليه القسوة دي ؟

- و هو يجثو على ركبتيه ليصبح في مستواها وهي نائمة فوق السرير وبنبرة تفيض بالحب

عماد: لإني صحيت مالقتكيش جنبي.

**-** بدلال

لبني : لا .. إنتا لازم تعرف من دلوقت .. إني مش ملكك لوحدك ..

- ماز حاً

عماد: إنتى ناوية تخونيني تاني في تكعيبة العنب.

- بنبرة مستفزة .

لبنى: أعمل إيه .. مضطرة

- ينهض .. ليتأملها بهيام وهو يميل نحوها.

عماد: إنتى قد الكلام ده ..

لبني : قده ونص

- تنسحب الكاميرا ببطء على الجانب الآخر من الفرش .. بينما نسمع صوتهما بتهامسان عماد : خلاص .. يبقي أنا كمان هخونك .

لبني : في تكعيبة العنب برضو ..

عماد: لا .. في السلاكة .. مع الحمام ...

- عندما تصل الكاميرا للغطاء .. نراه ينسحب ببطء من فوق الو سائد حتى تصبح الوسائد عارية مكشوفة ..



#### فوتومونتاج[

#### $\Box$ (73)

- الحديقة وقت الشروق.. بينما نسمع صوت عماد
  - صوت عماد: وعلى مدار الأيام التالية ..
- باب الفيلا لنرى لبني تدفع عجلات مقعد الوالد نحو تكعيبة العنب.
  - : لم يقل عطاءها
- غرفة النوم .. لنرى عماداً يغط في نوم عميق .. بينما تميل لبنى لتحكم على صدره العارى الغطاء
  - : واحتواءها لنا
- المطبخ .. لنرى لبنى تتعاون مع أم صبري في إعداد وجبة الغداء .. بينما نلاحظ تبادلهما لأطراف حديث ودي مرح .
  - : حتى أم صبري .. الخادمة.. كان لها نصيب ..
- تكعيبة العنب .. عماد ولبنى من جهة نظر الوالد يطالعان إحدى الجرائد بينما ترفع أم صبري أطباق طعام الغداء

: كأنها منذ البداية .. اختارت أن تعطي للجميع وبلا حساب . . دون أدنى مراعاة لحقوقها ولمتطلباتها الشخصية .. وبدا ذلك بوضوح ..

- غرفة الوالد لنراه يجلس على مقعده المتحرك وقد ارتدى ثياب الخروج (قميص وبنطلون صيفي) بينما نرى لبنى تغلق الدولاب ثم تجلس على الأرض أسفل قدميه لتساعده على ارتداء الحذاء.

: عندما أصرت على أن يصحبنا والدي

- عماد يقود السيارة بينما لبنى تجلس بجوار الوالد الذي بدا في قمة السعادة في المقعد الخلفي

: في كل رحلة قمنا بها طوال أيام شهر العسل ..

- قاعة عرض سينمائي.. لنرى لبنى بين عماد والوالد الذي يظهر عليه الاندماج والاستمتاع بالعرض وهو يتناول حبة فستق ويهبط بيده ليضع القشرة في منديل تمسك به يد لبنى

: لتدلله وتعتني به .. بصورة جعلتني في بعض الأحيان ..

- ليل / مكان على النيل لنرى الثلاثة يتناولون طعام العشاء بينما نرى لبنى تطعم الوالد بيديها .

: أكاد أن أغار منه عليها .



# السيارة[

المشهد ( 74 )\_\_\_ ليل : داخلي **\_\_\_** 

- عماد يدير المحرك ويتحرك بالسيارة .
  - الوالد مع لبني في المقعد الخلفي
- تضغط لبني على يد الوالد ثم تقول لعماد بنبرة جافة آمره .
  - لبني: إطلع على البيت يا عبده.
- يضحك الوالد بينما ينظر عماد للبني في المرآة ويقول لها منصاعاً.
  - عماد: أمرك يا هانم ..
  - يميل الوالد للأمام ليلكز عماد في كتفه ثم يقول له بحدة .

الوالد: ركز في الطريق .. وبلاش تبحلق لستك لبني هانم في المرايا .. لإنك لو كلت مطب ..

- و هو يلوح بيده مهدداً
- الوالد: هاكلك قلم على قفاك ..
  - مستجيباً في خضوع

عماد : حاضر يا أفندم .. تحت أمر معاليك إنتا كمان

- يلتفت الوالد للبني ويقول لها

: على فكرة يا لولا .. أنا عندي اقتراح ..

- بجدية .

لبني : إيه هو يا بابا ..

الوالد: من ضمن الأرض إللي معانا في البلد .. فيه قيراطين دخلو كردون المدينة ..

لو بعناهم هيجيبو سعر كويس

لبني : ولزوم البيع إيه ..

الوالد: نغير العربية .. و...

- مقاطعة بجدية

لبني : أنا عندي إقتراح أحسن من ده .. ومن غير ما تبيع حاجة يا بابا ..

- باهتمام بالغ .

الوالد: إيه هو يا لولا ..

- و هي تشير نحو عماد .

لبني: نغير السواق

- ينفجر الوالد ضاحكاً .



#### تكعيبة العنب

المشهد ( 75 ) ليل : خارجي

- رقعة شـطرنج بين لبني والوالد.. بينما تجلس أم صـبري على مقربة منهما وهي تنصت للبني

لبنى: وبدال ما تيجي مواصلات كل يوم الصبح.. تيجي في تاكسي لحد باب الفيلا.. ومعاكي الطلبات اللي هنكون متفقين عليها وكاتبنها في ورقة قبل ما تمشي.

- ىاستحسان

أم صبري : والسوق عندنا جنب البيت لزق.. والأسعار هناك هاااااااادية .

- موجهة حديثها لوالد عماد

أم صبري : غير هنا خالص .. هنا ا ستغلاليين .. وكمان أقرب مكان من هنا .. حيلي بيتهد على ما أوصله

- و هي تحرك قطعة من الشطرنج.

لبني : والأجمل إنك هتروحي بدري .. يعني بالكتير نجهز الغدا سوا وتروحي.

- ممتنة

- أم صبري : ربنا يريح قلبك يا ستي ويديكي على قد ضميرك ..
  - يخرج عماد من باب الفيلا ممسكاً بملف ..
    - يشير نحو المجموعة وهو يتحرك خارجاً .
      - عماد: ما تستنونيش على الغدا ..
      - و هو يشير نحو عماد بعد اهتمام.
        - الوالد: عملت خير ..
        - و هي تهم بالنهوض.
        - لبني: هتتغدى في الجورنال ..
          - وهو يشيح بيده متجاهلاً
            - عماد: مالك إنتي بقي ؟
            - و هي تسترخي جالسة
              - لبنى: بقى كدة ؟
  - عماد: أيوه .. كده ونص .. شهر عسلك خلص إمبارح ..
    - وهو يشير نحو والده

عماد: خليه ينفعك ..

- ينصرف عماد بينما يشير الوالد لرقعة الشطرنج ويقول للبني .

الوالد: سيبك منه .. إلعبي ..

- ثم يلتفت نحو عماد وهو ينظر بغضب

الوالد: اتفوووووووووه

- تضحك لبني وهي تميل لتسقط قطع الشطرنج



## الجريدة[

# $\frac{1}{2}$

نهار : داخلي

- يو سف مع فتاة (نجوى .. بداية العقد الثالث .. يبدو من مظهرها ارتفاع مستواها الاجتماعي) تنصت له باهتمام بينما يشير لإحدى صفحات الجريدة

يوسف: حتى اختيارك للشخصيات اللي بنيتي عليها تحقيقك كان غير موفق.

- وهو يشير لصورة شاب على (2 عمود)

: بقى ده منظر واحد يتكلم عن البطالة..

- تنظر له باستغراب فيردف

: واحد لابس قميص سعره ميقلش عن ميه وخمسين جنيه يتكلم عن البطالة بأمارة إيه.

- يدخل عماد.. ليقول ليوسف وهو يجلس على مكتبه

عماد : إنتا لسه بتعانى من آثار الحقد الطبقى.

- يخبط يوسف على الصورة بيده ليجذب إنتباه نجوى وهو يقول

يوسف : كان لازم تختاري شخصيات تحافظ على مصداقية تحقيقك.

نجوى: بس أنا شايفه إن ارتفاع مستوى الشخصية الاجتماعي مبيقللش من مصداقية التحقيق..

- وهي تنظر نحو عماد الذي نلاحظ انشغاله بمطالعة الملف الذي يحمله

نجوى : إيه المانع إن ابن الوزير يحس بنفس إحساس ابن الغفير لما يلاقي نفسه اتخرج ومش لاقي فرصة عمل.

- بإحباط

يوسف: ما فيش مانع..

- وهو يطبق الجريدة

: وما فيش مصداقية في نفس الوقت.. لأن إبن الوزير لما يتخرج وما يلقاش فرصة عمل .. ممكن يلاقي ألف حاجة تعزيه أو تعوضه.. سلطة أبوه.. نفوذه .. فلوسه .. علا قاته.. لكن إبن الغفير هيلاقي عزاه في إيه وهوا ما حيلتوش حاجة غير الحرمان والعناء والفقر..

- وهو ينهض من فوق مقعده

يوسف: تحقيقك الجاي تبقي تعرضيه عليا قبل ما توديه الجمع..

- يتحرك ليجلس أمام مكتب عماد ...

- تخرج نجوى

- يرمقها عماد بنظرة ويقول ليوسف معاتباً

عماد: أحرجتها يا أخي..

- بعدم مبالاة

يوسف: عشان تتعلم .. إدتها الحرية العدد اللي فات علشان تكتسب الثقة في نفسها.. فافتكرت إنى بجاملها.

عماد : ليه .. هي متوصي عليها.

يوسف: اللي زي دي مش محتاج حد يوصي عليه.. دا إسمها لوحده كفاية.. بطاقتها الشخصية في حد ذاتها كارت توصية..

- ساخراً بمرارة

- لا يفني ولا يستحدث من عدم

عماد: إسمها إيه.

يوسف: نجوى جلال الشامي

- محاولاً التذكر

عماد : جلال الشامي اللي كان ماسك في الوزارة اللي فاتت وزير..

– مقاطعاً

يوسف: وزير غفير مش هتفرق على رأيها.. المهم..

- وهو يفتح ملف عماد

: وريني قصة العدد ده

- مستغرباً

عماد : من إمتى بتهتم بقصص الحب اللي بكتبها.

يوسف: إسلوبك في الكتابة اختلف بعد الجواز بصورة فاجأتني.. لا عذراء هنا.. إمرأة غير صالحة للحب.. العزف بأنامل تحترق.. حتى لما لجأت للكوميديا وكتبت قصة .. ظابط أمن دولت.. انتقدت أداء الأجهزة الأمنية بأ سلوب سهل ممتنع ممتع .. يوجع وما يجرحش.. لا يا عماد .. بصراحة جوازك أعاد اكتشافك كأديب..

- باهتمام بالغ

عماد: إزاي يعني ..

يو سف : حسيت في كل قصة إن فيه هدف عايز تو صل له أو رسالة عايز تو صلها.. بقى عندك الغريزة أو الشهوة اللي إتكلم عنها سقراط.

- مردفًا بعمق

عماد : شهوة إصلاح العالم..

يوسف : بالظبط.. وده خلاني فرحت لك.. وبقيت عايز أقول لك مبروك

عماد : ما إنتا كنت أول واحد يقولها لي يوم الفرح..

يوسف: يوم الفرح قلتها لعماد العريس.. زميل الدراسة .. الصديق ..

- ماز حاً

عماد : والنهاردة هتقولها لعماد العدو..

يوسف: لا .. لعماد الأديب .. صاحب القضية.. ولحاجة تانية أهم من ده كله.

- وهو يربت على كتف عماد

: عماد اللي لقى الحب الحقيقي..



#### فوتومونتاج[

المشهد (77) \_\_

- مبنى الجريدة لنرى عماداً خارجاً .. بينما نسمع صوته

ص عماد : وصدق يوسف .. فحب لبني أعاد اكتشافي .. ليس كأديب فقط..

- يدخل من باب الفيلا حاملاً عدداً كبيراً من الأكياس

:وإنما أيضاً.. كإنسان..

- المطبخ .. لنرى الأكياس وضعت على الأرض بينما يقف محتضناً لبني

: تغير طعم كل شيء.. وحالة الاستقرار التي وفرتها لي .. جعلتني أنطلق بعفوية جواد جامح

- مائدة السفرة .. لنراه ينظر بارتياح لولده وهو يتناول الطعام من يد لبنى : بعد ما شعرت بأن ظهري أصبح مؤمناً.

- شروق / السلاكة.. لنراه يمسك ب (جاروف) ليزيح بعض المخلفات من أرضية السلاكة.. بينما نسمع موسيقي مناسبة.

- تكعيبة العنب.. لنرى من خلال المزج تحول الأغصان المورفة الخضرة إلى ماي شبه جدائل السلك الشائك الصديء .. الذي التصقت على مسافات متباعدة منه وريقات جافة منكمشة وكأنها تتقوقع على نفسها من وطأة برد الشتاء.. تحت زخات المطر المتساقط على الحديقة كلها



## الريسبشن[

المشهد ( 78 ) ليل : داخلي

- لبنى ترتدي روب شتوي فوق قميص النوم وتجلس مع الوالد أمام رقعة الشطرنج وطبق فاكهة شتوية وسكين
- عماد يجلس على المائدة منشغلاً في الكتابة بينما نسمع صوت فريد من جهاز التسجيل مغنياً مطلع أغنية (قسمة)
- على رقعة الشطرنج لنرى يد الوالد تهم بتحريك (حصان) من مربع 3 أمام الملك.
  - يد لبني تمسك بيد الوالد وهي تقول محذرة
- لبني : لو حركت الحصان من مكانه هتموت في واحد (نقلة واحدة بلغة الشطرنج).
  - يلقي الوالد نظرة سريعة على عماد ثم يقول للبني هامساً
  - الوالد: حركت الحصان محركتوش.. أنا كده كده ميت.. بس مش في واحد.
    - يقرب وجهه منها ليقول بغزل

- : في واحدة..
- تضحك لبني ضحكة عالية
- يلقي عماد بالقلم على الورقة ثم يقول مخاطباً والده بحدة مصطنعة
  - عماد: جرا إيه يا عم الحاج.
  - يعيد الحصان إلى نفس مكانه على الرقعة ويلتفت نحو عماد

الوالد: مالك يالا.. بتصرخ ليه زي ما يكون سلك كهربا عريان لف حوالين رقبتك..

عماد : مهو أصل الطريقة دي ما تنفعش.. كل ليلة هتقعد تعاكس لي في الولية .. عيني عينك كده.

- تلتقط لبني ثمرة من طبق الفاكهة وتقذف بها عماد
- لبني : وأنا مش كل ليلة هقولك بطل كلمة ولية دي.
- يلتقط عماد الثمرة .. بينما يلتفت الوالد لرقعة الشطرنج.. وهو يقول للبني
  - الوالد: المرة الجاية إبقى إحدفيه بالسكين.
    - وهو يعود للكتابة
  - عماد : آه.. مانتا عايز تخلص منى علشان الجو يخلا لك.

- تشير لبني للوالد بعدم الرد ثم تقول لعماد

لبني : من غير ما نخلص منك .. احنا رايقين ومبسوطين.

- متجاوباً مع لبني

الوالد: آه.. واللي مش عاجبه يعزل

- وهي تنظر نظرة ساخرة لعماد

لبنى : ولاَّ يطلع يبات على السطوح مع الحمام..

- يضحك الوالد بشدة .. ثم يقول بشماتة

الوالد: في العشة..

- وهو يرص قطع الشطرنج

الوالد: يلا نلعب دور جديد.

- وهي تقلب القطع أمامها وبنبرة حازمة

لبنى: لا .. كده معاد نومك هيفوت..

- تنهض .. تتحرك لتصبح خلفه ثم تسحب ظهر مقعده المتحرك

لبني: بكره بقى وعليك خير..

- وهي تدفع المقعد ناحية غرفة الوالد

: أول ما عماد يروح العشة.. قصدي الشغل.. هلاعبك لحد ما تزهق وليك عليا كمان يا سيدي ..

- على عماد الذي أنصت لصوتها مبتسماً

ص لبني: هالاعبك من غير وزير..

- على وجه عماد نسمع صوت الوالد محتداً

ص الوالد: أهو ده عيبك .. لما بتغلبي دور بتتنمردي ..

ص لبنى: أنا من أسبوع.. مش غلبتك من غير الطابيتين..

ص الوالد: دور واحد.. والتاني طلع دُرُو (تعادل بلغة الشطرنج) .. والدور التالت كنت هغلبهولك .. لولا إن الزفت جوزك جه..

- يضحك عماد بينما نسمع صوت لبني مردفاً

ص لبنى : ليك عليا لوجه تاني وإحنا بنلعب أسيبه ملطوع على الباب.... يلا بقى الم...

- ينظر عماد بسعادة واطمئنان لباب غرفة نوم الوالد.. بينما نسمع صوته من المشهد القادم

ص عماد: كانت تمسك بالعصاة من المنتصف..



#### غرفة النوم[

#### المشهد ( 79 ) ليل : داخلي

- من خلال إضاءة خافتة مصدرها أباجورة غرفة النوم (ناحية لبني) .. نرى عماداً ممدداً على الجانب الأيسر من السرير وهو يتأمل لبنى التي جلست على كرسي التسريحة بينما نسمع صوته مردفاً

ص عماد: كانت تتعمد إرضاء وتدليل والدي على حسابي حتى تشبع طفولته المتأخرة.. وعندما نصبح وحدنا..

- على لبني في مرآة التسريحة لنراها تعدل مكياجها

: كانت ترضيني .. وتدللني .. على حساب العالم .

- تمسك بزجاجة عطر صغيرة تضع منها قطرتين على جانبي رقبتها

: نعم..

- تنهض لتتحرك ناحية السرير وهي تهم بخلع الروب

: فمن كثرة ما كانت تمنحني من دفءٍ .. شعرت بأن مشاعرها الفياضة الطاغية خلقت لتكفى العالم كله.

- على طرف السرير لنرى روب لبني ملقى عليه

: لكني.. استأثرت بها وحدي..

- السرير لنرى لبنى استلقت في جانبه الأيمن أسفل الغطاء مع عماد الذي مال على جانبه الأيسر ليتأملها وهو يكسر بين أصابع يده اليمنى خصلة من شعرها

: استأثرت بالشمس.. وجعلتها

- يمد يده ليطفيء نور الأباجورة فيميل أكثر على لبني

: تشرق بين ذراعي..

- يظلم الكادر بينما نسمع صوته

: وتغيب أيضاً.



## الجريدة

المشهد ( 80 ) [ نهار : خارجي

- يوسف يجلس على مكتبه وهو منهمك في الكتابة داخل ملف أسود اللون
  - نلاحظ وجود زجاجة مبيد حشرى على المكتب.
  - يدخل عماد.. يلقى نظرة ثم يشير للزجاجة ويقول بفضول
    - عماد: إيه ده يا يوسف.
    - بعدما ألقى نظرة على الزجاجة
      - يوسف: ده مبيد حشري.
    - وهو يجلس على مكتبه .. مداعباً
    - عماد : ليه؟ .. نويت تنتحر وتريحنا منك .
      - يوسف: إحتمال..
      - يعيدها بجدية أقلقت عماد
        - : إحتمال يا عماد..
        - ينهض ويذهب إليه
        - عماد : إنتا بتتكلم بجد..

يوسف : أيوه .. التحقيق ده ممكن يكون تمنه حياتي.

- وهو يضع يده على الملف

عماد: يبقى بلاش تكتبه.

- وهو ينظر لعماد بعينين دامعتين

يوسف: لو مكتبتوش فيه تمن أغلى هيندفع.

- باستغراب

عماد: تمن أغلى من عمرك؟

يوسف: أيوه..

عماد : وإيه التمن ده..

يوسف: بكرة

عماد: بكرة بتاع مين..

يوسف: بكرة بتاع مصر..

- يسحب عماد يده من فوق الملف. وينظر لزجاجة المبيد بينما يردف يوسف

يوسف : عرفت إن التمن اللي هيندفع لو مكتبتش.. أغلى خمسين مليون مرة.. من التمن اللي هيندفع لو كتبت.

- وهو يشير للزجاجة

عماد : بس مش مبالغة يا يوسف إن قزازة زي دي.. تهدد مستقبل خمسين مليون مصري.

يوسف: المبيد ده صناعة إسرائيلية .. متهرب بحسن نيه عن طريق بدو سينا .. وقع في إيدين سمسار من سماسرة الانفتاح.. سوّقه بسوء نية لمحلات بيع المبيدات والأسمدة .. اللي باعته بدورها للفلاحين.

- وهو يتفحص الزجاجة

عماد : لكن غلاف القزازة مكتوب عليه بالعربي.

يوسف : غلاف مطبوع في مطبعة من بتوع بير السلم.. لو قشر ته هتلاقى تحته الغلاف الأصلى..

- ينزع عماد جزءاً من الغلاف لنرى تحته مصطلحات باللغة العبرية .. يضع الزجاجة على المكتب ويقول ليوسف

عماد: إتأكدت إن المبيد ده مسرطن..

- بنبرة مهمومة

يوسف: واتأكدت كمان من اللي أبشع من سرطنة المبيد ..

- باهتمام بالغ

عماد: إتأكدت من إيه ..

- بِغِلِّ وحنق

يوسف: من سرطنة الضمائر.. ضماير ماتت وعفنت جوا أجساد مستخبية في البدل المستوردة والمكاتب المكيفة.. ضماير قبلت إنها تخلي من حبة الخضار ومن ثمرة الفاكهة أفخاخ للسرطان والفشل الكلوي وأمراض تانية بقت بتنهش زي الكلاب الجعانة في لحم الناس.

- بحسرة

يوسف: فيه مسئول في وزارة الزراعة متواطئ مع المستثمر..

- بمرارة

: نوع مقيت من أنواع التحالف بين أصحاب السلطة والنفوذ وسماسرة المال الحرام.. علشان كده .. بمجرد ما نو هت عن التحقيق في العدد اللي فات بدأت المساومة.. وعروض الرشوة .. ولما رفضت .. هددوني بالقتل..

- بحماس فاجأ يوسف

عماد: نَزِل إسمى معاك على التحقيق ده.

يوسف: بس إنتا كده هتخسر جمهورك .. اللي اتعود يقرا اسمك على قصة حب .. أو حلقة من رواية..

- بتصمیم

عماد : الجمهور اللي مي قدرش قيمة اللي في التحقيق ده .. من حب وإخلاص ونكران ذات .. ميهمنيش أخسره.

- بسعادة وهو يغلق الملف

يوسف: بس أنا يهمني إن قلم أديب موهوب زيك ما يتعطلش...

- وهو يقف أمامه

يوسف: خصوصاً بعد ما لقي هدفه ومعركته..

- بقلق وإشفاق

عماد: بس أنا خايف عليك يا يوسف..

- یفتح درج مکتبه

يوسف: متخفش..

- وهو يضع الملف في درج المكتب

: ملف التحقيق ده مش هيتقفل.. غير لما يتقفل عليا باب قبرى.

- على زجاجة المبيد بينما نسمع صوت إغلاق درج المكتب



## تكعيبة العنب[

## المشهد ( 81 ) [ غروب : خارجي

- السلاكة .. ثم قرص الشمس الذي أوشك على الغروب..
- تكعيبة العنب .. لنرى الوالد على مقعده وهو واجم ومصفر الوجه
- لبني على مقعد أمام مقعده المتحرك تمسك بطبق (شوربة خضار) وتطعمه...
  - يرد الوالد يدها التي تمسك بالملعقة

الوالد: بس .. مش عايز..

- تضع الملعقة في الطبق .. ثم تقول له بنبرة قلقة

لبنى : لا .. إنتا ليك يومين مش عاجبني..

- نسمع صوت محرك سيارة.. تلتفت ناحية باب سور الفيلا ثم تقول للوالد

لبني : كويس .. أهو عماد جه..

- تنهض وهي تقول له

: يلا أدخلك جوه علشان عماد يتصل لك بالدكتور

- ينظر ناحية عماد ثم يهمس لها

الوالد: لو جبتي لجوزك سيرة هزعل منك..

- تنظر له بعتاب حتى يدخل عماد الكادر..

- يميل على الوالد

عماد : كنت بتوشوش الولية وأنا داخل بتقول لها إيه..

- بنبرة متهالكة

الوالد: كنت بقول لها تتصل بالمحامى..

- ينظر للبني بقلق

عماد: ليه .. حصل حاجة؟

- تنظر لبني للوالد بإشفاق ولا ترد .. فيقول الوالد لعماد

الوالد: اطلبه خليه يجي يا بني..

– بقلق

عماد : علشان إيه؟

- بنبرة واهنة

الوالد: علشان يكتب لى الوصية .. أنا كل ليلة ما بنمش من القلق.

- رد فعل على لبني وعماد

: لازم أحسم موضوع الميراث بينك وبين إخواتك البنات ..

- من جهة نظر الوالد .. تستعرض الكاميرا الحديقة وواجهة الفيلا .. وكأنه يلقي عليها النظرة الأخيرة ليودعها بينما نسمع صوته

ص الوالد: هكتب لك الفيلا والعربية.. علشان تعيش مستقر مع مراتك..

- على لبني التي بكت وهي تنصت له

الوالد : وهدِّي إخواتك نصيبهم .. في أرض البلد والفلوس اللي في البنك.

- وهو يربت على كتف الوالد بحنان

عماد : وليه تظلم نفسك يا حاج.. مش يمكن الفيلا والعربية يكونو أكتر من نصيبي في الميراث..

- بنبرة من حسم قراره

الوالد: ده لو افترضنا إن نصيبك الخمسين .. والباقى للتلت بنات إخواتك.

- وهو ينظر للبني نظرة عرفان وحب

: لكن ربنا العالم .. إنه إداني بنت رابعة .. في أواخر أيامي.. علشان تديني اللي أغلى من الفيلا ... ومن الأرض ومن الفلوس.. ومن ملك الدنيا كلها

- يمد الوالديده للبني .. تمسك لبني يده ..
- ي سحب الوالد يد لبني ليقربها من فمه ويطبع عليها قبلة ثم يقول لعماد وهو يتأمل لبني

الوالد: أنا ليا ولد وأربع بنات.. علشان كده.. إنتا ومراتك ليكم النص في الميراث..

- على قرص الشمس.. الذي ابتلعه الأفق بعدما خلف وراءه بقعة داكنة الإحمرار.



## فوتومونتاج[

 $\Box$ (82) المشهد

- غرفة نوم الوالد .. لنراه نائماً وهو في قمة العناء ولبنى تجلس بجواره على طرف السرير .. بينما نسمع موسيقي مناسبة تظل معنا طوال المشهد
  - الجريدة .. لنرى عماداً منشغلاً مع يوسف في مطالعة أحد أعداد الجريدة.
- غرفة نوم الوالد.. لنرى عماداً يقف على عتبة باب الغرفة ونرى لبنى من جهة نظره وهي تعدل وسادة تحت رأس والده ..
  - ليل / الحديقة.. ثم شباك غرفة النوم..
  - غرفة النوم.. لنرى عماداً نائماً بمفرده..
- غرفة نوم الوالد.. لنرى ذراع لبنى الأيسر تحت رأس الوالد .. بينما يدخل عماد مرتدياً الروب ليلقي عليهما نظرة ثم يحكم الغطاء فوق جسديهما (لبنى والوالد)
- السلاكة/ نهاراً .. عماد يمسك بفرد حمام (فرخ) ليتفحص جناحيه .. فجأة نسمع صوت لبني يشق المقطوعة الموسيقية صارخاً
- يلقى عماد بفرد الحمام.. الذي رفرف بجناحيه ساقطاً على الأرض في لقطة يطبئة.

- شادر عزاء .. عماد مع عزت والنقيب حسن ويوسف وعدد من الرجال يصطفون في مقدمة الشادر..
- ريسبشن الفيلا .. لبني مع زوجة عزت و شقيقتها عايدة و شقيقات عماد الثلاث بين عدد من النساء المتشحات بالسواد.
  - على كرسي الوالد المتحرك.. الذي طبق مقعده ووضع بجوار باب غرفة الوالد.



## تكعيبة العنب[

- عماد .. الذي نلاحظ أن لحيته قد نبتت بشكل يوحي بمرور أسبوع.. يجلس ليطالع رزمة مكتوبة من الورق.
  - لبني تضع فنجان قهوة أمامه وتجلس بعدما أمسكت في يدها ظرفاً كبيراً.
    - يمسك بالفنجان ويقول لها
    - عماد : مادخلتيش ليه كرسي المرحوم جوه الأوضة بتاعته.
    - لبني : علشان أقرأ الفاتحة على روحه كل ما عيني تقع عليه.
  - يأخذ رشفة من الفنجان.. تلتقط لبنى الأوراق من أمامه وتطالعها .. ثم تقول لبنى : أخيراً خلصتها..
    - وهو يضع الفنجان على المائدة
    - عماد : كويس إني عرفت أكملها وأنا في الحالة دي..
      - وهي تضع الظرف أمامه

لبنى : طب إيه رأيك لو تجرب نوع جديد من الكتابة ..

- يفتح الظرف باهتمام.. يطالع ثلاثة كتب بداخله تحمل عناوين عن كتابة السيناريو .. بينما تقول له لبني .

لبنى : جمهور الأدب المقروء قلَّ قوي .. والسينما والتليفزيون سحبوا البساط من الكتاب..

- بنبرة محفزة

: ليه متكتبش السيناريو لقصصك .. ليه ما تحاولش تخلي من حمودة بطل رواية ( دماء فوق أصابع لاهية ) وفايزة بطلة قصة (امرأة غير صالحة للحب) .. شخصيات من لحم ودم بتتحرك على الشاشة..

- بحماس

: إنتا عندك عدد كبير من القصص ممكن..

- مقاطعاً

عماد : أنا فكرت في ده كتير.. وكان في دماغي إني أعرض شغلي على سيناريست عرفني بيه يوسف..

- وهو يفتح أحد الكتب

- : لكن أكتب السيناريو بنفسي.. ده..
  - مكملة بحماس أشد
- لبنى : ده اللي تقدر عليه بسهولة مع إنك مفكرتش فيه ..
  - تسحب الكتاب من يده
- : إنتا تقوم تحلق دقنك .. وعلى ما تاخد حمامك أكون جهزت لك الغدا..
  - تنهض.. لتسحبه من يده
  - : وبعد الغدا تنقى لك كتاب
    - وهي تشير للكتب
    - : من دول وتذاكره..
  - على الكتب فوق المائدة بينما نسمع صوتها
    - ص لبني: لأني همتحنك فيه قبل ما ننام.



#### فوتومونتاج[

#### المشهد ( 84 )

- الحديقة .. عماد يطوف حول الشجرة وهو يطالع الكتاب باهتمام..
  - غرفة النوم.. لبني تتحدث عبر الهاتف مع شقيقتها عايدة .
- الجريدة.. عماد على مكتبه.. يفرد صفحة بيضاء أمامه ثم يخط في أقصى يمين أول سطر، المشهد ( ) .. ثم في أقصى يسار أول سطر، ليل أو نهار / داخلي أو خارجي، ثم في منتصف أول سطر ، (مستشفى)
  - مدخل مستشفى .. لنرى لبني تدخل من الباب مع عايدة..
- قاعة سينما .. لنرى عماداً يجلس لمشا هدة أحد الأفلام (أحد عروض صيف 91)
  - لافتة عيادة طبيب أمراض نساء.. لنرى لبني تدخل مع عايدة.
  - مكتبة معهد السينما .. لنرى عماداً يستعرض عدداً من الكتب.

- دور أرضي في أحد المباني تعلوه لافتة كتب عليها «المركز الطبي لعلاج العقم»
- داخل المركز.. لنرى لبنى تخرج من إحدى الغرف وهي تبكي ومن خلفها عايدة تنظر لها بإشفاق بالغ.
- تكعيبة العنب.. لنرى عماداً يطالع (أَكْلَسير) كبير به عدد من صفحات الجرائد التي تحمل قصصه.. بينما نلاحظ على المائدة فنجان قهوة فارغ وكوب ماء ممتلئ.
  - لبني التي بدت باهتة الملامح تتقدم ناحيته .. وهي ترمقه بنظرات حزينة..



### تكعيبة العنب

المشهد ( 85 ) نهار : خارجي

- يغلق الأكلسير ويقول بعصبية

عماد: لا بقى .. أنا زهقت..

- يلتفت للبني ويقول بحدة

: صعب يا لبني .. صعب..

- تنظر له لبني بإحباط .. فيردف بنبرة شكوى

عماد: ده نوع من الكتابة محتاج إن الكاتب يمسك في إيد قلم .. وفي التانية ميكروسكوب .. التفاصيل الصغيرة .. ضرورة معايشة وتقمص كل شخصية مهما كان حجم دورها.. علشان أقدر أوْصَل لواقعية أدائها في الكلام والانفعال والحركة .. الصورة والصوت عاملين زي قضيبين قطر لازم يمشو بالتوازي جنب بعض.. أحجام للقطات ونسب لزوايا ومصطلحات معقدة وغريبة ومجعلصة ..

- بملل

- :أنا خلاص .. مش هكمل..
- تقف أمامه وهي مصدومة
  - يتأملها برهة ثم يقول لها
- عماد : إنتى مش قريتي كل اللي كتبته قبل الجواز وبعده..
  - بنبرة مختنقة
  - لبنى : آه .. ليه.
  - وهو يدفع الأكلسير على المائدة ناحيتها
- عماد : عايزك تختاري لي عمل منهم علشان أكتب له السيناريو.
  - تنظر له بغيظ ..
  - ينظر لها مبتسماً ثم ينفجر ضاحكاً
- تمد يدها لتلتقط كوب الماء .. ترفعه إلى فمها لكن قبل أن يلمس شفتيها تقذف ما فيه من ماء على وجهه .. ثم تعدو ناحية باب الفيلا .
  - يمسح عماد الماء عن وجهه ثم يعدو خلفها.



### أسفل الشجرة[

المشهد (86) ليل: خارجي

- عماد يرتدى روب صيفي فوق ملابس خفيفة .. ويجلس على مقعد خلف المائدة التي كانت أسفل التكعيبة ليطالع ملفًا.
- تخرج لبنى من باب الفيلا لتنحرف يميناً نحو التكعيبة ثم تتوقف برهة تستدير بعدها لتسير نحو الشجرة .
  - يلاحظ عماد ذلك فيبتسم ثم يقول
  - عماد : رجليكي لسه واخدة على قعدة التكعيبة.
    - وهي تجلس أمامه
    - لبنى : وإيه الداعى علشان تغيرها؟
      - وهو يغلق الملف
  - عماد: القعدة تحتها بتفكرني بالمرحوم ..ده غير إنها في الصيف بتلم الناموس..
    - وهي تنظر للملف أمامه
    - لبني : وأخبار الشغل إيه..

عماد : إختيارك لرواية نصف رجل .. كتاني عمل أكتب له السيناريو كان موفق.. من أول الا سم اللي طلع تجاري على حد تعبير المنتج .. مروراً بالمو ضوع اللي بيناقش قضية الزوجة الثانية من زاوية جديدة خالص على الدراما.

- نلاحظ شرود لبني بينما يردف عماد

عماد: الزوج اللي بيتجوز على مراته في أقصى حالات توفيقه بيعدل بين الزوجتين . . يعني بيقسم نفسه وماله ومشاعره بالتساوي بينهم .

- ينظر للبني نظرة قلقة ثم يردف

عماد: ولأن ماجدة أستاذة جامعة وبرغم صعوبة عملها تفانت وضحت كزوجة بمنتهى المثالية زي ما أبرزت ده في أول تلت فصول.. بيعصف بيها قرار الزوج المجحف.. فبتقرر إنها تعاقبه عقاب من جنس العمل.. فبتديه نصحقو قه كزوج.. لأنه بالنسبة ليها بقى نصف رجل..

- يصمت .. فتنتبه لصمته.. وتقول له بروتينية

لبنى : جميل..

- متفادياً أسلوبها البارد

عماد : الأجمل إن في نهاية الرواية بنحل الموضوع وبنقرب وجهات النظر بصورة توضح مغزى الحكمة الإلهية في السماح بتعدد الزوجات..

- يلاحظ لمعان الدمع في عينيها فيقول بقلق

عماد: مالك.. إنتي فيكي حاجة..

- وهي تمسح عينيها

لبنى : فيه موضوع مش هقدر أخبيه عليك أكتر من كده..

- تبكى وهى تقول

: موضوع لما تعرفه .. إحتمال أبقى بالنسبة لك..

- وهي تنهض بعدما أشاحت بوجهها عنه

: نصف امرأة..



#### فوتومونتاج[

#### $\Box$ (87) المشهد

- غرفة النوم .. لنرى لبني تتحدث وهي منهارة ... بينما نسمع

ص عماد: بعد و فاة والدي بدأت تنتبه لمسألة الحمل.. فدخلت في دوامة من الكشف والفحوصات والأدوية.. انتهت باكتشاف وجود عيب خلقي يمنعها من الإنجاب.. وأن هذا العيب يتطلب إجراء جراحة يلزم لها موافقة الزوج..

- تستلقى على صدره لتجهش باكية

ص عماد: لذلك أخبر تني .. حتى تنال مو افقتي ..

- واجهة مستشفى

: فوافقت..

- باب غرفة عمليات .. لنراه يقف منتظراً مع عزت والنقيب حسن وعايدة

: وأجريت الجراحة..

- من باب غرفة العمليات تخرج طبيبة.. يتحرك نحوها بسرعة ليسير معها في الطرقة وعزت من خلفه

- : التي عرفت من الطبيبة أنها تمت بنجاح...
- غرفة بالمستشفى .. عزت وزوجته يخرجان من الباب..
  - لبني نائمة بينما يجلس عماد على طرف السرير..
    - : كنت في غاية الإشفاق عليها.
- ينظر خلفه ليطمئن إلى إغلاق الباب ثم يلقي برأسه على صدرها
  - : لأني كنت واثقاً من أنها تحملت كل ذلك من أجلى..
  - باب المستشفى لنراها تخرج مستندة إلى ذراع عماد
    - : ومضت شهور بعد خروجها من المستشفى..
- غرفة النوم .. لنرى لبني تخرج من الحمام الداخلي وهي في غاية الحزن
  - ص عماد: دون أن يتحقق لها ما تمنت..
  - تنام معطية ظهرها له وهي في غاية الهم
    - : فبدأت في التغير...
  - أسفل الشجرة.. لنراها تضع طعام الإفطار وهي متجهمة الوجه
    - : أصبحت كزهرة قطفت ...

- مكان على النيل .. تتناول معه طعام الغداء دون شهية
  - : كلما مر الوقت كلما ازداد ذبولها..
- السيارة.. تنظر عبر الشباك بينما ينظر عماد لها وللطريق تباعاً
  - : رأيتها تشيخ..
  - سور الفيلا .. يتابع هبوطها بتثاقل من السيارة

: تتفتت..

- غرفة النوم .. لنلاحظ علب الأدوية وصور الأشعة منتشرة في أرجاء الغرفة (التسريحة .. الكيمودينو وعلى المقعد الثاني للمائدة الأرابيسك) بينما نرى عماد يجلس على المائدة الأرابيسك وهو منشغل في الكتابة.. ولبنى تسير نحوه بخطوات متخاذلة وهى تمسك بكوب عصير..

صوت عماد: تذوب كمكعب ثلج..

- على وجه لبني الذي نراه قد اعتراه الإصفرار
- يسقط كوب العصير من يدها.. تترنح برهة .. توشك خلالها على السقوط.. لولا لحاق عماد بها واحتضانه لها بينما نسمع صوته

ص عماد:حتى كادت أن تتلاشى..



## غرفة النوم[

المشهد (88) ليل : داخلي

- على باب غرفة النوم يودع عماد الطبيب..
- غرفة النوم.. لنرى عماداً يضع ورقة على المائدة الأرابيسك (رو شته) ثم يتحرك نحو لبني التي نامت في منتهى الإعياء فوق السرير
- يجلس على الأرض بين الدولاب والسرير.. يمد يده ليتحسس جبهتها .. فترفع يدها لتلمس يده..
  - يهبط بيدها لتصبح فوق صدرها وهو يقول لها
    - عماد: ليه كده يا حبيبتى؟
      - معاتباً
- : إنتي على حد تعبير الدكتور بتنتحري.. كم الأدوية والعناء النفسي اللي إتعر ضتي له دمر صحتك .. ليه كل ده ؟
  - بنبرة متهالكة
  - لبنى : لأني عمري ما هقبل أكون سبب لحرمانك من شيء .. بيتمناه أي راجل..
    - ىحدة

عماد : الأماني اللي تتحقق على حساب صحتك متلز منيش..

– بحنو

لبنى: مبتتمناش يكون لك إبن..

عماد : أمنية عادية إتحققت بعدد البشر.. من زمن سيدنا آدم لحد دلوقت.. أمنية متغيرنيش ..خصوصاً بعد ما ربنا ..

- يترك يدها ليتحسس شعرها

: إداني .. وحقق لي أمنية كانت أكبر من إني حتى أتمناها..

- وهو يميل ليقبل يدها التي لازالت فوق صدرها

: إن يبقى ليَّ أم.

- وهي تضم رأسه على صدرها

لبنى : لأني أم.. مش هغفر لنفسي حرمانك

- وهو يستلقى على صدرها في براءة طفل

عماد : لأنك أم.. مش هغفر لنفسي عذابك.

- بنبرة مرتعشة..

لبنى : إتجوز واحدة تانية يا عماد..

- يرفع رأسه ويقول لها بحسم

عماد : لو صممتي إن ده يحصل ..عمري ماهغفر لك عذابي.

- تنظر له برهة.. تسيل من عينيها خلالها الدموع.. ثم ترفع يديها لتتحسس خديه .. ثم تشده ليهبط برأسه على صدرها.. لتضمه بقوة.



## $\square$ المدر (89)

#### فوتومونتاج[

- لوكيشن في منطقة ساحلية.. ا ستعدادات ما قبل التصوير.. في أحد الأركان عماد مع المخرج يطالعان نسخة من السيناريو.
- أمام الفيلا.. أم صبري تهبط من التاكسي .. ومن المقعد الخلفي تهبط سيدة عجوز ترتدي ملابس بدوية تحمل حقيبة (هاندباج) على كتفها .
- غرفة نوم الوالد.. لنرى لبنى مع البدوية على الأرض وبينهم خرقة من القماش عليها عدد من الأصداف بينما تدخل أم صبري وهي تحمل مبخرة ممتلئة بالفحم المشتعل.
- لوكيشن داخلي.. وقت التصوير.. لنرى عماد في مكان بعيد خلف الكاميرا يتابع المشهد باهتمام (يمكن الاستعانة ببعض النجوم كضيوف شرف).
- الحمام الداخلي لغرفة النوم .. تلتف بالبشكير .. تغلق الماء بعد امتلاء البانيو ثم تفرغ كيس به حفنة من أوراق الشجر على الماء ثم تلتقط ورقة من فوق مرآة الحمام لتطالعها باهتمام.
- على لافتة تحمل كلمة «المونتاج» على يمين باب.. نراه ينفتح ويخرج منه عماد وعلى وجهه تعبيرات الارتياح والرضا.



## غرفة النوم وشقة عزت

#### المشهد ( 90 ) نهار : داخلي

- لبني في قمة السعادة وهي تتحدث عبر الهاتف

لبنى : بجد .. الكلام ده حقيقى يا أبيه

– مؤكداً

عزت: وده كلام ينفع فيه هزار..

- يمد السماعة لسناء

عزت: خدى علشان مش مصدقاني..

- تلتقط منه السماعة

سناء : أيوه يا لبني..

- تبتسم وهي تنظر لعزت

: أيوه والله بجد.. هدى حامل دلوقت .. وفي شهرها السابع..

- تقول لها بنبرة لوم

لبنى : يعنى ربنا كرمها من زمان .. طب ما قلتيش ليه من بدري ..

سناء : أنا معرفتش غير من شوية.. أصلها كانت مخبية علشان خاطر تخزي العين... بعد عذاب خمس سنين..

لبنى : عندها حق .. ربنا يتم ليها على خير ..

- بحيرة

: بس الدكتور ده في إسكندرية .. وبعدين عمر عماد ما هيقبل إني أعمل عملية تانية ..

سناء : ده دور عزت بقي .. وبعدين الموضوع ده ممكن يتم من غير ما عماد يعرف ..

- تلتفت لبنى ناحية الباب ثم تقول هامسة

لبنى : إقفلى دلوقت يا سناء.. هكلمك بعد شوية

- يدخل عماد فتقول له

لبنى: إيه .. نسيت حاجة..

- وهو ينظر للمائدة الأرابيسك

عماد: دعاوى العرض الخاص.. كانت ع الترابيزة.

- وهي تشير لدرج التسريحة

لبنى: أنا شيلتها في الدرج.

- يفتح درج التسريحة .. ينظر لمحتواه بضيق..

- يخرج ظرفاً من الدرج يضعه على التسريحة ثم يسحب الدرج بعصبية ليفرغ محتواه على الأرض

عماد : تاني يا لبني .. تاني ..

- على الأرض .. لنرى عدداً كبيراً من علب الأدوية والروشتات.



# الجريدة

#### المشهد ( 91 ) نهار : خارجي

- يو سف يفرد ماكيت صفحة من الجريدة على المكتب وهو يشير بقلم لـ شاب في منتصف العقد الثالث..

يوسف : عايز إمكانياتك كسكرتير تحرير تظهر في التحقيق ده يا علاء.. أنا اللي يهمني الآتي..

- يرسم مربعاً في يمين الصفحة

يوسف: تنزل لي هنا صورة للنائب العام على اثنين عمود

- يرسم مربعاً في يسار الصفحة

: وهنا صورة لوزير الزراعة على اثنين عمود

- يجر خطين في منتصف الصفحة بين المربعين وهو يقول

: وهنا .. بالبنط اللي تشوفه مناسب تنزل العنوان .. بلاغ إلى من يهمه الأمر .

- وهو يمد له الماكيت

: أما المادة والصور.. فهبعتهم لك أول ما تيجي نجوي.

- يخرج علاء.. ويدخل عماد.. الذي أخرج دعوة من الظرف ومدها ليوسف.

عماد : مكنش ينفع إن أول دعوة تبقى لحد غيرك.

- يلتقط الدعوة ثم يحتضن عماد وهو يقول له

يوسف: وأنا لو فيلمي كان ينفع يتعمل له دعوات .. مكنتش دعيت حد قبلك..

– بسعادة

عماد : يعنى عايز تقول إن معاد عرضك قرب

يوسف : أيوه .. وآخر مشهد هَتْدُور عليه المطبعة النهاردة

- يحتضنه بقوة

عماد: ربنا يوفقك يا يوسف.. ربنا يحميك يا صاحبي..

- يلتفت مغادراً .. فيستوقفه يوسف

يوسف: ما تستنا نشرب فنجان قهوة سوا..

- وهو ينظر لساعته

: أنا كمان نازل بعد شوية

عماد : هشربه مع رئيس التحرير.. لأن ليه دعوة معايا..



## الشارع أمام الجريدة [

لشهد ( 92 ) نهار : خارجي

- الشارع أمام الجريدة.. لنرى على بعد أمتار من مدخل الجريدة سيارة جيب موديل (90) بها رجل (1) يرتدى بذلة كاملة يجلس بجوار السائق وهو يطلب رقم من هاتف السيارة.
- أمام مدخل الجريدة مباشرة .. تقف دراجة بخارية يركبها رجل (2) الذي نراه يتحدث مع رجل (3) الواقف بجواره بحيث يحجب نصفه الأسفل جسم الدراجة التي وقفت بينه وبين مدخل الجريدة .
  - على سيارة عماد الواقفة أمام المدخل.



# الجريدة

# المشهد ( 93 ) نهار : خارجي

- ممر في الجريدة ينتهى بغرفة رئيس التحرير..
- يخرج عماد ليسير مسرعاً في الطرقة التي تؤدي إلى الأسانسير..
  - يقف أمام باب الأسانسير في انتظار المصعد ..
    - يلتفت خلفه بعدما سمع صوت يوسف
    - يوسف: كده يبقى لك نصيب تتغدا معايا..
      - وهو يفتح باب الأسانسير
    - عماد : ده إنتا اللي ليك نصيب أوصلك للبيت.
- يدخل عماد.. ويهم يوسف بالدخول لكنه يضع يديه في جيوبه ثم يقول لعماد
- يوسف: معلش يا عماد .. نسيت المفاتيح في درج المكتب.. هجيبها وأحصلك..
  - وهو يغلق باب الأسانسير
    - عماد : متتأخرش.



# الشارع أمام الجريدة [

المشهد ( 94 ) نهار : خارجي

- عماد على المقعد داخل سيارته .. يلقى نظرة على مدخل الجريدة ..
- السيارة الجيب.. لنرى يوسف من جهة نظر الرجل (1) خارجاً من مدخل الجريدة..
- الدراجة البخارية.. لنرى رجل (3) يسحب من بين نصفه الأسفل وجسم الدراجة بندقية آلية يصوب فوهتها ناحية يوسف.
  - على يوسف الذي أصبح أمام مقدمة سيارة عماد مباشرة...
  - وابل من الأعيرة النارية ينطلق من بندقية رجل (3) نحو يوسف
- جسد يوسف الذي اخترقته الأعيرة النارية .. يترنح في لقطة بطيئة .. بينما نرى عماداً متخشباً على مقعده من هول المفاجأة..

- يو سف يتحسس بيده اليمنى مكان الأعيرة في صدره ثم يسقط على مقدمة سيارة عماد.
- الدراجة البخارية .. لنرى رجل(3) قد ركب خلف رجل (2) الذي انطلق بها مسرعاً.
  - على الأرض.. عماد يحتضن يوسف الذي فارق الحياة بين ذراعيه
    - على مقدمة السيارة لنرى دماء يوسف قد تناثرت عليها.



# غرفة النوم

# $\Box$ (95)

#### ليل : داخلي

- الكاميرا داخل الغرفة المظلمة .. ينفتح الباب .. فنرى لبنى تدخل منه عبر إضاءة خافتة مصدرها فتحة الباب.. لتسير ناحية السرير وتضيء الأباجورة ناحية اليمين..

- عماد نائم في مكانه المعتاد.. تفتح لبني الدولاب لتخرج بذلة سوداء تضعها على طرف السرير ثم تميل لتوقظ عماد

لبني: عماد .. عماد..

- بعدما انتبه لها

: يلا قوم .. الساعة داخلة على سبعة

- يعتدل على جانبه الآخر

عماد: مش رايح .. طفي النور..

- تربت على كتفه

لبني : مش هينفع .. وبعدين إنتا كده بتعاقب يوسف مش بترضيه..

- وهي تتحسس شعره بحنو

: صدقني .. إنتا كده بتتعبه في نومته.. الميت بيحس زى العايش وأكتر.. وبيفرح لفرح اللي كان بيحبهم.. وبيزعل لزعلهم.. قوم علشان خاطر يوسف..

- يتحرك بتثاقل حتى يصبح في وضع الجلوس

- تلتف لتصبح أمامه.. تميل لتحتضن رأسه وهي تقول

: وعلشاني..

- تضع يديها على خديه.. ثم تبعد رأسه عن صدرها وترفعها لتتأمل عينيه وهي تقول بعدما ابتسمت ابتسامة خفيفة

: ما أنا مش هينفع أروح لوحدي.



# فوتومونتاج[

## $\Box$ (96)

- قاعة عرض سينمائي .. لبني بجوار عماد الذي ينظر بشرود للشاشة..
- صالة قاعة العرض.. لنرى بو ستراً مطبوعاً يحمل ا سم الفيلم (امرأة غير صالحة للحب)
- يخرج عماد من باب قاعة العرض.. ليسير بخطوات مسرعة مع لبني التي تنظر له بقلق بالغ..
  - شارع .. لنرى سيارة عماد تنطلق فيه بسرعة جنونية ..
- باب سور الفيلا .. لنرى السيارة تتوقف ولبنى تهبط منها بعصبية وتغلق الباب.. ليتحرك عماد بنفس السرعة بالسيارة..
  - مبنى الجريدة لنرى سيارة عماد أمام المدخل..
  - مكتب يوسف لنرى عماد يضئ النور ثم يتحرك ناحية المكتب..



# الجريدة[

المشهد ( 97 ) ليل : داخلي

- خلف مكتب يوسف .. يقف ليتأمل أرجاء الغرفة وكأنه يبحث عن طيف يوسف.. بينما نسمع موسيقي مناسبة .

- يجلس على المقعد .. ثم يميل على المكتب حتى يلامس صدره.. يمد يديه على سطح المكتب.. ليتحسسه وكأنه يفتش عن بصمات يوسف فوق زجاجة .. بينما نسمع جزء من حوار عماد ويوسف من مشهد ( 80 )

ص عماد: إتاكدت إن المبيد ده مسرطن..

ص يوسف: واتأكدت كمان من اللي أبشع من سرطنة المبيد.

ص عماد: إتأكدت من إيه

ص يوسف: من سرطنة الضمائر...

- تعود الموسيقي على وجه عماد الذي رجع بظهره ليستند على كرسي المكتب وهو ينظر إلي الدرج.. بينما نسمع صوت يوسف من نفس المشهد

ص يوسف: ملف التحقيق ده مش هيتقفل .. غير لما يتقفل عليا باب قبري..

- يقشعر جسد عماد وهو يمديده ليفتح الدرج..
- يلقى نظرة حزينة على الملف .. ثم يخرجه ليضعه على المكتب..
- يفتح الملف ويخرج ورقة بيضاء .. يضعها عليه .. ثم يمسك بالقلم ليكتب عنوان مقالة .. بينما نسمع صوت سير ماكينة الطباعة
  - على الملف لنرى ما يخط عماد ..

«مستقبل مصر بين سرطنة الغذاء وسرطنة الضمائر»

(من قتل يوسف سرحان)

مقال لـ عماد حلمي.



# فوتومونتاج[

المشهد (98)

- على مبنى إداري في منطقة راقية .. بينما نسمع من المشهد السابق صوت سير ماكينة الطباعة
- مكتب فخم يجلس خلفه رجل مهيب الطلعة (المستثمر) وهو يقلب في صفحات الجريدة بيد وبالأخرى يمسك بهاتفه بينما نرى رجل (1) في مشهد (92) يقف أمامه صاغراً منحنياً.
- مكتب عماد بالجريدة ومكتب المستثمر في عدة لقطات يتبادلان فيها حواراً يبدأ محتداً ثم ينتهي هادئاً.
  - عماد يضع السماعة على الهاتف بعنف لا يتناسب مع نهاية الحوار..
- المستثمر .. يلقي بالجريدة في وجه رجل (1) في نفس توقيت اختفاء صوت سير ماكينة الطباعة من على شريط الصوت .. لنسمع موسيقي مناسبة.
  - باب سور الفيلا .. لنرى سيارة عزت تتحرك وبجواره تجلس لبني..
- مبنى هيئة الرقابة الإدارية من الخارج .. ثم مكتب داخله.. لنرى عماداً يجلس مع عدد من المسئولين وهو يتحدث معهم بجدية وانفعال.

- كورنيش الإسكندرية .. ثم واجهة مستشفى..
- لبني تدخل غرفة العمليات على سرير متحرك
- مزج / ممشى في أحد نوادي القاهرة لنرى عماداً يسير مع المستثمر وهو ينصت له باهتمام.
- طرقة بالمستشفى .. لنرى لبنى فوق مقعد متحرك تدفعه ممرضة داخل غرفة تعلوها لافتة (غرفة الأشعة).
- مكتب بالرقابة الإدارية.. لنرى عماد وهو ينظر باهتمام لرجل (مختص) يقوم بتثبيت جهاز تنصت داخل الجاكت.
- غرفة لبنى بالمستشفى . . لنرى طبيبًا يستعرض الأشعة . . ثم يومئ مبتسماً للبنى التي نظرت لسناء بسعادة . . بينما يميل عزت ليقبل رأسها.
  - مطعم فندق خمس نجوم.. عماد مع المستثمر على مائدة يتناو لان الطعام.



# المطعم

المشهد ( 99 ) نيل : خارجي

- عماد .. الذي فرغ من تناول طعامه ينظر للمستثمر الذي لازال يأكل بنهم..
  - يلاحظ المستثمر نظرات عماد

المستثمر: بتبص لي كده ليه يا عماد بيه..

- بضيق لم يفلح في إخفائه

عماد: بستغرب يا أخي..

- بقلق .. بعدما توقف عن تناول الطعام

المستثمر: على إيه ؟

عماد: على نفسك المفتوحة..

- بسرعة بعدما لاحظ تجهم وجه المستثمر

عماد: لو المرحوم يوسف كان عايش.. وشاف سيادتك وإنتا بتاكل .. مكنش ضحا بعمره علشان خاطر حملة تحقيقات خايبة زي اللي عملها..

- ساخراً

: قال مبيدات وهرمونات وسرطنة.. دا لو كلامه كان صـح.. كان زمانك انفجرت وإنتا قاعد

- وهو يشير لطبق السلطة أمام المستثمر
  - : من كتر الخضار اللي كلته..
- ينفجر المستثمر ضاحكاً.. ثم يعود لتناول طعامه وهو يقول لعماد

المستثمر: العيان عيان يا عماد بيه .. والصحة زي الرزق .. ربنا بيديها وبياخدها وقت ما بيريد..

- بمرارة

عماد: ونعم بالله .. الله يرحمه بقى..

- وهو يلتقط قطعة لحم

المستثمر: واحدزى يوسف سرحان ده.. لو نضف دماغه

- وهو يضع قطعة اللحم على طبقه
  - : وحط نفسه في المكان الصح.
- على طبق المستثمر لنراه يقطع شريحة اللحم بالسكين بينما نسمع صوت المستثمر

- : كان زمانه صاحب جورنال.. أو دار نشر..
- يمسك عماد بالشوكة .. يلتقط قطعة لحم ويضعها على طبق المستثمر وهو يقول
  - عماد : كويس إني نضفت دماغي وحطيت نفسي في المكان الصح..
  - يضع الشوكة والسكين .. ثم يمد يده ويخرج دفتر شيكات.. وهو يقول لعماد
    - المستثمر: علشان كده.. إحنا هنقدرك زي ما قلت لك ..
      - وهو يملأ بيانات شيك
      - : وفيلمك الجاي لوحبيت هيبقي من إنتاجك..
        - يلتقط عماد الشيك ويتفحصه
- يم سك الم ستثمر بال شوكة والسكين ويهم بغرس السكين في قطعة اللحم التي وضعها عماد على طبقه ..
- جلبة مفاجئة تسود في المطعم .. لنري عدداً من الرجال من بينهم عدد من مسئولي الرقابة الإدارية يحيطون بالمائدة
- على المستثمر الذي هب مفزوعاً.. ليقف.. ثم بحركة لا إرادية .. تسقط السكين من يده .. لتقع على الطبق بجوار قطعة اللحم التي وضعها عماد أمامه
  - في لقطة بطيئة.. تسقط السكين من فوق الطبق على الأرض..
  - على الأرض .. لنرى عدداً من الأقدام تدوس فوق السكين.



#### نهار : داخلی ا

# الجريدة ومنزل عزت[

- تورتة كبيرة وعدد من أكواب العصائر فوق مكتب يوسف..
- عماد بين رئيس التحرير وزملاء الجريدة في حالة من السعادة وهم يلتفون حول المكتب.
  - وهو يمد سكيناً لعماد
  - رئيس التحرير: إنتا أحق منى بالشرف ده ..
- يمسك عماد بالسكين.. ويهم بتقطيع التورتة .. فنسمع جرس تليفون المكتب يرن.
  - يضع السكين ويلتقط السماعة
    - عماد: ألو..
    - لبني .. بجوار عزت وسناء
  - لبني : أيوه يا حبيبي .. عامل إيه ..
    - بلهفة

عماد : بخير .. وإنتي .. صحيح .. سناء عاملة إيه دلوقت ..

- بعد ما نظرت لسناء وابتسمت

لبني: بقت كويسة .. المهم ..

- على حقيبة سفر بجوار باب الشقة

ص لبني: أنا وعزت جايين دلوقت.. مش عايزاك تتأخر عليا..

- وهو ينظر للزملاء

عماد: هخلص فرح يوسف وأطلع على البيت على طول..

- باستغراب

لبنى : يوسف .. يوسف مين..

عماد: لما نتقابل هبقى أقول لك يوسف مين..

لبني : وأنا كمان.. لما نتقابل هقول لك حاجة عن يوسف..

عماد: يوسف مين؟

– بسعادة

لبني : يوسف عماد حلمي..

- على التورتة..



## فوتومونتاج[

- عماد يتحرك بسيارته من أمام مبنى الجريدة بينما نسمع صوته

ص عماد: لم يكن احتفال زملاء الجريدة هو آخر احتفالات هذه الليلة

- ميدان السيدة عائشة .. لنراه ينظر في مرآة السيارة بقلق

ص عماد: كان هناك احتفال آخر بانتظاري ..

- السيارة الجيب خلف سيارة عماد مبا شرة.. رجل (1) بجوار السائق .. ورجال (2) ، (3) ، (4) في المقعد الخلفي..

- بينما نسمع صوته

ص عماد: احتفال مأساوي صاخب..

- تصطدم مقدمة السيارة الجيب بمؤخرة سيارة عماد بينما نسمع صوت عماد ص عماد: على طريقة الفساد..

- مطاردة .. الطريق الصاعد للمقطم وشارع (9) وعدة طرق جانبية
- سيارة عماد تنطلق بسرعة جنونية في محاولة للهرب من السيارة الجيب التي تلاحقه..
- تنتهي المطاردة .. با صطدام السيارة الجيب عنوة بسيارة عماد التي انحرفت عن الطريق لتصطدم بصخرة.
- السيارة الجيب تتوقف بجوار سيارة عماد.. ليهبط منها الرجال الثلاثة في المقعد الخلفي..



. لىل : خارجى

## بجوار صخرة بالمقطم

- عماد يفتح باب السيارة .. ويهبط بتثاقل منها ليترنح برهة كالسكران .. بينما نرى خيطاً من الدم ينسل من جبهته على وجهه..
- معركة (من طرف واحد).. الرجال الثلاثة يتناوبون على ضرب عماد بقوة وعنف حتى يسقط على الأرض منهارا..
  - رجل (1) يدخل الكادر وهو يمسك بقضيب حديدي
- يقترب من عماد المسجى على الأرض بصدره ليضربه عدة ضربات على ساقيه وركبتيه
- على القضيب الحديدي في يد رجل (1) وهو يرتفع إلى آخر ذراعيه.. ليهوي في لقطة بطيئة على ظهر عماد في المنطقة التي تعلو الحزام من الخلف..
- بمجرد اصطدام القضيب الحديدي بظهر عماد نسمع صوت سارينة سيارة الإسعاف من المشهد القادم



## فوتومونتاج 🛘

- بجوار الصخرة .. عدد من السيارات متوقفة وعدد غفير من الجمهور حول سيارة الإسعاف .. التي أطلقت سارينتها وهي تغادر المكان
  - مستشفى بالمقطم لنرى سيارة الإسعاف تتوقف أمامه
- طرقة بالمستشفى .. لنرى عماداً فوق النقالة المتحركة فاقداً الوعي مخضباً بالدماء..
  - لبني .. في حالة يُرثي لها .. تستند إلى ذراع عزت وهما يصعدان سلم المستشفى ..
- النقيب حسن مع عايدة أمام غرفة العمليات.. تعدو عايدة لتحتضن لبني.. بينما يسلم عزت على النقيب حسن الذي اكتسى وجهه بالحسرة الشديدة..
- غرفة بالمستشفى.. عماد ينام على سريره وهو مغطى الوجه والصدر بالضمادات.. ساقاه مفرودتان أمامه ومعلقتان في حبلين ملتفين على (الجبس) .. الذي غطى نصف جسده الأسفل من القدمين وحتى الوسط..
  - لبني لازالت تبكي وهي تدفن وجهها في صدر عايدة .



## غرفة عماد بالمستشفى

نهار : داخلي ٔ

- عدة لقطات لنباتات الزينة والأشجار في حديقة المستشفى
- غرفة عماد .. الذي انتبه ليدور بحدقتيه في أرجاء الغرفة .. من جهة نظره .. لبنى تجلس باكية .. بينما ينام عزت على مقعد بجوار شباك الغرفة
- بمجرد وقوع نظر عماد على لبنى .. تلتفت في لقطة بطيئة لتنظر ناحيته وكأنها قد سمعت صوت تحريك حدقتيه
  - موسيقى مناسبة..
- تنهض .. لتسير نحوه .. وتمسك بيده لتو سعها تقبيلاً.. حتى نسمع صوته يقول لها بخفوت وتهالك
  - عماد: لبني ..
  - تنظر له .. وهي لازالت تبكي
    - لبني : نعم..
    - بنفس النبرة

عماد: لبني ..

- بعدما مسحت عينيها

لبني : نعم.. نعم..

- بصوت زاد خفوتاً وتهالكاً

عماد: متتعبيش نفسك وتردي عليا.. سيبيني أناديكي.. علشان أتأكد .. إني لسه عايش..

- تبكى لبنى بحرقة .. بينما نسمعه يقول وهو يغمض عينيه

عماد: لبني ..



## فوتومونتاج

- شروق/ الحديقة.. والفيلا.
- السلاكة .. لنرى لبني تقوم بدور عماد في العناية بالحمام
- غرفة عماد بالمستشفي .. الطبيب المعالج لعماد يستعرض صور الأشعة بملامح متجهمة .. ثم يصحب عزت ويخرج بينما نلاحظ أن عماداً قد بدأ يتعافى وأن الضمادات على الصدر والوجه قد أذيلت..
  - مطبخ الفيلا .. لبني مع أم صبري تجهزان الطعام
  - غرفة عماد بالمستشفى .. لنرى لبنى تطعمه بيدها..
- غروب .. لبنى تمسك بالراية الحمراء.. وهى تتفحص السماء بعينيها.. نرى سرب حمام يحلق من جهة نظرها.. فترفع الراية وتلوح بها..



## نهار : داخلي

# غرفة عماد بالمستشفى

- عزت والنقيب حسن مع عماد في الغرفة..
  - تدخل لبني بحقيبة الطعام..
- تقترب من عماد بقلق بعدما لاحظت تعبيرات الحزن على وجهه..
  - تهم بإخراج الطعام.. فيقول لها عماد..
    - عماد : عايزك في كلمتين يا لبني..
- تنظر له مستفهمة .. تقترب منه .. بينما يخرج عزت والرائد حسن وعلى وجهيهما تعبيرات بالغة الأسف.
- يتأملها بنظرات بالغة الحزن.. وهو يهم بتحريك شفتيه.. تنظر له مستفهمة.. فتدمع عيناه.. وتختلج تعبيراته وكأنه يعتصر قلبه بداخله..
  - تنظر له بإشفاق .. ثم تمد يدها لتلمس خده..
  - تفاجأ به يتفادى يدها ويستدير للناحية الأخرى ثم يقول بنبرة مذبوحة ..
    - عماد: إنتي طالق .....

- نسمع موسيقى مناسبة.. بينما تستعرض الكاميرا وجه عماد الذي بهت فجأة وكأنه لفظ الحياة مع حروف الكلمتين .. بينما نسمع صوت خطوات لبنى على أر ضية الغرفة .. ثم صوتها وهي تقول له

لبنى : طيب .. يلا علشان تتغدا

- يلتفت ناحيتها مصعوقاً .. يزداد اندها شه عندما يجدها تضع الطعام فوق السرير وتهم بإطعامه..

- يقول لها وهو مشدوه

عماد : بقول لك إنتي طالق..

- وهي تقرب من فمه ملعقة الطعام

لبنى : وأنا سمعتك.. يلا بقى عشان تاكل..

- يضرب الملعقة من يدها فيسقط الطعام على الأرض

- يمسك بيدها ويدوس عليها وهو يصرخ فيها

عماد : إنتي بتستخفي بيا.. أنا مش مجنون ولا سكران.. أنا في كامل وعيي .. ورميت عليكي اليمين

- وهي تنظر متألمة لأصابعه التي انغرست في لحمها

لبنى : وأنا علشان بحبك وبحترمك قبلت قرارك وماناقشتوش.

- يترك يدها ويشير للطعام

عماد : واللي بتعمليه ده يتسمى إيه..

لبنى: أمومة

- وهي تملأ ملعقة أخرى

: يمين الطلاق الليّ رميته عليا.. بينهي دورِي كزوجة..

- وهي تقرب ملعقة الطعام من فمه

: مش كأم..

- وهو يبعد فمه عن الملعقة

عماد : وليه تتعلقي بأمومة وهمية معايا .. بعد ما بقت عندك القدرة إنك تعيشي الأمومة بشكل حقيقي مع غيري..

لبنى : لأني متمنتش الأمومة الحقيقية غير علشانك .. وعلشان أسعدك..

- بحسرة

عماد: وأنا دلوقت بقيت عاجز عن إني أقدم لك الاثنين ..

- وهو يشيح بوجهه للناحية الأخرى

: لا الطفل اللّي يخليكي أم .. ولا الأحاسيس اللّي هتخليكي سعيدة.

لبنى: لكن تقدر تقدم لي اللي أهم وأبقى من الاتنين

- بقلة حيلة

عماد: وده يتسمى إيه؟

لبني: الحب ..

- بنبرة ناقمة وهو لا زال مشيحاً بوجهه

عماد: حب عاجززي صاحبه ..

- بحزن بالغ

: الفصل الأخير من قصة حبنا ابتدى .. والظاهر إنه هيبقى حزين زى ما تنبئتي .. علشان كده .. سيبيني أعيشه وحدي..

- بتصمیم

لبنى : مش هسيبك .. وقصة حبي ليك هكملها معاك لحد آخر فصل .. لحد آخر سطر .. بصرف النظر عن دوري فيها .. حبيبة .. زوجة .. أم .. إنشالله

- بنبرة مخنوقة

: حتى أبقى خدامة زي أم صبري..

- وهي تبكي
- : هكمل معاك إن شالله حتى غصب عنك..
  - تبكى لبنى بشدة ..
- يلتفت نحوها فنراه باكياً وهو يقول بلهفة
  - عماد: بس.. علشان خاطري ما تبكيش..
- من خلال دموعها وهي تمسك بالملعقة وتغرف من الطعام
  - لبنى : لو عايزني أبطل عياط .. تاكل
  - يقرب وجهه منها فتضع الملعقة في فمه..
  - ينظر إليها بينما تغرف هي ملعقة أخرى ويقول
    - عماد: مبتتمنيش تبقي أم ..
    - وهي تقرب الملعقة من فمه
- لبنى : أمنية متغرينيش.. لأنها اتحققت بعدد البشر .. من زمن ستنا حوا لحد دلوقت..

- يتأملها بحب بينما تثبت هي الملعقة أمام فمه..
  - بعد برهة يفاجأ بها تقول وهي تنظر للملعقة

لبنى : هتاكل ولا أعيط تاني..

- على عماد .. الذي فتح فمه لتضع لبنى فيه الملعقة .. بينما تنسحب الكاميرا لأسفل مستعرضة باقي جسده بينما نسمع صوته من المشهد القادم

صوت عماد : بكل حب.. ووفاء اختارت أن تحيا معي.. كراهبة .. في محراب عجزي..



## فوتومونتاج 🛘

- طرقة في المستشفى .. لبنى تدفع ظهر مقعد متحرك يجلس عماد فوقه و(الجبس) قد انحسر في المنطقة من القدمين إلى أسفل الركبتين.

ص عماد: و الغريب.. أنها لم تشعرني مطلقاً بأنها تعاني .. أو تتألم..

- مزج / نهار / لبنى تدفع المقعد المتحرك نحو المائدة أسفل التكعيبة لنرى قدم عماد اليمنى يلتف على (قصيرها) رباط من الشاش.

: كانت تتصرف بطبيعية فائقة .. وبحب..

- مزج/ شروق / الحديقة.. لنرى عماداً يلف عجلات مقعده المتحرك ليصبح أسفل الشجرة بينما نرى من جهة نظره لبني وهي تنظف السلاكة بحماس

: كما لو كانت تقوم بواجب مقدس ..

- مزج الريسبشن .. لبنى تمد عكازين من الحديد لعماد.. يمسك بهما ثم يحاول النهوض بمساعدتها .. بعد ما استدارت من خلفه لترفعه من ظهره حتى يقف ..

: واجب.. خلقت له.. وخلق لها..

- مزج/ غروب/ سطح الفيلا.. عماد يسير مستعيناً بعكاز واحد (الذي يصاحبه منذ بداية الأحداث) ناحية السلاكة .. لبني من جهة نظره تمسك بفرد حمام .

: حتى مع الحمام .. الذي وجدت نفسها مضطرة للاعتناء به نظراً لتقاعدي..

- بعد انتباهها لوجوده .. تقرب رأس فرد الحمام من فمها وتقبله.. ثم تطلقه وتعدو ناحية عماد..

: سرعان ما تآلفت معه بصورة جعلتني أوقن من أنها قد وجدت فيه ..

تصل إلى عماد .. تستلقى على صدره ..فيضمها بيد واحدة بينما نسمعه يقول

: العزاء.. عن المشاعر التي ضحت بها من أجلى..



سطح الفيلال

غروب: خارجي

- عماد يستند على العكاز ويلف ذراعه الآخر على لبني
- الحديقة من جهة نظر عماد ولبني.. لنرى بالتوازي مع صوته وعن طريق .. المزج.. صورة لتفاصيل المكان قبل الفلاش باك
  - عماد : حاسس إني محتاج أعمل تغيير شامل في حياتي..
  - لبنى : غير زى ما إنتا عايز بس إياك .. إياك تيجي ناحيتي..
    - يبتسم وهو يضمها بذراعه ثم يردف
    - عماد : السور مثلاً.. نبنيه ونعمل بوابة محترمة..
      - وهو يشير بالعكاز ناحية الحديقة

: والجنينة.. نجيب لها جنايني يظبطها ويقسمها أحواض.. وتكعيبة العنب.. نشيلها ونغير قعدة دوار العمدة اللي تحتها .. ونعمل قعدة تحت الشـجرة.. تربيزة بامبو وكرسيين.. وافتح لك باب من المطبخ على الجنينة .. وجوه .. أو ضتي القديمة أعملها مكتب و...

- مقاطعة .. لتقول بلهفة

لبنى : أنا نفسى تعمل حاجة واحدة بس ..

عماد: إيه هيا..

- برجاء

لبنى: توسع على العيال..

- مستغرباً

عماد: عيال مين..

- بجدية بالغة

لبنى: عيالنا..

- وهي تشير نحو السلاكة

: نبنى لهم غية تليق بيهم..

- بسعادة .. وحماس وهو يشير نحو مكان التكعيبية على السطح .

عماد : مش غية وبس.. دا كمان هعمل لك قعدة صغيرة .. عشان تبقى قريبة من السلاكة.. واحط فيها مكتب صغير عشان ابقى قريب منك وأنا بكتب



الحديقة

نهار : خارجي

- (تفاصيل المكان كما كانت قبل الفلاش باك فيما عدا الغية التي نراها قائمة لم تتحطم بعد)
  - عماد على مقعد (1) منشغلاً بالكتابة..
- على الغية .. ثم هبوط على باب الفيلا لنرى لبنى تمسك بعكاز عماد الخشبي وهي تسير نحوه غاضبة..
  - تصل إليه لتقول له بغضب
  - لبنى : إنتا مش هتبطل تتعافى على نفسك..
    - ينظر للعكاز بتبرم
- عماد : زهقت منه.. سنة كاملة مسبتوش من إيدي .. قلت آخد أجازة منه النهاردة..
  - وهي تضع العكاز على المائدة
  - لبنى : ولما تتعب.. نقول يا ريتنا..
    - وهي تجلس على مقعد (2)

- : بص بقى.. أنا عايزاك تخلي بالك من نفسك وتبطل دلع..
  - بجدية بالغة
  - : علشان أنا مش عايزة حاجة تشغلني عن العيال..
    - يلقى نظرة على الغية
    - عماد: هما عاملين إيه؟
    - بنبرة تملئها مشاعر الأمومة

لبنى :كويسين.. وصحتهم زى البمب .. حتى عز وعصام وفؤاد .. فاقوا وبقوا بياكلوا كويس دلوقت..

- عماد : وحنان .. اللي معرفتيش تنامي أول إمبارح لأنها كانت تعبانة..
  - بسعادة
- لبنى : بقت تمام.. والنهاردة لقيتها (زايفة) .. قعدت اتفرج عليها وهي نافشة ريشها وعماله تكسح لحد ما شوفتك في الجنينة .
  - مبتسماً

عماد : حنان بقت بتزوف دلوقت .. ما شاء الله.. نقى لها عريس بقى..

- وهي تنظر نحو الغية.. لنرى من جهة نظرها سرب حمام يتطاير فوقها

لبنى : لو بإيدي كنت إديتها لأشرف..

- وهو يشير لفرد حمام على أرضية الحديقة

عماد : وليه متديهاش لأكرم..

- بحدة

لبنى : بتقول إيه.. عايزني أدي حنان لأكرم..

- وهو يضحك

عماد : وليه لا.. هما مش فاقسين مع بعض

- معترضة

لبنى : أيوه فاقسين مع بعض مقلتش حاجة .. لكن أكرم فرد بظراميط وكل ليلة بيبات في غية..

- وكأنها تتحدث عن ابنتها البكرية

: حنان دي ما ياخدهاش غير فرد عتره.. فرد ما يحطش بعد التقسيم غير على غيته ولو كانت الدنيا زي الكحل..

- وهو يعود للكتابة

عماد : أنا مالي بقى .. إنتى حرة في عيالك..

- تسحب الورق من أمامه

لبنى : إنتا تسيبك من الكتابة دلوقت وتقوم علشان تاخد العربية وتجيب طلبات العيال الصغيرين الليّ على وش طيران..

- يمسك العكاز .. ويتحرك ناحية الفيلا بينما تسير هي خلفه لتقول له

لبنى : عايزين بذر كتان وجنيبه وفلارس ..

- يلتفت نحوها مبتسماً .. لنراها لا زالت تحصي في قائمة الطلبات بينما نسمع صوته من المشهد القادم

ص عماد: توحدت مع الحمام..



### فوتومونتاج

- الغية.. لنرى لبنى تعتني بالحمام في عدة لقطات بينما نسمع صوت عماد من المشهد السابق

ص عماد: وأصبحت الغية عالمها الوردي .. ومتنفس الأمومة الوحيد لديها ..

- غرفة النوم / ليل .. (من ملامح عماد ولبني نكتشف مرور قرابة خمسة عشر عام.. ( ليصبح عماد في نفس عمره قبل الفلاش باك)

: ومرت السنوات .. التي كلما مرت كلما زاد تعلقها بهذا العالم.. حتى وصلت لحالة جعلتني أندم لأني سمحت لها بأن تدخله ..

- عماد یستیقظ من نومه.. لنری لبنی من جهة نظره قلقة.. مسهدة.. بینما نسمع صوته مسترسلاً

: كانت لا تنام الليل إذا غاب أحد أبنائها..

- شباك غرفة النوم من الخارج لنرى فرد حمام يصطدم به

ص عماد: وعندما يعود..

- غرفة النوم.. لنرى لبني تهب واقفة لتتحرك خارجة من الغرفة ..
  - : كانت تهب بحنين ولوعة أم لتلقاه..
- سطح الفيلا / ليل .. لبني تمسك بفرد الحمام وتضمه إلى صدرها ثم تطلقه ناحية الغية
  - الحديقة / شروق.. لنرى قطرات المطر تسقط بغزارة ..
- غرفة النوم.. عماد ينام وحيداً .. بينما نسمع صوته وهو ينهض ليلقى نظرة على الحديقة من شباك الغرفة
  - : وذات صباح يوم شتوي .. رأيت .. ما جعل ندمي يصل إلى ذروته ..
- الحديقة .. من جهة نظر عماد .. لنرى لبنى تجلس على ركبتيها أمام الشجرة وهي تحفر « بقدوم » في الأرض..



شروق : خارجي

# بجوار الشجرة

- عماد يسير على عكازه .. مقترباً من لبنى تحت المطر الذي لازال ينساب بغزارة .. وقد أمسك في يده روب حريمي شتوي..

- يصل إلى لبني.. التي لازالت تحفر بالقدوم ويفرد الروب على كتفيها .. ثم يهبط ليصبح أمامها مستنداً على العكاز .. لنرى من جهة نظره على الأرض فرد حمام ميت..

- تلتفت له وتقول باكية

لبنى : هيام ماتت يا عماد..

- ينظر لها مشفقاً .. يضمها إلى صدره ثم يقول لها وهو ينزع القدوم من يدها

عماد : طيب يلا ندخل علشان المطرة..

- يفاجأ بها تتشبث بالقدوم وتعود للحفر وهي تقول بتصميم

لبنى : مش قبل ما أدفنها.. لازم أدفنها.. مش هي بس .. لا .. كل عيل هيموت من عيالنا لازم ندفنه من هنا ورايح

- يتأملها عماد وهو مذهول .. بينما نسمع صوت زخات المطر وهزيم الرعد
- تفرغ من الحفر .. تضع الحمامة برفق في الحفرة.. ثم تهيل عليها التراب وهي تبكى بشدة..
  - يمسك عماد بيدها .. ثم يستند على العكاز وينهض...
- ينظر لها برهة وهي تحدق بعينين باكيتين في الحفرة و كأن بداخلها قطعة من قلبها..
- يجذب عماد يدها كي تنهض .. لكنها تتشبث بالأرض.. وترفع وجهها لتنظر إليه .. فتتساقط حبات المطر على وجهها .. بينما نسمع صوت عماد
- صوت عماد: يومها أيقنت أنها تخطو بخطوات سريعة في درب الجنون.. يومها أيقنت ..
- يسحب عماد يدها مرة أخرى .. بينما تستدير الكاميرا على جزع الشجرة .. لتتسلقه صاعدة حتى نرى من بين الفروع المتشابكة شباك غرفة النوم .. بينما نسمع صوت عماد

صوت عماد: إن يد القدر أوشكت على كتابة الفصل الأخير .. الذي كانت آخر صفحاته .. أياماً قلائل من شتاء العام القادم.. شتاء ألفين وستة..



# سطح الفيلا

المشهد

ليل : خارجي

- عماد يجلس على مقعده في التكعيبة .. يبدو متوتراً برغم إمساكه بالقلم بينما نسمع صوت سعال لبني
- يحاول الاسترسال في الكتابة لكن صوت سعال لبنى يتصاعد بدرجة تجعل تعبيرات وجهه ترتعد وكأن أحشاؤه تتمزق مع صوت سعالها
  - يلقي بالقلم على الورقة .. ثم ينهض مستعيناً بعكازه
- الكاميرا خارج التكعيبة .. تستدير لنرى ظهر لبنى وهى تستند على الجدار وجسدها يرتعش من محاولتها كتم سعالها بعدما لاحظت قدومه
- فجأة .. ينفجر صوتها بسعال متوا صل جعلها تتهاوى ساقطة على الأرض وهي تمسك بصدرها
- على عماد الذي تخلى عن عكازه وهو يهرول بخطوات متعرجة نحو جسد لبنى الساقط



# غرفة النوم[

#### المشهد

#### نهار: داخلي

- لبنى في غاية الإجهاد .. وهي ترقد مرتعدة فوق السرير.. وجهها مشرب بصفرة باهتة وهي تسعل بشدة .
- عماد يتقدم نحوها وهو يحمل كوباً من عصير الليمون..يضعه على الكيمودينو بجوارها ثم ينثني ليلتقط علبة دواء يخرج حبة منها .. ويمدها نحو لبنى وهو يقول معاتباً
  - عماد: مكنش ليكي أبداً الإجهاد ده .. ليه مسمعتيش كلامي لما قلت لك يلا ننزل.
    - تزيح يده الممتدة بحبة الدواء وهي تقول بقلق
      - لبني: العيال محدش بص عليهم طول النهار
      - وهي تزيح الغطاء من فوقها وتهم بالنهوض
    - لبني: هطلع أبص عليهم وبعدين أرجع أخد الدوا
      - بحدة وهو يحول بينها وبين النهوض

عماد: مفيش عيال وزفت من هنا ورايح

- تحدق فيه مصدومة.. فيكتشف تجاوزه فيخفف من نبرته ويردف وهو يربت على كتفها

عماد: هجيب لهم حديراعيهم بدالك

- مستدركاً بعدما لاحظ تجهم تعبيرات وجهها

عماد: لحد ما تقومي بالسلامة بس.. بعد كده نمشيه

- محفزاً

عماد: يلا بقى شدى حيلك.. عشان تقومي للعيال بسرعة

- وهي تلتقط حبة الدواء من يده

لبني: ولحد ما يجي الحد اللي بتقول عليه.. مين هيخلي باله منهم

عماد: أنا

- وهو يبتسم

عماد: هما مش عيالي زي ما هما عيالك و لا إيه؟

لبني: بس إنتا تعبان .. وكتر الطلوع والنزول فيه خطر عليك

عماد : أي خطر في الدنيا و لا حاجة قصاد أقل خطر ممكن يطولك إنتي

- يمسك بكوب الليمون ويناو له لها ثم ينهض.. يتحرك نحو التلفاز .. يلتقط الريموت ويمده لها وهو يقول بنبرة حازمة

عماد: لغاية ما تقومي بالسلامة .. إقامتك بقت محددة في الأوضة دي.. ومش مسموح لك بعمل أي مجهود .. غير لما صوابعك تدوس على زراير الريموت ده.

- تلتقط منه الريموت.. ثم يتحرك خارجاً من الغرفة وهو يقول

عماد: هطلع أشقر على العيال.. ومش هنسي أقول لهم..

- وهو يلتفت نحوها مبتسماً

عماد: أمكم بتسلم عليكم



### فوتومونتاج

- السلم المؤدي للسطح.. لنرى عماداً يصعد درجاته بصعوبة.. بينما نسمع صوته صوت عماد: ودون أن أدري.. نقلتها من لهيب جحيم إلى آخر أشد ناراً وحرقاً
- غرفة النوم .. لنرى لبنى توجه الريموت نحو التلفاز وهي في حالة هلع يقطعه نوبات من السعال الشديد.. بينما نرى على شاشة التلفاز.. لقطات أرشيفية متنوعة لمواد إخبارية عن تفشي وباء أنفلونزا الطيور
- شروق.. السطح .. لنرى عماداً يتحسس ظهره متألماً وهو يتفحص أزواج الحمام داخل الغية .. بينما نسمع صوته
  - صوت عماد : كانت تتابع أخبار إنفلونزا الطيور بقلب ينبض بالخوف..
  - ليل .. لبنى تقف شاخصة البصر أمام شاشة التلفاز بينما نسمع صوت عماد
- صوت عماد: وكلما اقترب المرض من مصر .. كلما اقتربت هي أكثر من الهلاك..
- أربعة لقطات لوجه لبنى يفصل بينهم المزج .. بداية المزج فى كل لقطة هو اسم دولة من الدول الأربع .. لنرى في نهاية كل مزج وجه لبنى وقد زاد شــحوباً .. وكأن سنوات مرت بين المزج والآخر

صوت عماد: تركيا.. سوريا.. فلسطين.. مصر..

- عماد واقفاً أمام غية الحمام .. يمسك بفرد حمام في يده بينما نسمع فجأة صرخة عالية ملتاعة ممتدة بصوت لبنى .. يتردد صداها مع صوت رفرفة أجنحة فرد الحمام الذي أطلقته يد عماد وهو يهرول هابطاً

- غرفة النوم.. عماد يدخل مسرعاً.. لنرى جسد لبنى من جهة نظره.. وهو يترنح في و ضع الوقوف.. ثم وهو يسقط بين ذراعيه على الأرض.. بينما نسمع صوت مذيع نشرة الأخبار

صوت المذيع: كما تهيب وزارة الصحة بالمواطنين .. سرعة الإبلاغ عن أي تجمعات للطيور في المناطق العشوائية.. أو فوق أسطح المنازل وقد خصص قطاع الأخبار الأرقام التالية للإبلاغ عن .........



**الريسبشن**∟

نهار : داځلي

- عزت يجلس على مقعده منصتاً لعماد

عماد : رسم القلب أكد أنها محتاجة تعمل عملية بأقصى سرعة.. والدكتور حرج عليا مخليهاش تتعرض لأي انفعال قبل العملية..

- بقلق بالغ

عماد : المصيبة بقى إن بتوع الحي جم مرتين علشان يزيلوا الغية .. وبأعجوبة مشيتهم.. يعني لو حد من الجيران قدم شكوى هنبقى قدام أمر واقع .. وأختك هتضيع.

- بنبرة مهمومة

عزت :الساعتين اللي قعدتهم معاها مخلتش حاجة إلا وقلتها..حلفتها بالميتين .. بو ست على إيدها ومفيش فايدة..

عماد : يعني رفضت تسافر معاك..

- بمرارة

عزت :أيوه .. وقالت لى أسيب العيال لمين ..

- لائماً نفسه

عماد : أنا السبب .. أنا اللي ضيعتها.. يا ريتني ما كنت سيبتها تتعلق بالحمام بالصورة المَرَضِية دي..

- وهو ينهض

عزت: خلي بالك منها يا عماد.. أنا هسافر أخلص شوية شغل معايا .. وأقدم على أجازة كام يوم.. أجى أقضيهم معاك.. ونشوف حل معاها..

- وهو ينظر للسلم الداخلي .. لنرى أم صبري تهبط بصينية الطعام

عزت: رضيت تاكل..

- بضيق وهي تنظر للصينية

أم صبري: لا يا بيه.. زي العادة..

- ملتفتاً لأم صبري

عماد : سخني الأكل وطلعيه تاني وأنا هحصلك..

أم صبري: أطلعه أوضة النوم ولا السطح ..

- بقلق

عماد : هي الست فين..

أم صبري: سابتني وطلعت ع السطح..

- ينظر عماد لعزت بنفاذ صبر .. فيربت عزت على كتفه

عزت: معلش.. إطلع لها.. وسايسها على ما أجي لك..

- يلتفت عماد لأم صبري

عماد : روحي إنتي ومتتأخريش الصبح..

- على السلم الداخلي



### سطح الفيلال

غروب: خارجي

- لبنى وقد غطت كتفيها بشال من الصوف.. (شال مقعد الغية) تجلس على مقعد بمواجهة الغية بينما نرى جهاز تسجيل على الأرض نسمع منه صوت فريد

ص فريد :أضنيتني بالهجر .. ما أظلمك.. فارحم عسى الرحمن أن يرحمك..

- مع دخول عماد الكادر نسمع

ص فريد: مولاي .. حكمتك في مهجتي..

- وهو يضع يديه على كتفيها نسمع

: فارفق بها يفديك مَنْ حَكَّمَكْ..

- يميل ليغلق التسجيل ثم يلتفت ليواجهها وهو يقول

عماد: من إمتى بتسمعيها ..

لبنى : كنت هسمع نصها الحلوبس ..

- وهو يرفعها من كتفيها لتنهض بعد ما أسند عكازه على المقعد

عماد : يلا ننزل تحت وأنا أغنيها لك بدل فريد..

- تتركه .. لتتحرك نحو سور السطح

لبنى: عزت مشى..

- وهو يلحق مها

عماد: أيوه..

- تلقي نظرة على الحديقة .. لنرى أم صبري من جهة نظرها تخرج من باب الفيلا

لبنى: وأم صبري كمان مشيت..

- بنبرة شفافة

: كنت عايزة أسلم عليهم..

- وهو يتحسس شعرها من فوق الشال

عماد: يا سلام.. ما هي هتيجي بكرة.. وعزت كمان بكرة أو بعده بالكتير وهيكون هنا.

- وهي تنظر نظرة غائمة

لبنى : أكيد أم صبري هتيجي تاني وعزت هيجي تاني.. لكن بكرة.. اللي احتمال ما يجيش..

- يقشعر جسده من هول العبارة.. يلفها لتصبح أمامه.. يتأملها بحب.. ثم يقول بصوت راجف

عماد: بلاش من اليأس ده يا حبيبتي..

لبنى : ده مش يأس.. ده إحساس .. حاسة إني انتهيت .. حاسة إني سامعة صوت فريد بيغنى الجزء الأخير من أضنيتني بالهجر..

- بمرارة

لبني: نص الحكاية المُر..

- ينظر لها بإشفاق بالغ ..ثم يحتضنها بحيث يصبح وجهه ناحية سور الفيلا..

- تستكين بين ذراعيه.. فيضمها بشدة .. وهو يقول

عماد : لكن أنا سامعه بيغني في نص الحكاية الحلو.. سامعه بيقول .. ما كان أحلى.. قبلات الهوا..

- على سور الفيلا.. لنرى من جهة نظر عماد .. سيارة شرطة مرافق تتوقف أمام باب السور



# فوتومونتاج[

- مدخل السور لنرى عدداً من الرجال أحدهم يعلق على ظهره ماكينة تعقيم .. يهبطون من السيارة .. بينما نسمع صوت لبني

ص لبني: وأنا سمعاه بيقول .. يا بدر..

- الغية من جهة نظر الرجال قبل أن نراهم يدخلون من باب السور.. بينما نسمع صوت عماد

ص عماد :إن كنت لا تذكر .. فاسأل فمك..

- السطح . النرى ذراعي لبنى تلتفان على ظهر عماد . . لتقول وهي تنظر للسماء ..

لبنى: إن واصلتني بالجفا

- وهو يضمها بشدة وبعينان تدمعان

عماد : لو مر سيف بيننا

- الغية لنرى الرجال وقد أمسك اثنان منهم ببلط حديدية .. يتحركون نحو الغية بينما نسمع صوت لبني

صوت لبني: ومت في شرخ الصبا مغرمك..

- يضمها بشدة وهو يدير جسدها بحيث يصبح ظهرها في اتجاه الغية .. يغمض عينيه على دمعتين بينما يظلم الكادر تدريجياً



ليل : داخلی

التكعيبة

- عودة من الفلاش باك..
- على عيني عماد المغمضة ثم يتسع الكادر لنراه سانداً رأسه على ظهر الكرسي.
- بجواره رزمة في حدود 50 ورقة فلو سكاب مكتوبة .. بينما نرى ورقة على سطح الدوسيه بها عدد من الأسطر .
  - تقترب الكاميرا حتى نرى آخر سطر يكتبه .. بينما نسمع صوته .

ص عماد : انزلقت ذراعاها على ظهري .. وهي تنصت لصوت البلط المنغرس في خشب الغية.. ولصوت أقدامهم.. وهي تتحرك أسفلها..

- مع نهاية مطالعتنا للسطر المكتوب نسمع صوت أقدام تتحرك
  - يفتح عينيه وينظر مستطلعاً..

- من جهة نظر عماد.. نرى رجلاً في منتصف العقد الخامس (المقدم عصام) ومن خلفه عدد من العساكر ومن خلفهم عزت والعميد حسن يقتحمون سطح الفيلا..
  - يتخشب عماد في مكانه.. حتى يدخل عليه المقدم عصام التكعيبة..
    - م عصام: حضرتك الأستاذ عماد حلمي..
- يهز عماد رأسه موافقاً .. فيقول له وهو يخرج ورقة من جيبه ليضعها على المكتب م عصام: ده إذن من النيابة بتفتيش الفيلا والقبض عليك..
  - على ملف الرواية الذي أغلقه عماد ثم ضمه بين ذراعيه.



### فوتومونتاج 🛘

- الكشك لنرى سيد وهو ينظر بضيق لشباك الجار الذي نلاحظه مطفأ الأنوار
- سيارة عزت وسيارة العميد حسن وسيارة شرطة (بوكس) أمام باب سور الفيلا..
  - المائدة .. ثم الشجرة.. ثم حطام الغية
  - باب الفيلا لنرى عماداً يخرج منه محاطاً بعدد من العساكر...
    - شباك شقة الجار..
    - صالة شقة الجار بينما نسمع صوت جرس الباب
- باب شقة الجار من الخارج لنرى سيداً يضغط على ذر الجرس بعصبية وضيق ..
  - مبنى قسم الخليفة .. لنرى عماداً يهبط بصعوبة من صندوق السيارة البوكس...



### مكتب رئيس المباحث

ليل : داخلي ا

- المقدم عصام على مكتبه .. عماد يجلس على مقعد أمامه وهو يحتضن ملف الرواية .. بينما نلاحظ على طرف المكتب (أمين شرطة أو صول) يستغرق في كتابة المحضر.

- مردفاً

عماد : سته وأربعين سنة.. كاتب

مقدم عصام: إنت متهم بقتل المدعوة لبني إبراهيم عزت .. فما قولك ..؟

عماد: محصلش..

مقدم عصام: لماذا يتهمك شقيق المدعوة بقتلها؟

عماد: معرفش.

مقدم عصام: لماذا لم تبلغ عن اختفاء المدعوة لبني إبراهيم عزت؟

عماد : لأني كنت فاكر إنها في زيارة لأخوها في إسكندرية..

مقدم عصام: متى كانت آخر مرة شاهدت فيها المدعوة لبنى إبراهيم عزت ؟.

- بنبرة حزينة

عماد : ليلة الخميس تسعتاشر واحد

مقدم عصام: هل لديك أقوال أخرى. ؟.

عماد: لا.

- يلتفت لكاتب المحضر ويملي عليه

مقدم عصام: تمت أقواله وتليت عليه في ساعته وتاريخه وأقفل المحضر على ذلك..

- وهو يلقى نظرة على عماد

: وتم التحفظ على المتهم بمعرفتنا نحن عصام شاهين.. رئيس مباحث قسم الخليفة .. لحين عرضه على النيابة.. واتخاذ ما تراه من إجراءات ضده..

- على ملف الرواية بين ذراعي عماد



## طرقة في القسم

لیل : داخلی

- عزت مع العميد حسن في الطرقة التي تؤدي إلى غرفة رئيس المباحث.
  - يخرج عماد برفقة عسكري..
  - يمر على عزت والعميد حسن.. ينظر له عزت متحسراً وهو يقول
    - عزت: إنتا اللي عملت كده في نفسك يا عماد..
- لا يعيره عماد أدنى اهتمام.. ويسير منصر فا برفقة العسكري وهو يحتضن الملف..
  - يتحرك العميد حسن ومن خلفه عزت نحو غرفة رئيس المباحث..



## مدخل عمارة الجار

# ا ا

- تاكسي يتوقف أمام المدخل..
- تهبط زوجة الجار من المقعد الخلفي.. ثم الجار من المقعد بجوار السائق..
  - يخرج الجار نقوداً من جيبه يمدها للسائق بينما يأتيه صوت سيد من خلفه
    - صوت سيد : أستاذ أشرف..
    - يتحرك الجار نحوه فيقول له
      - سيد : كنت فين كل ده؟
    - الجار : كنت بتعشا عند نسايبي..
    - هامساً وهو يقرب فمه من أذن الجار
    - سيد : صاحبك الحكومة جت خدته..
    - يلتفت لزوجته التي نظرت له مستفهمة
      - الجار: مش قلت لك..

- ثم يلتفت لسيد
- : مش قلت لك يا عم سيد..
- سيد :المهم دلوقت يا بني تروح القسم .. وتقول على اللي شوفته
  - بقلق
  - الجار :طب لوسألوني مجيتش من ساعتها ليه ؟
    - متفكراً
    - :أقول لهم إيه ؟
    - وهو ينظر بعتاب لسيد
    - :أقول لهم عم سيد قال لي متروحش
      - رد فعل منزعج على سيد



#### الشمد

### فوتومونتاج[

- شروق/ على الفيلا ثم على كشك الجرائد .. لنرى سيداً واقفاً أمام بابه المغلق
  - الجار يخرج من المدخل متجهاً نحو سيد الذي أشار ليستوقف تاكسياً
  - قسم الخليفة.. التاكسي يتوقف أمام مدخل القسم وبداخله سيد والجار..
    - الحجز .. لنرى عماداً جالساً على الأرض بين عدد من المحتجزين
      - النوبتجية .. الجار وسيد يمليان النوبتجي فحوى البلاغ..
- غرفة رئيس المباحث.. المقدم عصام يطالع باهتمام بالغ صفحات المحضر ثم يطلب رقم من الهاتف..
- منزل العميد حسن .. على مائدة الغداء مع عزت وعايدة.. ينصت لهاتفه وهو يلقى نحو عزت وعايدة نظرات متأسية



# منزل العميد حسن

#### نهار : داخلی

- بعدما ألقى الهاتف على المائدة وبنبرة بالغة الكدر

العميد حسن: أستغفر الله العظيم.. معقول ده يحصل..

- بقلق بالغ

عزت: ما تقول فيه إيه يا حسن؟

العميد حسن :فيه بلاغ إتقدم في عماد النهاردة الصبح ..

عزت: من مين ؟

العميد حسن : من واحد ساكن في العمارة اللّي جنبه و صاحب الكشك اللّي قدام الفيلا..

عايدة : قالوا إيه في البلاغ؟

العميد حسن :الجار قال إنه شاف عماد من شباك أو ضة نومه وهوا بيردم حفرة في جنينة الفيلا..

- بعدما أخذ رشفة من كوب الماء

: وأن الحفرة كانت كبيرة بشكل يوحى بوجود جثة جواها.. وقال كمان..

- يمتقع وجه عايدة بينما يقاطعه عزت ليقول بلهفة

عزت: الكلام ده كان إمتى ..

العميد حسن : ليلة ما كنت إنتا عندهم .. يعني في نفس توقيت اختفاء لبني ..

- بعصبية وهو ينهض

عزت: وإيه اللي كان مسكته كل ده..

العميد حسن : صاحب الكشك .. لأن اللي شافه الجار شافه في ليلة دخلته.. فأشفق عليه من تهمة البلاغ الكاذب .. خصوصاً إنه يعرف شخصية عماد كويس.

- صارخاً

عزت: يعنى قتلها.. قتلها يا حسن..

- تنظر لهما عايدة بذهول.. ثم تجهش باكية..

- ينطلق عزت خارجاً .. فيلحق به العميد حسن..

العميد حسن:إستني يا عزت..



### فوتومونتاج 🗆

- الحجز / ليل.. عماد يسند رأسه بجوار العكاز وقد وضع ملف الرواية على حجره وهو ينظر لسقف غرفة الحجز بعينين دامعتين..
- مزج/ سقفة تكعيبة العنب/ نهار .. لنرى لبنى تتقدم نحوه في لقطة بطيئة وهي تمد له العكاز..
- الحجز.. يرفع رأسه ليلقي نظرة على مقبض العكاز.. بينما نرى باب الحجز ينفتح ليدخل منه عسكري يطالبه بالنهوض.. فيمسك بالعكاز ويهم أن ينهض .. لكن قواه تخور فيسقط جالساً ليميل عليه العسكري ويساعده على النهوض.
- مزج/ غرفة عماد بالمستشفى .. لنرى لبنى تميل عليه لترفعه من فوق المقعد المتحرك لتساعده على الصعود فوق السرير..
- طرقة في القسم تنتهي بباب الحجز..عماد بصحبة العسكري بينما يتقدم عزت نحوه وهو ثائر ليمسك بتلابيبه ويهم بخنقه..
  - مزج/ عماد يراقص لبني في لقطة من مشهد الزفاف

- كادر فارغ.. تدخله رأس عماد لنراها تصلمه في لقطة بطيئة بجوانبه الأربع.. ككرة بلياردو.. ثم يتسع الكادر لنرى المقدم عصام يدخله ليخلص عماداً من عزت
- دكة انتظار .. لنرى عايدة متشحة بالسواد وهي تبكي على كتف العميد حسن الجالس بجوارها.
- طرقة .. يسير فيها المقدم عصام ومن خلفه عماد بين إثنين من العساكر وهو يتشبث بملف الرواية ..
  - على لافتة «رئيس نيابة قسم الخليفة».



### غرفة رئيس النيابة

ليل : داخلي ا

- رئيس النيابة على مكتبه .. عماد والمقدم عصام على مقعدين أمامه.. بينما نرى الجار وسيد واقفان أمام المكتب..

- يلتفت رئيس النيابة للكاتب

رئيس النيابة :وبعد ما تمت مواجهته أمامنا بأقوال الشاهد.. قرر الاعتراف .. فسألناه..

- بعدما التفت نحو عماد

رئيس النيابة: اسمك وسنك ومهنتك وعنوانك . .

- يلتفت عماد لرئيس النيابة ويقول

عماد: قبل ما أعترف ليا رجاء..

رئيس النيابة: إتفضل..

عماد: الرجاء مش لحضرتك.

رئيس النيابة :أمال لمين ؟.

- وهو يشير للكاتب

عماد : للي هيكتب أقوالي ..

- ينظر كاتب النيابة باستغراب لرئيس النيابة ثم للمقدم عصام .. بينما يقول رئيس النيابة لعماد بنبرة ودودة

رئيس النيابة :مفيش مانع...

- ثم وهو يشير لكاتب النيابة

رئيس النيابة: اتفضل..

- ينظر عماد لكاتب النيابة

عماد : حسن خطك وإنت بتكتب ورايا.. لأن اللي هتكتبه دلوقت .. آخر فصل في آخر رواية أكتبها..

- مو سيقى منا سبة نرى خلالها رد فعل على كاتب النيابة.. ثم على المقدم عصام.. ثم على رئيس النيابة .. ثم تقترب الكاميرا من و جه عماد.. حتى نرى عينيه بعرض الكادر



### سطح الفيلال

۱ ۱ غروب : خارجي

- سطح الفيلا.. لبنى ظهرها للغية .. وهي بين ذراعي عماد.. الذي ضمها بشدة وهو ينظر لعمال الحي الذين أوشكوا على الانتهاء من هدم الغية.. بينما نرى أسراب الحمام تتطاير من الغية لتحلق في السماء .. بينما نسمع صوت عماد من المشهد السابق

صوت عماد: كانت ضربات البلط .. زى ما تكون بتشق في جسمها مش في خشب الغية..

- يبدأ خشب الغية في التساقط على أرضية السطح في نفس توقيت تهاوى جسد لبنى بين ذراعيه..

: ولما الخشب بدأ يتكسر ويقع على السطح .. حسيت

- تسقط على الأرض بين ذراعيه

: إن لحمها هوا اللي بيقع

- يحتضنها .. بعدما نام بجوارها على الأرض بينما نسمع صوت أقدام عمال الحي وهي تنصرف..

- لبني مغمضة العينين .. بينما ينظر لها وهو يبكي

: إفْتكرت إنها ماتت..

- تفتح عينيها وتنظر له

: لكن بعد شوية ..فتحت عينيها ولقيتها بتقول لي..

- بنبرة واهنة

لبنى: نزلنى تحت..

- يتأملها بلهفة .. وهو يمد يداً ليسند ظهرها ويدُّ أسفلها ليهم بحملها

- تنظر له نظرة حانية وهي تقول

لبنى: بلاش علشان ضهرك ما يوجعكش .. سنّدني ..

- يبكى .. وهو يهم بحملها

صوت عماد: بكيت .. بكيت لما لقيتها خايفه عليا حتى وهي في حالتها دي..

- يحملها وينهض بها .. فيسقط الشال من فوق كتفيها على الأرض

صوت عماد: شيلتها .. اتحديت ظروف مرضى وشيلتها..

- يسير وهو يحملها بخطوات متعرجة

صوت عماد: فلقيتها وهي فوق درعاتي..

- على شال لبني الساقط بجوار المقعد وجهاز التسجيل بينما نسمع

صوت عماد : أخف من فرد حمام.



### غرفة النوم

ليل : داخلي

- يدخل حاملاً لبني ليضعها مكانها فوق السرير ثم يحكم الغطاء فوقها.
  - يذهب مسرعاً لمائدة الهاتف ويرفع السماعة
    - تناديه بنبرة واهنة ..

لبني : عماد..

- يلتفت ناحيتها .. فنراها تشير نحوه

: تعالى..

- يضع السماعة ويذهب إليها .. فتقول له وهي تمد يدها نحوه .

: تعالي.. أُقعد جنبي..

- يمسك يدها وهو واقفاً

عماد : هطلب الدكتور بسرعة واجيلك.

- وهي تجذبه ناحية السرير

لبنى : بلاش .. مش عايزة أشوف حد غيرك..

- بنبرة شفافة منكسرة

: في آخر دقايق باقية لي..

- بنبرة عتاب حزينة

عماد : متقوليش كده.. أرجوكي.

لبنى : أنا كدبت عليك قبل كده؟؟

- وهو يقبل أصابعها

عماد: لا ..

- وهي تجذب يده مرة أخرى

لبنى : يبقى إسمع الكلام .. وتعالى ..

- يهبط جالساً على الأرض بين الدولاب والسرير.. تمد يدها لتتحسس ملامح وجهه .. ثم تستقر بأصابعها على شفتيه..

- يقبل أصابعها فوق شفتيه.. فتلمع في عينيها نظرة حب وهي تقول له

لبنى : مش عارفة إذا كانت شفايفك اللي بتبوس صوابعي.. ولا صوابعي اللي بتبوس شفايفك ..

- يهم بالرد عليها.. فتداعب شفتيه بأصابعها وهي تقول

لبنى: أرجوك بلاش تتكلم..

- وهي تحرك أصابعها على شفتيه
- : علشان صوابعي تعرف تبوس شفايفك . .
- يستسلم.. والدمع يسيل من عينيه وهي تقول بنفس النبرة الواهنة الشفافة
- : متبقاش تزورني كتير .. كفاية إنك تفتكرني.. كفاية إن روحي تسمع من وقت للتاني.. آية قرآن..
  - بعدما ثبتت أصابعها فوق شفتيه
    - : توهبها لى شفايفك دي..
- تعصف به كلماتها.. في شيح بوجهه متشنجاً.. لتفلت أصابعها من فوق شفتيه.. وتسقط يدها على السرير.
  - يلتقط يدها .. ليقبلها .. ثم يحتضنها بين كفيه.
  - تنظر له وتقول بنبرة برغم وهنها البالغ بدت مشوبة بحزم رقيق
  - لبني : إبقى خلي بالك من نفسك.. وإياك تمشي من غير العكاز.
    - بصوت باكي.. دون أن ينظر لها
  - عماد: عكازي في الحياة إنتي.. مش حتة الخشب اللي بمسكها في إيدي ..
    - ترفع يدها الأخرى (اليمني) لتتحسس شعر رأسه بحنو
      - لبنى : ولما تيجي تزورني..إياك أشوفك تبكي..

- يطلق لدموعه العنان ويبكي بصوت مسموع
- تلقي نظرة غائمة للكادر .. وكأن روحها تطوف فوق مكان قبرها.. ثم تنظر لعماد بإشفاق وهي تقول

لبنى: بس المشوار هيبقى بعيد عليك ...

- تفكر برهة ثم تناديه

لبنى :عماد..

- يلتفت لها ببطء .. فتقول له

: متخليش عزت يدفني في إسكندرية .. قول له إني وصيتك تدفني في أكتوبر .. مع باباك.. على شان المشوار يبقى قريب عليك.. وكمان علىشان عمي يفرح معايا لما تبقى تيجي تزورني.

- يقول لها بصوت يقطعه البكاء

عماد : هدفنك في قلبي.. علشان كل دقة من دقاته .. تبقى فاتحة بتتقرى على روحك..

- بنبرة متعبة

لبنى : متتعبنيش .. واسمع الكلام..

عماد : حاضر.. هسمع الكلام ..لكن هزورك كل يوم.. مع كل طلعة شمس..

لبنى : لا.. إنتا لما بتمشى على رجليك كتير بتتعب

عماد: بتعب لإني مبكنش بمشى لك..

لبنى : لما هتمشي لي أنا اللي هتعب.. وهحس إن كل خطوة بتخطيها بتدوس على قلبي..

عماد : يبقى أسكن في قبر جنبك هناك..

- تبكى .. وهي تسحب رأسه لتضعها فوق صدرها..

- تضمه بشدة وهي تقول

لبنى : أقسى ما في الموت .. بعدي عنك ..

عماد : وأقسى ما في الحياة .. حرماني منك ..

لبنى: لكن روحي هتبقى جنبك ومعاك وحواليك.. هشوفك وإنتا بتكتب.. وإنتا بتحلم.. حتى وإنتا بتفطر.. هتلاقيني قاعدة على الكرسي بتاعي قدامك.. صدقني.. مش هخليك تحس بغيابي أبداً..

- وهي ترفع رأسه

: يلا .. إوعدني إنك متتعبش نفسك عشاني..

- وهو يجهش باكياً

- عماد : مش هقدر أوعدك ..
- وهو يلقي برأسه على صدرها

: لإني لو اتحكمت في رجليا.. وخليتها ما تمشيش ليكي.. مش هقدر أتحكم في أعصابي .. في أنفاسي .. في دمي.. اللي هيمشي لك نقطة ورا نقطة..لحد ما يبقى زي سرب فراش بيحوم حوالين قبرك..مش هقدر يا لبنى

- رافعاً صوته في تصميم
  - : مش هقدر
  - بنبرة يائسة..
- لبنى: يعني مفيش فايدة..
- يستكين على صدرها ولا يرد.. فتفكر برهة ثم تقول له
  - لبني : إدفني هنا يا عماد..
- على وجه عماد.. الذي ارتفع من فوق صدرها ليحدق فيها بذهول
  - تقول له مؤكدة
  - لبنى : إدفني هنا.. في الجنينة.. جنب الشجرة..
    - متلعثماً.. مصدوماً
    - عماد : هنا.. إزاي..

- بنبرة بالغة الوهن

لبنى : من غير إزاي .. قوم بسرعة.. هات ورقة علشان أكتب لك إقرار بكده..

- ينظر لها بحيرة.. فتقول بتصميم

لبنى: يلا .. هات الورقة بسرعة..

- ينهض .. يلتقط ورقة وقلم من فوق المائدة الأرابيسك..

- يعود ليعطيها الورقة والقلم..

- تمسك بالورقة والقلم.. لنراها تخط بأصابع مرتعشة على أول سطر

« بسم الله الرحمن الرحيم»

- تهم بالكتابة على السطر الذي يليه.. فيستدير ويتحرك نحو مائدة الهاتف بينما نسمعها تقول له

لبني : رايح فين..

- يمسك بالسماعة ويقول لها

عماد : أنا ريحتك وسمعت كلامك.. إسمعي انتي كلامي المرة دي عشان خاطري

- وهو يطلب رقم

: هتصل بالدكتور..

- تنظر له وتبتسم ابتسامة واسعة تصحبها موسيقي مناسبة
- يضغط على عدة أرقام ثم يستدير وهو ينصت للسماعة لينظر نحوها..
- من جهة نظر عماد.. لبني قد أسلمت الروح بعدما سقط القلم من يدها التي ألقتها بجوارها على السرير..
  - تسقط السماعة من يده.. بينما نسمع صوت هديل الحمام من المشهد القادم



### فوتومونتاج[

- حطام غية الحمام.. لنرى سرب من الحمام يقف فوقه وهو يهدل بصوت يصبح خلفية لصوت عماد طوال هذا المشهد

صوت عماد: صوت الحمام كان واصلني .. حسيت إنه غريب .. كأني كنت بسمعه لأول مرة .. كان عامل زي صوت نهنهة أطفال صغيرين .. تعبوا من كتر البكا ..

- السماء المظلمة.. ثم تهبط الكاميرا لتستعرض الشجرة من أعلى إلى أسفل.. ثم تستدير الكاميرا حول الجِذع .. مستعرضة الأرض حوله وكأنها تنتقي مكاناً لقبر لبنى .. ثم بعد اكتمال الدورة .. نسمع صوت عماد

صوت عماد: فضلت حوالي ساعة .. ببكي على صدرها..



# غرفة النوم[

#### الشهد

ليل : داخلي

- عماد يبكي على صدر لبني
- تسقط من عينه نظرة على الورقة
- صوت عماد: لحد ما عيني جت على الورقة
  - يمسك بالورقة ويتأملها
- صوت عماد : حسيت إني هسمع صوتها مرة تانية.. لما أقرأ آخر حروف كتبتها..
- الصدمة على وجه عماد ثم على الورقة.. لنرى كلمة «بحبك» قد كتبت بعرض الصفحة أسفل البسملة
  - صوت عماد: بسم الله الرحمن الرحيم .. بحبك..
- يترك الورقة .. تسقط من يده فوق السرير.. ليلقي برأ سه مرة أخرى على صدرها بينما نسمع صوته

صوت عماد : ملحقتش تكتب الإقرار .. علشان تخليني من المسئولية .. فكتبت كلمة واحدة.. كلمة كانت أشد إلزاماً من كل أحكام المحاكم..

- وهو ينهض ..

:كلمة بحبك..

- يتحرك نحو شباك الغرفة

صوت عماد : فصممت إني أحقق لها أمنيتها الأخيرة .. حتى لو كان المقابل.. حبل المشنقة..

- يفتح الستار.. وينظر عبر الشباك

: بصيت من الشباك..

- من جهة نظر عماد.. الحديقة .. ثم الأرض بجوار الشجرة

: الوقت كان متأخر..و الصمت اللي مكنش بيقطعه غير صوت الحمام .. خلاني أقلق وأخاف..

- وهو يغلق الستار

: إزاي أحفر قبر في قلب الصمت ده..

- يتحرك نحو جسدها فوق السرير.. وتسيل دمعتان على خديه وهو يتأمل جسدها
  - : بصيت لها وكأني بشهدها ..
  - يطأطيء برأسه محبطاً.. بينما نسمع صوته
    - : إزاي يا لبني.. إزاي
  - نسمع صوت جلبة في الخارج (مؤثرات من جو الزفة)
    - ثم صوت عماد
    - : لكن فجأة .. سمعت صوت دوشة شديدة ..
      - يتحرك مسرعاً نحو الشباك وينظر منه
  - : بصيت من الشباك لقيت عدد كبير من العربيات.. واقفة قدام العمارة اللي جنبنا
- يلتفت نحو السرير لنرى لبنى من جهة نظره.. بينما نسمع صوته يردف بنبرة متحسرة

- : كانت زفت عروسة..
- يتقدم منها.. وهو يسير باكياً بينما نسمع صوته
  - : كأن ربنا اختار ..إنه يبعت لي ستار يغطيني
- يصل إليها.. ثم يميل ليقبل جبهتها .. بينما نسمع صوته يقول بمرارة
  - : زفة عروسة..
- يسحب الغطاء من على صدرها ليغطى وجهها.. ثم يخلع الروب ويلقيه فوق السرير.. ثم يتحرك خارجاً من الغرفة بينا نسمع صوته

صوت عماد: وفي مشهد عُمْر خيالي ما كان يوصلني لأني أكتبه.. لا في رواية.. ولا في سيناريو.. كتبت أصعب وأهم مشهد في حياتي.. مشهد دفن حبيبة بطل الرواية الحزينة

- يخرج ويغلق الباب خلفه
- : كتبته .. وقمت كمان بتمثيله ..
- على جسد لبني المغطى فوق السرير



الحديقة

ليل : خاراجي

- السماء فوق حديقة الفيلا بينما نسمع صوت عماد

صوت عماد: المشهد كان ليل خارجي..

- حديقة الفيلا.. ثم الشجرة

صوت عماد: واللوكيشن كان .. جنينة الفيلا.. جنب الشجرة..

- على السماء.. لنرى طلقات فسفورية تنفجر مخلفة دوا مات متعددة الألوان والأشكال من الضوء المبهر.. بينما نسمع صوت عماد ممتزجاً بصوت انفجار الطلقات وصوت الزفة

صوت عماد: وعلى شريط الصوت.. مؤثرات من جو الزفة

- يخرج من باب المطبخ ممسكاً بأداة حفر (كوريك )..
- يصل إلى جوار الشجرة .. يرفع رأسه ويلقي نظرة على شباك غرفة النوم..
  - صوت الطلقات وأغاني الزفة يمتزج بصوت الحفر طول المشهد..
- يرفع مقدمة الكوريك.. ويغرسها في الأرض.. ثم يرفعه و يلقي الطين على جانب الحفرة ثم يغرس الكوريك مرة أخرى

- ترتفع الكاميرا.. لتستعرض .. السماء والطلقات الفسفورية تنفجر فيها.. ثم حطام غية الحمام..
- ثم على عماد الذي نراه قد غاص حتى أعلى ركبتيه في حفرة طولها قرابة المترين وعرضها قرابة النصف متر..
- على جانب الحفرة .. كومة من التراب .. يلقي فوقها بالكوريك.. ثم يخرج من داخل الحفرة وهو في قمة الإجهاد..
  - على الحفرة من الداخل بينما نسمع صوت هديل الحمام



### فوتومونتاج[

- واجهة الفيلا بينما نسمع صوته
- صوت عماد: طلعت غيرت هدومي . .
- سور الفيلا.. لنراه يركب سيارته وينصرف
  - : و روحت أكمل باقى المهمة..
- يسير في عدد من الشوارع وهو يستعرض واجهات المحلات..
  - من جهة نظر عماد .. واجهة مكتب حانوت مغلق
- مسجد (رابعة العدوية) أو (آل رشدان) .. لنرى سيارة عماد تتوقف أمامه
- مدخل محطة مصر (القطار) لنراه يخرج مسرعاً وهو يحمل في يده كتابين من القطع المتوسط (كتابي المائدة الأرابيسك)
  - غرفة النوم.. يضع عدد من الحقائب البلاستيكية على الأرض...
    - يسكب الماء من إناء على سرير غرفة النوم بينما نسمع صوته
      - صوت عماد: غَسِّلتَها..
      - يفرد قطعة قماش أبيض ليغطى بها الكادر
        - : وَكَفْنتِّها..

- يقف بمواجهة السرير في وضع صلاة الجنازة

: وصليت عليها..

- السلم الداخلي.. لنراه هابطاً من عليه وهو يحملها فوق ذراعيه..



### بجوار الشجرة

ليل : خارجي

- يقف.. وقد انغرست قدميه في التراب على حافة الحفرة ممسكاً بالكوريك .. بينما نسمع

صوت عماد: بعد ما حطيتها في الحفرة.. إكتشفت إن صعوبة المهمة انحسرت في الجزء اللي فاضل منها..

- ينظر باكياً نحو جسدها في داخل الحفرة

: إزاي هيجيني قلب أحط فوق جسمها التراب..

- ينظر لكومة التراب

: حسيت إن كل حفنة تراب بوزن جبل المقطم..

- وهو ينظر للحفرة

: وحسيت إن الحفرة الضيقة اللي على قد جسمها.. بطول وعرض الكون كله..

- يتمالك نفسه ويرفع الكوريك ويغرسه في كومة التراب

- : ورغم كل الأحاسيس دي.. حاولت ..
  - تتخشب يداه على مقبض الكوريك
    - : لكن مقدرتش...
- يسقط على ركبتيه .. مستنداً على عصا الكوريك
- : حسيت إن قوتي خارت.. وروحي انسحبت مني..
  - يمديده . . ليمسك بحفنة تراب
  - يقبل حفنة التراب في يده وهو يزرف الدموع
- يمد يده حتى تلامس أصابعه الكفن .. ويترك حفنة التراب .. ثم يمد يديه .. ليهيل التراب على الكفن بينما يرتفع صوت هديل الحمام
- ترتفع الكاميرا حتى تصل إلى الغية .. ثم تنحرف يساراً لنرى شباك غرفة نوم الجار ونورها يضاء..
  - على الحفرة .. لنراه قد ردمها وهو يسير على ركبتيه فوقها ليساوى التراب..
    - يتحسس سطح الحفرة برقة ثم يميل في لقطة بطيئة على التراب..
- الكاميرا في مكان منخفض .. بحيث نرى بروفيل عماد وهو يلامس سطح الحفرة بينما نسمع صوته

صوت عماد: ساعتها.. حسيت إني لو دققت السمع.. هسمعها بتناديني..

- على خد عماد الذي غاص في تراب سطح الحفرة

: هسمع صوتها بيقول لي .. عماد.. طلعني.. أنا كنت بهزر معاك..

- تترك الكاميرا عماد.. لتنحرف ببطءٍ نحو جزع الشجرة بينما نسمع صوت هديل الحمام



# غرفة رئيس النيابة

#### المشهد

ليل : داخلي

- عودة من الفلاش باك...
- عماد يطرق صامتاً.. بينما يتأمله المقدم عصام بنظرات تنضح بالإشفاق..
  - يلتفت رئيس النيابة .. للكاتب.. الذي نلاحظ شدة تأثره ويقول له

رئيس النيابة: قررنا نحن.. محمد يحى حسين.. رئيس نيابة الخليفة .. بحبس المتهم احتياطياً على ذمة القضية.. لحين استخراج الجثة وتشريحها بمعرفة الطب الشرعي لبيان سبب الوفاة..

- يلتفت مصعوقاً لرئيس النيابة

عماد : ليه .. تعملوا فيها كده ليه؟

رئيس النيابة :علشان نتأكد إن الكلام اللي قلته هو الحقيقة.. ومش زي ما إنتا قلت في بداية اعترافك..

- وهو ينظر للمقدم عصام

: فصل أخير في رواية من تأليفك ..



### فوتومونتاج[

- المشهد
- عماد يخرج من غرفة النيابة بصحبة المقدم عصام
- عماد بين اثنين من العساكر في الطرقة المؤدية للحجز .
  - حديقة الفيلا .. الشجرة .. ثم مكان القبر..
- الحجز .. عماد مسنداً رأسه على الجدار بجوار العكاز وهو يحتضن ملف الرواية بين ذراعيه
- نهار / أمام القسم .. سيارة إسعاف بجوار سياري عزت والعميد حسن .. بينما يركب عماد في ظهر البوكس بمصاحبة عدد من العساكر..
  - المقدم عصام في مقدمة البوكس.. يشير للسائق بالتحرك..
- أمام الفيلا .. رتل السيارات يتوقف.. مضاف إليه سيارة ملاكي يهبط منها رئيس النيابة..
  - الجار مع سيد أمام الكشك..

- عماد.. يهبط من صندوق البوكس.. ليسير بين اثنين من العساكر بخطوات متخاذلة وهو يمر على العميد حسن وعزت وعايدة اللذين نظروا نحوه نظرات حزينة متأسية..
- الحديقة .. الطبيب الشرعي ومن خلفه موظفي الطب الشرعي منهم اثنان يحملان « نقالة» يسيرون باتجاه الشجرة..
  - الشجرة .. والمائدة .. ثم على مكان القبر..



### الحديقة [

نهار : خارجي

- سرب حمام يتطاير فوق حطام الغية..
- على مقربة من الشجرة.. يشير رئيس النيابة نحو الجار
- رئيس النيابة: عايزينك ترشدنا عن المكان اللي شوفته بيردم فيه الحفرة..
- على عماد الذي وقف مستنداً على عكازه بيد وبالأخرى يمسك بملف الرواية .. ثم من جهة نظره تستعرض الكاميرا تفا صيل المكان بينما نسمع صوت رئيس النيابة يخاطبه
  - صوت رئيس النيابة: المكان اللي حدده الشاهد صح..
    - يلقى عماد نظرة نحو الشجرة ثم يشير له موافقاً..
  - فجأة يكتسى وجه عماد بتعبيرات الغضب وهو ينظر ناحية الشجرة..
- من جهة نظره عدد من العساكر يحركون المائدة والمقعدين ليوسعوا مكان الحفر
  - جندي (1) يدفع مقعد لبني بعدم اكتراث فيسقط المقعد على الأرض

- عماد .. في لقطة بطيئة يلقى بالعكاز .. ثم يعدو متعرجاً وهو يمسك بملف الرواية ليزيح من أمامه بالمقدم عصام ورئيس النيابة وعدد من الجنود حتى يصل إلى مقعد لبنى ويميل عليه ليعدله برفق.
- ينظر عماد للمقعد متأسياً.. ثم يمسح بيده جانبه الذي سقط على الأرض .. ثم يميل على وسادة المقعد ليتحسسها وكأنه يتحسس رأس رضيع نائم ..
- نلاحظ في عمق المشهد (من خلف عماد) مزيج من تعبيرات التعاطف والاندهاش على وجوه عناصر المشهد .. خاصة المقدم عصام الذي نراه يميل على الأرض ويلتقط العكاز
  - يتقدم المقدم عصام نحو عماد.. ومن خلفه رئيس النيابة..
    - يمدله العكاز وهو يقول له
    - المقدم عصام: لو عايز ترتاح ممكن تستنا في العربية برة.
      - وهو يلتقط العكاز
      - عماد: لو عايزني أرتاح..
      - وهو يشير نحو باب الفيلا
        - : سيبني أدخل جوه .

- يلتفت المقدم عصام لرئيس النيابة .. فيومئ له بالموافقة..
  - يشير المقدم عصام لعماد
    - المقدم عصام: إتفضل..
      - ثم يشير لجندي (1)
  - المقدم عصام :معاه يا عسكري..
- بعدما يسير عماد خطوتين يتوقف برهة .. ينظر خلالها للأرض متفكراً .. ثم يستدير بعدها.. ليسير نحو المقدم عصام .. بينما نسمع صوت الحفر
  - يواجه المقدم عصام ويقول له بنبرة رجاء
  - عماد : ممكن أطلب من حضرتك طلب أخير..
    - المقدم عصام: إتفضل..
- وهو يبعد ملف الرواية عن صدره .. بصعوبة وعناء من ينزع قلبه من بين أضلاعه عماد : خلى الملف ده معاك..
  - يلتقط منه المقدم عصام الملف .. ينظر لغلافه ثم يقرأه
    - المقدم عصام: آخر نساء الحب..

- وهو يشير نحو الملف
- عماد : دي روايتي الأخيرة.. اللي مش هقدر أكملها..
- وهو يضع يده على كتف المقدم عصام ليقول له راجياً

عماد: عايزك ترفق بالملف ده صورة من أقوالي في محضر النيابة.. وتوصلها بنفسك لرئيس تحرير جريدة صوت مصر.. في عنوان هتلقاني كاتبه في أول صفحة جوه الملف

. .

- ينظر المقدم عصام للملف...
  - المقدم عصام :حاضر ..
    - مؤكداً
    - عماد: أعتبر ده وعد..
- يهز المقدم عصام رأسه موافقاً.. فيسير عماد بصحبة عسكري (1)
  - يتابعه المقدم عصام بنظرات مشفقة ثم يشير لعسكري (2)

المقدم عصام: خديا عسكري..

- يأتي عسكري (2) مسرعا فيقول له بنبرة حازمة

المقدم عصام :روح معاه إنتا كمان.. وخلي بالك إنتا وزميلك .. لأنه ممكن يعمل في نفسه حاجة..

- يتحرك جندي (2) خلف عماد وجندي (1) بينما نسمع صوت الحفر



### فوتومونتاج[

- عماد بين اثنين من العساكر في الريسبشن .. يلقي نظرة على محتوياته .. وكأنه يودعها.. بينما نسمع موسيقى مناسبة (يفضل أن تكون أداء منفرد بالعود أو الكمان للمقدمة الموسيقية لأغنية أضنيتني بالهجر) .
  - غرفة النوم .. يدخل .. ليلقي نظرة سريعة ويخرج..
- سطح الفيلا.. من جهة نظره.. نرى حطام الغية .. و سرب حمام يحط فوقها.. ثم المقعد الفارغ وشال لبني.. وجهاز التسجيل..
  - التكعيبة من الداخل .. لنراه .. يفتح بابها



نهار : داخلي

# التكميبة

- عماد يجلس على مكتب التكعيبة .. بينما يجلس عسكري (1) على الكنبة أمام المكتب
  - عسكري (2) يقف أمام الباب من الخارج.
- يخرج ورقة من درج المكتب ليضعها أمامه.. ثم يخرج القلم من جيبه.. ويخط على الورقة..
  - تقترب الكاميرا من وجهه.. بينما نسمع صوت لبني من مشهد (54)
- ص لبنى: لكن نهايتها حزينة قوي.. وفيها دراما وخيال وصل في تجسيده للحظة الفراق.. مستوى مبقدرش أتحمله..من شدة قسوته ومرارته .. وجماله..
- تنقبض تعبيرات وجهه.. وهو يذرف دمعة سقطت فوق الورقة بينما نسمع صوت لبني من نفس المشهد
- ص لبنى: لو سـمعت الأغنية بتركيز.. ولاحظت التناقض بين عذو بة ورقة بدايتها..ومرارة وقسوة نهايتها هتعذرني..
- على الورقة .. لنراه يخط توقيعه أسفل آخر سطر فيها بينما نسمع صوتها من مشهد (55)

ص لبنى: خايفة إن التشابه بين بداية قصتنا وبداية القصيدة في الجمال والرقة والعذوبة .. يسرى على النهاية..

- يلقي بالقلم على الورقة .. ثم يسند ظهره على المقعد .. وينظر عبر شباك التكعيبة بعينين باكيتين .. بينما نسمع صوت لبني من نفس المشهد

ص لبنى: خايفة يا عماد .. إن حد فينا في يوم من الأيام.. يطلب من البدر إنه يخلي الليل.. يرش نجومه على أكفان حبيبه اللي مات..

- ينتفض جسد عماد بصورة أقلقت عسكرى (1)..
- من جهة نظر عسكرى (1).. عماد يلتقط الورقة..
  - يتأملها باكياً .. ثم يقرأ
- عماد :وصيتي.. أقر أنا الموقع أدناه.. أني بكامل إرادتي .. أوصى بتشريح جثتي..
  - بنبرة بالغة الوهن والعناء والعمق...

عماد: أسوة بما سيحدث مع جسد زوجتي السيدة لبني إبراهيم عزت.. كما أوصي

. .

- على حطام الغية.. لنرى أكبر عدد ممكن من أسراب الحمام يحط فوق حطامها.. بينما نسمعه يردف بنفس النبرة ...

عماد: بدفننا معاً.. في قبر واحد.. داخل حديقة فيلتي .. حتى أتقاسم معها مصير ما بعد الحياة .. بحلوه ومره.. ومرها.. « وإنا لله وإنا إليه راجعون» صدق الله العظيم..

- هو ينظر لعسكري (1)
  - عماد : توقيع
  - وكأنه يشهده
- : عماد حلمي عبد الوهاب.
- يضع الورقة بيد مرتعشة فوق المكتب..
  - يستدير ليلقى نظرة على حطام الغية..
- يعتدل .. ليلقى نظرة على برواز صورة الزفاف..
  - البرواز من جهة نظر عماد
- يبتسم ابتسامة خفيفة وهو يرفع عينيه من على البرواز.. ثم يقول بصوت خا شع شفاف .
  - عماد: أشهد أن لا إله إلا الله.. وأشهد أن محمد رسول الله..
    - يسقط عماد في لقطة بطيئة بصدره على سطح المكتب

- في نفس اللحظة .. نسمع صوت هججان أسرب الحمام من فوق حطام الغية ..
- على حطام الغية .. لنرى في لقطة بطيئة تصحبها مو سيقى منا سبة أسراب الحمام وهي تتطاير محلقة في السماء .. وكأنها تحلق خلف روح عماد .. في موكب جنائزي يشق السماء صعوداً..
- عندما يصبح سرب الحمام مثل نقاط بقلم رصاص فوق صفحة بيضاء..نرى كادر ثابت

- موسیقی

(النهاية)

(تترات)

(معالجة أخرى للنهاية)

نهاية ( 2 )

# فوتومونتاج[

#### الشهد

- عماد بين اثنين من العساكر في الريسيبشن .. يلقى نظرة على محتوياته وكأنه يودعها
  - غرفة النوم .. يدخل .. ليلقي نظرة سريعة ثم يخرج
- سطح الفيلا .. من جهة نظره .. حطام الغية لنرى سرب حمام يحط فوقها .. ثم المقعد الفارغ وشال لبني وجهاز التسجيل
  - التكعيبة من الداخل .. لنراه يفتح بابها



## التكعيبة[

تَهَارُ : داخلي

- عماد يجلس على مكتب التكعيبة
- عسكري (1) يجلس على الكنبة أمام المكتب بينما يقف عسكري (2) أمام الباب من الخارج
- يخرج ورقة بيضاء من درج المكتب ويضعها أمامه ... ثم يخرج القلم من جيبه ويخط فوق الورقة
- تتركه الكاميرا لتستدير نحو الشباك لتستعرض السماء فوق حطام الغية ثم تهبط مع سرب حمام يحط فوقها
  - التكعيبة.. لنرى عماداً من جهة نظر العسكري (1) يخط توقيعه في ذيل الورقة
    - يمد الورقة لعسكري (1)
    - عماد : ادي الورقة دي لعصام بيه وقول له يرفقها بالملف
    - ينصرف عسكري (1) بينما يلقي عماد نظرة على برواز صورة الزفاف



# الحديقة[

## الشهد

- على مقربة من الشـجرة يقف المقدم عصام مع رئيس النيابة وهو يمسـك بملف الرواية
- يلقي نظرة على الورقة بعدها تمتقع تعبيرات وجهه وهو يرمق رئيس النيابة بنظرة وهو يردف بنبرة مصعوقة

م عصام: وصيتي ؟!!

- على رئيس النيابة الذي نظر مشدوها نحو حطام الغية



## $oxedsymbol{oxedsymbol{eta}}$ التكعيبة وسطح الفيلا

- (الإضاءة في المشهد متغيرة .. سواء داخل التكعيبة أو على السطح .. ليل نهار داخل خارج.. لا يهم .. المهم أن نكون أمام صورة معبرة عن الحدث حتى لو أننا سنجد أنفسنا أمام مشهد استثنائي .. يجمع بين الحقيقة والخيال والواقع والأسطورة)
  - البرواز من جهة نظر عماد لنرى صورته مع لبني من مشهد الزفاف
- ترتفع الكاميرا على وجهه لنلاحظ أن تعبيراته أشرقت فجأة وهو يلقي نظرة على باب التكعيبة
- من جهة نظر عماد .. نرى لبنى وقد ارتدت فستانها الأبيض في مشهد الزفاف وهي واقفة لتنظر ناحيته
- من جهة نظر لبني .. نرى عماداً مرتدياً بذلته السوداء من نفس المشهد وهو ينهض ليتحرك ناحيتها

- فى لقطة بطيئة تصحبها موسيقى مناسبة ومعبرة يتخللها صوت هديل الحمام وكأنه آلة ضبط إيقاع المقطوعة الموسيقية .. يتعانقان ..
- لقطات من عدة زوايا للبني وعماد وقد تعانقا في ما يشبه رقصة هادئة في البراح بين حطام الغية والتكعيبة
  - نظرات متبادلة معبرة بينهما من عدة زوايا يفصل بينها المزج
- عنق عماد يميل في لقطة بطيئة ليلتف على كتف لبنى بينما نرى في خلفية اللقطة فرد حمام يحط فوق حطام الغية
- عماد مغمضاً عينيه كالنائم فوق كتف لبنى بينما ترفع لبنى رأسها وتنظر نحو السماء لنرى القمر بدراً من جهة نظرها .. فتغلف تعبيرات وجهها ابتسامة ناعمة
- عماد يرفع رأسه من فوق كتف لبنى لينظر نحو البدر نفس النظرة .. ويبتسم نفس الابتسامة
- لقطة قريبة للبدر في السماء .. ثم يتسع الكادر هابطاً على ظهر لبني لنرى كفي عماد ينزلقان على ظهرها ببطء قطرتان من العسل فوق سطح أملس

- على وجه عماد وهو ينظر النظرة الأخيرة ثم ينهار ساقطاً بين ذراعيها
- على مخرج السلم بالسطح لنرى المقدم عصام ومن خلفه رئيس النيابة وعزت والعميد حسن يهرولون نحو التكعيبة
- من جهة نظر المجموعة .. نرى جسد عماد ساقطاً على الأرض .. في البراح بين التكعيبة والغية وقد أسند ظهره على صدر عسكرى (2)
- ترتفع الكاميرا على جسد عماد .. تتحسس طريقها بين النجوم حتى تصل إلى البدر .. بينما نسمع صوت عماد

صوت عماد: وصيتي .. أقرُّ أنا الموقع أدناه.. أني بكامل إرادتي أوصي بتشريح جثتي.. أسوة بما سيحدث مع جسد زوجتي السيدة لبنى إبراهيم عزت.. كما أو صي بدفننا معاً.. في قبر واحد.. داخل حديقة فيلتي..حتى أتقاسم معها .. مصير ما بعد الحياة بحلوه ومره.. كما تقاسمت معي الحياة.. بحلوها .. ومرها.. «وإنا لله وإنا إليه راجعون» .. صدق الله العظيم

نهاية ...

تترات...

معالجة أخرى للنهاية



# فوتومونتاج[

الشهد

- الريسبشن.. عماد يستطلع محتوياته وهو يسير بين العسكريين وعلى وجهه تعبيرات بالغة التأثر بينما نسمع صوت لبني من مشهد (54)

ص لبنى: لكن نهايتها حزينة قوي.. وفيها دراما وخيال وصل في تجسيده للحظة الفراق.. مستوى مبقدرش أتحمله من شدة قسوته ومرارته.. وجماله.

- السلم الداخلي.. لنراه يصعده وهو يمسح دمعة سالت فوق خده بينما نسمع صوته من نفس المشهد

ص عماد:قسوته ومرارته .. وجماله.. مش حاسة بتناقض في كلامك..

- باب غرفة النوم .. يقف متخشباً أمامه من الخارج .. ينظر للباب و كأن الباب يفضى إلى غرفة إعدام .. نصبت فيها مشنقته بينما نسمع

ص لبني: لو سمعت الأغنية بتركيز.. والاحظت التناقض بين عذوبة ورقة بدايتها .. ومرارة وقسوة نهايتها.. هتعذرني..

- باب غرفة النوم يغلق من الداخل.. لنرى عماداً يستند بظهره إليه وهو مغمض العينين بينما يرمقه العسكريان بنظرات مستغربة

- يفتح عينيه ليستطلع محتويات الغرفة بينما نسمع صوته لبني من مشهد (54)

ص عماد:أضنيتني بالهجر .. ما أظلمك..

ص لبني: فارحم عسى الرحمن أن يرحمك

ص عماد: مولاي ..... حكمتك في مهجتي

ص لبنى: فارفق بها يفديك... من حكمتك

ص عماد: ما كان أحلى..... قبلات الهوى

- يتلاشى الصوت تدريجياً ..

ص لبنى: إن كنت لا تذكر ... فاسأل فمك ..

- سطح الفيلا .. بينما نسمع

ص عماد: يا بدر..

- حطام التكعيبة .. بينما نسمع صوت لبني

ص لبني: بلاش .. بلاش يا عماد..

- يتحرك نحو جهاز التسجيل والمقعد الفارغ وشال لبني بينما نسمع صوته من نفس المشهد

ص عماد: النهاية اللي بتخافي تسمعيها.. بتبدأ من هنا..



## سطح الفيلال

ثهار : خارجي

- يهبط ليمسك بجهاز التسجيل ويحتضنه بين ذراعيه وعكازه .. بينما نرى أسراب الحمام تحط فوق حطام الغية .

- يسير نحو التكعيبة ومن خلفه العسكريين بينما نسمع صوت لبني من مشهد (55)

ص لبنى: خايفة التشابه بين بداية قصتنا وبداية القصيدة في الجمال والرقة والعذوبة ... يسرى على النهاية..

- يقف أمام باب التكعيبة .. بينما نسمع صوت لبني

ص لبني: خايفة يا عماد..

- يلتفت ليُلقي نظرة على حطام الغية لنكتشف أن أسراب الحمام قد غطتها وهي تهدل بصوت يصبح خلفية لصوت لبني التي أردفت :

ص لبنى: إن حد فينا في يوم من الأيام.. يطلب من البدر إنه.. يخلى الليل يرش نجومه.. على أكفان حبيبه اللي مات.



## التكعيبة

### ثهآداً: داخلي

- عماد يجلس على مكتب التكعيبة الذي وضع جهاز التسجيل فوقه..
- عسكري (1) يجلس على الكنبة أمام المكتب بينما يقف عسكري (2) أمام الباب من الخارج..
  - يضغط على ذر التشغيل فنسمع صوت فريد
    - ص فريد: ما كان أحلى .. قبلات الهوى..
- يخرج ورقة من درج المكتب ليضعها أمامه .. ثم يخرج القلم من جيبه.. ويخط فوق الورقة بينما تتركه الكاميرا لتستدير نحو الشباك
- تستعرض الكاميرا على صوت فريد .. السماء فوق حطام الغية.. لتهبط مع سرب حمام فوقها لنكتشف أن أسراب الحمام قد غطتها.
  - ص فرید .....
- التكعيبة.. لنرى عماد من جهة نظر عسكري (1) يخط توقيعه في ذيل الورقة.. ثم يضع القلم
  - يُلقي نظرة على برواز صورة الزفاف

- يمســك بالبرواز.. يقربه من وجهه.. يتأمله برهة بعدما اعتدل ليســتند بظهره إلى كرسيه
- على وجه عماد الذي ابتسم ابتسامة رقيقة .. وهو يميل برأسه لتتوسد ظهر مقعده
  - على الأرض بجوار المقعد .. لنرى البرواز يسقط عليها ويتحطم زجاجه .
    - على شباك التكعيبة لنسمع صوت هججان الحمام من المشهد القادم



## فوتومونتاج[

- أسراب الحمام وهي تتطاير من فوق حطام الغية لتحلق في السماء
- باب الفيلا لنرى العسكري (1) يخرج منه مسرعاً ليتجه نحو المقدم عصام الذي يقف ممسكاً بملف الرواية بجوار رئيس النيابة..
  - على الحفرة التي نلاحظ كومة التراب قد عادت لتتكوم فوق حافتها..
- السلم الداخلي للفيلا.. لنرى المقدم عصام يصعده مسرعاً وهو يمسك بالملف ومن خلفه عسكري (1) ومن خلفهما رئيس النيابة ومسئول الطب الشرعي وعزت والعميد حسن وبعض الجنود..
- سطح الفيلا.. لنرى المجموعة تتحرك مسرعة نحو التكعيبة بينما يقف عسكري (2) أمام الباب وهو واجم.



# التكعيبة[

المشهد

نَهار : داخلي

- يضع ملف الرواية على المكتب ثم يُلقي نظرة على جسد عماد بعدها يلتفت لعسكرى (1)

م عصام: كنتوا واخدين بالكم منه كويس..

عسكري(1): عنينا ماغمضتش من عليه سعادتك وم ......

- مقاطعاً بعصبية وهو يضغط على ذر إبطال التسجيل بعدما نسمع صوت فريد

ص فرید: یا بدر

م عصام: يعني محطش حاجة في بقه..

عسكري(1): لا يا باشا.. معملش حاجة .. غير إنه..

- وهو يشير للورقة

: كتب الورقة دي..

- يلتقط المقدم عصام الورقة.. ويطالعها .. بينما يقترب مسئول الطب الشرعي من جسد عماد لبتفحصه

- على وجه المقدم عصام الذي بدا متأثراً بشدة..
- على وجه مسئول الطب الشرعي الذي إلتفت وقال لرئيس النيابة الذي نرى من خلفه عزت والعميد حسن ينظران باهتمام
  - مسئول الطب الشرعي: مات..
- على وجه المقدم عصام.. الذي اقترب من رئيس النيابة وهو يقرأ محتوى الورقة .. بينما تستعرض الكاميرا ردود أفعال المجموعة وهم يتبادلون النظرات بتأثر بالغ نحو جثة عماد

مقدم عصام: بسم الله الرحمن الرحيم.. و صيتي .. أقر أنا الموقع أدناه.. أني بكامل إرادتي أو صى بتشريح جثتي.. أسوة بما سيحدث مع جسد زوجتي السيدة/ لبنى إبراهيم عزت.. كما أوصي بدفننا معاً.. في قبر واحد.. داخل حديقة فيلتي..حتى أتقاسم معها .. مصير ما بعد الحياة بحلوه ومره.. كما تقاسمت معى الحياة.. بحلوها .. ومرها..

- وهو يغمض عينيه متأثراً

: إنا لله وإنا إليه راجعون.. صدق الله العظيم.. توقيع .. عماد حلمي عبد الوهاب.

- على جسد عماد.. بينما تخرج المجموعة تباعاً من التكعيبة ..
- ظهر المقدم عصام الذي كان آخر من يخرج وهو يتوقف ثم يستدير عائداً..
- يتقدم من المكتب.. ليلتقط من فوقه ملف الرواية ويرفق به ورقة الوصية..
- يتأمل غلاف الرواية برهة من الزمن .. بعدها .. يُلقي على وجه عماد نظرة فيها تقدير واحترام ثم يقول وكأن عماداً يسمعه
  - مقدم عصام: وصيتك هنفذها..لكن هستأذنك في تعديل بسيط..
- يضع ملف الرواية على المكتب .. ثم يلتقط قلم (فلومستر) ويجر خطاً فوق اسم الرواية
- يلقي نظرة على و جه عماد ثم يكتب فوق الغلاف عنواناً جديداً .. أكثر صدقاً وموضوعية وتعبيراً عن قصة عماد الأخيرة .

- على الغلاف لنرى القلم في يد المقدم عصام وهو يكتب (آخر رجال الحب)
- يضغط المقدم عصام على ذر تشغيل التسجيل ثم يستدير منصرفاً.. وهو يضم يده على ملف الرواية
- على وجه عماد.. ثم تستدير الكاميرا على شباك التكعيبة بينما نسمع صوت فريد مغنياً

ص فرید: یا بدر..



## فوتومونتاج

- على حديقة الفيلا من أعلى لنرى مسئولي الطب الشرعي يحملون جسدي لبنى وعماد فوق نقالتين وهم يسيرون باتجاه سيارة الإسعاف بينما نسمع صوت فريد مغنياً ص فريد:

ص فريد: يا بدر ..إن واصلتني بالجفا .. يا بدر

ومت في شرخ الصبا مغرمك..

- السماء .. ثم / مزج على السماء وقت الليل لنسمع صوت فريد صوت فريد : قل للدجي مات ..

- على البدر .. بينما نسمع

صوت فريد: مات شهيد الوفا..

- على النجوم التي تلألأت من حول البدر بينما نسمع صوت فريد ص فريد: فانثر على .. فانثر على .. أكفانه أنجمك..

نهاية تترا*ت* 





#### إهداء من الفنان

#### محمود سالم

#### للمؤلف تحت الطبع

5- لقمان الفرس (9 حلقات) سيرة الصحابي الجليل سلمان الفارسي •

### عبقريات التابعين

1- عبقرية عامر بن عبد الله التميمي ( زاهد البصرة )
 2- عبقرية محمد بن على بن أبى طالب المعروف بمحمد بن الحنفية ( مُعتزل الفتنة )
 3- عبقرية شريح بن الحارث الكندي (سيف الحق)
 4- عبقرية ذكوان بن كيسان الهمداني ( طاووس الفقهاء )

### للتواصل مع المؤلف

khaledeldahab2011@gmail.

```
رواية

1 - ثورة العميان

2 - لا عذارى هنا

3 - بانع الموت

4 - امرأة غير صالحة للحب

6 - ليل وعين

7 - فارس وادي الصخر

8 - مدام B

السطين و الحيا بموت في الشناء

9 - العب بموت في الشناء

مجموعة قصة قصيرة

1 - العزف بأنامل تحترق
```

#### 2- نصف رجل 3 - استنجلينا

رح 1- قبل أن يموت الملك 2- السفينة ستبحر بعد قليل 3- ثورة الحمير

4- أنشودتا الحب والقهر 5- تأشيرة هجرة للوطن

(عن نص ثورة العميان للمؤلف)

### مجموعة أفلام روائية قصيرة

1- هابيل وهابيل 2- جنة الخطاة 3- الآن سوف أعبر

#### سيناريو

4- الكلاب

1 – عسل ودم (ملحمة درامية في ثلاثة أجزاء) المجزء الأول: الشيطان في قلب امرأة ( 30 حلقة ) المجزء الثاني: فتى النور والنار ( 30 حلقة ) المجزء الثالث: التفاحة والسكين (33 حلقة ) 2 – شيطان الجاهلية (سباعية درامية ) سيرة الصحابي الجليل عمير بن وهب 2 – مُصعب الخير (سباعية درامية ) سيرة الصحابي الجليل مُصعب بن عمير عمير 4 – محامى الفقراء ( سباعية درامية ) سيرة الصحابي الجليل مُصعب بن عمير عمير عصابي الجليل أبو ذر الغفاري